

## **Luka** **To tekepo Lukaye hogugu**

*Luka booka goo eyo bei*

Odoo Luka hagee Yu odoonee osoloso Yesuwo hamamee dili odoonee. Esino yo melesenee neli odoo badolone o odoo Poloye Godeeyo to takomo sileeme yibolosee silee. Lukaye goo toowa booka hamapoo hogugu ee egeesee moloso. Goo ee, Yesu Kelisoye hedebe Yu odoono pidilame ka sibile. Esino yayo Yu odoo sabolo osoloso mipoo toowa hamapoo debeli odoo susuga sabolo pidilame ka simi. Osoloso dala ma kulodu egee do sabolo osoloso goohele ma kulodu egee do sabolo pidilame ka simi. Osoloso Yesuye odoo susuga mapoo eligimo silee goo ee o booka hamapoo hoguguso.

<sup>1-2</sup> Godeeye ima kulodu tou temelee odoo aboso bei mooloogoo maga goo egee ogoloso diba see Godeeyo tou talame, odoo ma kulodu goo egee takomo silesibilame bei mooloogooso. Diayo egee takomo silesibo goo ee iba olo duso. Esemee goo tei duluga odoo sabolo osoloso goo tei egei odoo sabolo oso taka duloso, diayo goo ee hoguguso.

<sup>3-4</sup> Esino goo susuga bei mooloogoo maga ayo medee gooleedooga, ayo to hagee see medee ka hoguga. Esiga Tiyopoles wiligi odoo hu toowa too, nayo du goo ee medee tei goodoo dalame, ayo namapoo to hogugu hagee ka teneeso.

*Yonee odoo howo oluguli soomagalai goo ee yebugu*

<sup>5</sup> Helodeeye Yudiya mi mapoo wiligi toboloso badebei biame omapoo, Godee ogo odoo ogo doloso domo badeli odoo hee badebeiso, o hu Sekalaya. Yo Godee ogo odoo ogo doloso domo badeli odoo mooloogoodoo hee Abiyayo mooloogoodoo ma kulodu badebeiso. Osoloso osobowo hu Elisabet, obakadio Elonowo soosoo.

<sup>6</sup> Sekalaya dio Elisabet dio Godeeyo howo woola mapoo tekepo doloso dobolone, Godeeye kokodo taka to sabolo osoloso yayo tei magoo goo ee medee dodolone debeiso.

<sup>7</sup> Esino diba holo soomagelega debeiso. Bei, Elisabet yo sobo deme taba, osoloso sobo adaga poloso badebei. Osoloso Sekalaya onosee olo adaga poloso badebei.

<sup>8</sup> Biame heeso Sekalaya o mooloogoodoo oso tou talai biame simiso. Esemе Sekalayaye Yu odoo dia tei moso mapoo peleso Godeeyo howo woola tobodulone tou temeleeeso.

<sup>9</sup> Osoloso Godee ogo odoo ogo doloso domo badeli odoo oso dima kulodu odoo hee hesilame diayo yo odoo hu ma ee kobumeleso Sekalaya hesiaso. Esemе diayo Sekalaya yo Godeeyo tei moso ma kulodu sisigageli medee tekepo Godee mapoo gigaalagame hesiaso. Esemе Sekalayaye Yu odoowo tei moso mapoo peleso sisigageli medee tekepo gigalegemeleeeso.

<sup>10</sup> Esemе yayo sisigageli medee tekepo gigaalomolome, odoo susuga oso tei moso pee mapoo dobolone Godee mapoo takemeleeeso.

<sup>11</sup> Sekalaya yo tei moso ma kulodu osee bado-boome, Godeeyo momaiye oso sisigageli medee tekepo gigaligili dosulu deede dokolo mapoo peledoboloso tebidiso.

<sup>12</sup> Esemme Sekalayaye momaiye ogoloso dio dulone diya ebiaso.

<sup>13</sup> Esino Godeeyo momaiye oso yimapoo egeese takaso, “Sekalaya, no haga na ebi! Nayo Godee mapoo taka ee yayo olo duso. Nosobo Elisabet koowasi moodooloso giso holo soomagalaiso. Eseega nayo holope o hu Yonee hedi.

<sup>14</sup> Yayo namapoo goomoga tosbileiso. Osoloso yo soomagooga, odoo susuga oso goomogalaiso.

<sup>15</sup> Bei, yayo Godeeyo howo woola hu toowa toloso badalaiso. Osoloso yo yugune nalaimo. Esino oweeye yo soomagoo maga bei moologoloso Dio Tei oso kitulugu sabolo badalaiso.

<sup>16</sup> Osoloso yayo Isalael odoo see tobu dibada wiligi odoo Godee mapoo gilimado sibileiso.

<sup>17</sup> Yo Ilayaye kitulugu sabolo badebei egeesi masi badolone, Lodeeye sibilei mologa daga malalo yayo sibileiso. Osoloso yayo odoo susuga Lodeeye egee sibo goo omapoo mopoodoo dolone dobolone, ma dio sabolo owolo dio sabolo mesie goo mapoo gilimado sibileiso. Osoloso yayo Godeeyo to mapoo koo mesimo silesibili odoo dia goo goolee ee see Godeeyo howo woola tekepo goo talame dia goo goolee su wudileiso.”

<sup>18</sup> Esino Sekalayaye Godeeyo momaiye mapoo

egeesee takaso, “Ayo ogoogo ogoloso nayo egee takoo goo mapoo tei doloso ka gooleedalaiyo? Bei, a olo giso adaga osoloso mo sobo onosee sobo adaga,” diso.

<sup>19</sup> Godeeyo momaiye oso yimapoo nei egeesee takaso, “Mo hu ee Geibulu. A Godeeyo mudugiyopoo badeli. Ayo namapoo to tekepo hagee takalame, Godeeye a sibeye diso.

<sup>20</sup> Esino no dui! No to kelega poogoloso badalaise. Bei, nayo mo to mapoo koo tei to. Esiga no to kelega badoga, ayo namapoo taka goo hagoso peledabalai biame tugodoo omapoo ogoloso see to kalaiso,” diso.

<sup>21</sup> Sekalayaye tei moso ma kulodu badebei diya koodoowoome, odo aboso peegoo yo bolone dobolone egeesee takaga meleeso, “Yo ogoogo tamalabele?” diso.

<sup>22</sup> Sekalaya tei moso maga gasibilesa, to kelega tobudulone, wulo deeso edidi takaso. Esem odo susuga oso goo ee ogoloso gooleedooso, yo tei moso tegei ma kulodu badolone o howo opusomo deme, goo hee egeidoo, diso.

<sup>23</sup> Sekalayaye tei moso ma kulodu tou temelee biame ee koodobuloso, yo see o mi mapoo wedi diso.

<sup>24</sup> Osoloso hamamee Sekalayayo osobo Elisabet koowasi moodooloso badolone, a dee tiadoo ma kulodu Elisabeteeye o moso kuloduga peegoo gadile.

<sup>25</sup> Osoloso Elisabet eyo nediliyo egeesee gweliso, “Godeeye a pidiso, osoloso ayo deme

toboloso badolone odoo howo woola simili goo ee yayo amaga peegoo togobuguso,” deliso.

*Yesu soomagalai goo ee yebugu*

<sup>26-27</sup> Elisabet koowasi moodooloso badebei a 6 poogoloso badoboome, Godeeye o momaiye Geibulu sobo obuo Meli mapoo meiyee, diso. Meli yo Gelili mi toowa ma kulodu Nasalet mi pepooko mapoo badeli. Esino odoo hee Meli hulame badebeiso, o hu ee Yosep, yo Deibidi dio bala hedebe.

<sup>28</sup> Osoloso Godeeyo momaiye oso meilesa Meli mapoo egeesee takaso, “Emegei, Godeeye sobo no olo hesiaso. Osoloso Godeeye nobolo hodobo badoso,” dee takaso.

<sup>29</sup> Meli to hagee duloso goo tiademe, to hageeyo bei ee diya goolee meleeso.

<sup>30</sup> Esino Godeeyo momaiye oso Meli mapoo to nei egeesee takaso, “Meli, no haga na ebi. Bei, Godeeye namapoo diya goomogoso.

<sup>31</sup> No koowasi moodooloso giso holo soomagalaso. Osoloso nayo o hu Yesu hedi.

<sup>32</sup> Yayo hu toowa toloso badalaso. Osoloso yo Godeeyo owolo dalaso. Osoloso amawe Deibidiye wiligi toboloso badebei goo ee see wiligi odoo Godeeye yimapoo tenelaso.

<sup>33</sup> Esiga yayo Yekobowo bala ma kulodu wiligi toboloso badalaso. Osoloso yayo wiligi toboloso badoga hoo pagalai mauwe,” diso.

<sup>34</sup> Esem Meliye Godeeyo momaiye mapoo to nei egeesee takaso, “Goo hagee amapoo egeesee

kasee peledabalaiyo? A sobo obuo, esiga giso dia goo ee a gooleedele,” dee takaso.

<sup>35</sup> Esino Godeeyo momaiye oso yimapoo egeesee takaso, “Dio Tei oso namapoo sibileiso, osoloso Godeeye kitulugu oso no gagalaiso. Esiga nayo holope soomagalame egee see ee tei holo, osoloso yo Godeeyo owolo dalaiso.

<sup>36</sup> Esiga no dui! No nemisi Elisabet goolee. Yo sobo adaga poloso badolone deme toboloso badoso diso. Esino yo epedee koowasi badebei a 6 poogooso.

<sup>37</sup> Bei, Godeeye goo susuga ee moodoolai yo teiba,” diso.

<sup>38</sup> Meliye egeesee takaso, “A Godeeyo tou teli sobo. Esiga nayo amapoo taka goo ee amapoo moodoolai a goomogo,” diso. Esem Godeeyo momaiye oso Meli poogoo diso.

### *Meliye Elisabet agalame di*

<sup>39-40</sup> Osoloso biame omapoo Meli yo mopoodoo doloso Elisabet agalame saga diso. Yo Yudiya esia mapoo peleso, Sekalayaye badebei mi pepooko mapoo peledoboloso, see Sekalayayo mosopoo diso. Yo Sekalayayo mosopoo dilesos Elisabet ogoloso emegei di to takaso.

<sup>41</sup> Elisabet Meliye emegei di to taka du domo mapoo holope oso o beliye ma kuloduga dabaso. Osoloso Dio Tei oso Elisabet mapoo sibume, yo kitulugu tooso.

<sup>42</sup> Esem yayo to neligidi egeesee takaso, “Sobo susuga ma kulodu Godeeye namapoo diya

goomogolone, nama kulodu holope egee bado sabolo yimapoo diya goomogoso.

<sup>43</sup> A hu toowa too sobonee. Esino mo Lodeeyo oweeye a agalame simiso. Goo omapoo a diya goomogo.

<sup>44</sup> Esemе nayo amapoo emegei di to takeme, holope mo beliye ma kulodu badebei oso goomogolone dabaso.

<sup>45</sup> Godeeye namapoo peledabalai goo ee takeme duloso tei too maga, Godeeye namapoo goomoga tenelaiso,” diso.

*Meliye Godeeyo hu dokodoo poudoolone goomoga tenee*

<sup>46</sup> Osoloso Meliye egeesee takaso,  
“Mo sooloo ma kuloduga Godee mapoo goomoga to taka.

<sup>47</sup> Osoloso mo dio oso mo Godee mo gie badeli pidili mapoo goomogo.

<sup>48</sup> Bei, yayo o tou teli wuluge sobo a toowa doloso gooleeso.

Esiga epedee hamaga dulone odoosuga oso a Godeeye pidi sobo dalaiso.

<sup>49</sup> Bei, Kitulugu Godeeye amapoo goo toowa abo olo moodooso.

Yo tei.

<sup>50</sup> Edebeeyo Godee mapoo mesilone doga,  
Godeeye sooloo deli goo oso dimapoo kookaiyo osee malaiso.

<sup>51</sup> Osoloso yayo kitulugu oso goo toowa abo olo moodoogaso.

Osoloso yayo odoo dieso nediliyo tekepo doloso si howeli odoo ee peegoo hasiso buguso.

<sup>52</sup> Osoloso yayo wiligi odoo tebisa diayo wiligi dalame kitulugu too hu ee peegoo tabuguso.

Esino odoo dieso pepooko doloso debeli odoo ee pidilone, diba dokodoo poudooso.

<sup>53</sup> Osoloso yayo nei mauwe odoo ee bi tekepo oso pidiso.

Esino bi bei odoo ee mosoowe peegoo hasiso buguso.

<sup>54-55</sup> Osoloso yayo ibada amawe dio sabolo to kitulugu magoo ee dodolone o to mapoo mesimo silesibili Isalael odoo pidiso.

Esiga yayo sooloo deli goo oso Eibalaham sabolo osoloso amawe dimapoo kookaiyo moloso osee malaiso," diso.

<sup>56</sup> Meliye Elisabet dio badebei a bakadio hedebe di poogoloso see o mi mapoo wedi diso.

*Yonee odoo howo oluguli soomagoo*

<sup>57</sup> Elisabet damamee ti biame omapoo, yayo giso holo soomagooso.

<sup>58</sup> Godeeye Elisabet mapoo goo tekepo moodoo maga o soosoo sabolo, osoloso yima koola mapoo debeli odoo sabolo oso goo hagee duloso, goomoga hodobo Elisabet bolo poudooso.

<sup>59</sup> Osoloso giso holo soomagoloso abaga dino biame 8 mapoo diayo holope o kolo koolame

---

**1:52:** Job 12:19; 5:11; Psa 147:6      **1:53:** Psa 34:10      **1:54-55:**  
Gen 17:7; Psa 98:3; Mica 7:20      **1:59:** Gen 17:12; Lev 12:3; Luka  
2:21



mooloogoodooso. Osoloso diayo holope o hu amamo hu Sekalaya hedilame goomogaso.

<sup>60</sup> Esino owee Elisabeteeye egeesee takaso, “Haye, o hu Yonee hedilei,” diso.

<sup>61</sup> Esino diayo yimapoo egeesee takaso, “Yonee egee namawe dio eyo hunee,” diso.

<sup>62</sup> Osoloso diayo see holope eyo ama mapoo o hu odoo ugu hedileiyo doloso deeso edidi takaso.

<sup>63</sup> Esemé Sekalayaye holope eyo hu magalame odoo susuga mapoo dasogo sabolo homo kolo sabolo yimapoo tenee doloso deeso edidi takaso. Esemé yayo holope eyo hu egeesee magooso, o hu Yonee. Esemé odoo susuga oso goo hagee ogoloso dio diso.

<sup>64</sup> Esemé epedee omapoo Sekalaya to kelega poogoloso badebei see to kolone Godeeyo hu dokodoo poudoomo sileeso.

<sup>65</sup> Osoloso mi omapoo debeli odoo oso goo hagee ogoloso ebigaso. Osoloso Yudiya esia mapoo debeli odoo susuga oso goo hagee duloso to kesameleeso.

<sup>66</sup> Osoloso goo hagee duli odoo oso goolone egeesee woosaso, “Holope hagee odoo kasi masi badobomobele,” diso. Bei, diba egeiso, Godeeye kitulugu oso yibolo molome.

*Sekalayaye Godeeyo hu dokodoo poudoolone goomoga tenee*

<sup>67</sup> Yoneeyo ama Sekalayaye Dio Tei oso kitulugu toloso badolone malalo hoogoo peledabalai Godeeyo to ee yayo malalo egeesee takaso,

<sup>68</sup> “Isalael odoo dia wiligi odoo Godeeyo hu dokodoo poude!

- Bei, yayo sibilesa o odoos ee eyo gilimadalame neiso tooso.
- 69 Osolosoo Godeeyo tooseli odoos Deibidiyo bala ee ma kuloduga gie badeli pidili odoos kitulugu toowa imapoo olo teneeso.
- 70 Daga hoogoo Godeeye goos hagee o howo woola todolosoo dobolone Godee maga to tolosoo kokodoo takomoo sili odoos oso imapoo olo takasoo.
- 71 Esiga imapoo ha tooseli odoos osolosoo imapoo hegili odoos oso kitulugu ee ma kuloduga Godeeye iba peegoo gilimado dileiso.
- 72-73 Osolosoo Godeeye ibada amawe dio sooloo dolone pidileiso disoo.  
Osolosoo yayo Eibalaham dio to kitulugu magoo ee osee goolee malaisoo disoo.
- 74 Esiga Godeeye imapoo ha tooseli odoos ma kuloduga gilimadolosoo peegoo dileiso, iyo Godeeyo toosetolone dobolone ebia goos mauwe poogolosoo dabalame.
- 75 Esiga iyo debei ma kulodoo Godeeyo howo woola tekepo dobolone todolone dabalai tekepo.
- 76 Esino mo holo, no odoos susuga oso dokodoo badeli Godee maga to tolosoo kokodoo takomoo sili odoos dalaisoo.  
Bei, Lodee sibilega badoga, daga malaloo nayo dileeso yayo sibilei goos mapoo odoos mopoodoo dalame gu takala dileiso.
- 77 Nayo o odoos gie badeli pidilei goos ee eligileiso.

Goo ee dibada goo tokenee hapooga, gie badeli talaiso.

<sup>78</sup> Godeeye iba sooloo dolone diya goolee moloso. Esiga Kei mi ma dokodooga yayo hudi magoo odoo oso mi gie hadobuoga osokoso egee pouno egeese masi imapoo sibileiso.

<sup>79</sup> Godeeye hudi magoo odoo hagoso teli mapoo dili eli omapoo egee do sabolo osoloso neliga ma kulodu egee do odoo dimapoo pounileiso.

Osoloso yayo iba gilimado dileiso, Godee sabolo mesie dabalame,” diso.

<sup>80</sup> Yonee kauwulone o dio oso kitulugu sabolo badebeiso. Yo miwe poogoo mi mapoo bado-boso biame oso sibume, Isalael odoo dimapoo to tekepo takalame simiso.

## 2

### *Yesu soomagoo (Mat 1:18-25)*

<sup>1</sup> Biame omapoo Sisa-Ogastas yayo Loum odoo dia wiligi odoo toboloso badolone, odoo susuga eyo hu booka mapoo magalame tei magooso.

<sup>2</sup> Hu tomo di hagee hu telega moloso Kuliniyos yayo Siliya mi mapoo wiligi odoo toboloso badolone daga bei ka mooloogoo.

<sup>3</sup> Esemé odoo susuga dibada midée mapoo dia hu magalame diyadeeso.

<sup>4</sup> Yosep hagee Deibidiyo amawe. Esiga yo Gelili mi ee ma kulodu mi hee Nasalet maga, see Yudiya mi mapoo mi hee Betilhem mapoo o hu

magalame palaso. Bei, Betilihem mi egee Deibidi o soosoo dibada midee.

<sup>5</sup> Yo Meli hulame dadagoloso dia hu magalame palaso. Esino Meli yo olo koowasi moodooloso badebeiso.

<sup>6</sup> Diba Betilihem mi mapoo dileso peledoboloso omapoo doboome, Meli damamee tiso.

<sup>7</sup> Osoloso yayo holope daga malalo giso holo soomagooso. Holope soomagoloso dugoso tiadoloso gala hu nei nedili moso tegei eyo kulodu howogi masi mapoo tiediso. Bei, odoosoo oso sibilesotieli moso ee ma kulodu debi mauwe neme.

*Sipi be bali odoososo Yesu soomagoo goo ee du*

<sup>8</sup> Yesu soomagoo gesi omapoo sipi be bali oso Betilihem mi koola mapoo dibada sipi be balaga meleeso.

<sup>9</sup> Esemegodeeyo momaiye oso saga epedee omapoo dimapoo sibilesopeledabaso. Osoloso Godee yayo toowa dolosobadeli goo omaga o gadeebugusodiba teme, diya ebigaso.

<sup>10</sup> Esinomomaiyeso dimapoo egeesee takaso, “Niba haga na ebi. Bei, odoosusuga oso goomogalame ayo nimapoo to tekepo tosiba.

<sup>11</sup> Epei Deibidiyo mi mapoo odoosusuga eyo gie badeli pidilei holope ee soomagooso. Yo Keliso Lodee.

<sup>12</sup> Yodugoso tiadoloso gala hu nei nedili howogi masi mapoo tiamologa ogoloso gooleedalaiso,” dee takaso.

<sup>13</sup> Osoloso epedee saga omapoo momaiye mooloogoodoo toowa oso Kei mi magasibilesomomaiye daga malalo simi sabolo hodobo

mooloogoodooso. Osoloso momaiye susuga oso Godeeyo hu dokodoo poudoolone egeesee takaso,  
 14 “Kei mi ma dokodoo badeli Godee mapoo goomoga poude!

Osoloso mipoo hamapoo Godeeye goomoga odoo dimapoo mesie goo oso mele dee,” diso.

15 Osoloso momaiye susuga oso diba poogoloso Kei mi ma dokodoo see wedi paladeeso. Esem sipi be bali odoo oso dieso nediliyo egeesee takaso, “Iba Betilihem mi mapoo Godeeye imapoo taka goo ee peledaba beleso agalame dimo,” diso.

16 Esem diba saga dileso egeino, Meli dio Yosep dio holope gala hu nei nedili howogi masi mapoo tiedi molome egeiso.

17 Osoloso diba dileso holope ogoloso momaiyeso holopeyo goo dimapoo taka ee see diayo odoo abo omapoo debei mapoo takaso.

18 Esem sipi be bali odoo oso holope eyo goo takeme duloso odoo susuga diya howoogadooso.

19 Esino Meli yo goo hagee duloso biame susuga ma kulodu boobado bigilega osee goolee meleeso.

20 Esem sipi be bali odoo diba see wedi dulone, diayo du goo sabolo osoloso diayo egei goo omaga Godee mapoo goomoga toowa poudooso. Bei, diayo egei goo susuga ee momaiyeso taka goo sabolo teibaneme.

*Yesu yo tei moso mapoo ido pala*

21 Osoloso holope soomagoloso abaga dino biame 8 mapoo o kolo kooso. Osoloso yo Yesu

hediso. Bei, daga yo Meliyo beliye ma kulodu mauwe mapoo momaiyeso hu hagee olo hediso.

<sup>22-24</sup> Meli dio Yosep dio Moseseeye tei magoo ee dodolone Godeeyo howo woola tokenee mauwe dabalame, mopoodoo doo biame koodobuloso, diayo Yesu idoloso Yelusalem mi mapoo diso. Osoloso diba Yu odoowo tei moso mapoo peleso, diba see Godeeyo howo woola tokenee mauwe dabalame, só bakadio wooloso Godee mapoo teneeso. Bei, Godee o tei magoo oso egeesee takooso, “Niba molo bakadio o, wi pepooko bakadio wooloso amapoo tenee,” deeso. Osoloso diba tei moso tegei mapoo peleso, Yesu see Godee mapoo teneeso. Bei, Godee o tei magoo oso egeesee takooso, “Malalo soolooga magoo giso holo susuga Godee mapoo tenee,” deeso.\*

<sup>25</sup> Biame omapoo Yelusalem mi mapoo adaga hee badebeiso, o hu Simiyon. Yo Godeeyo howo woola tekepo doloso badolone, hedebe Godeeno diya goolee sabolo badeliso. Esino yayo Godeeye Isalael odo mapoo hegi goo melee ee togob-igilame biame oso sibilei ee bolone bameleeso. Osoloso Dio Tei oso yibolo badebeiso.

<sup>26</sup> Esino yo adaga poloso telega badolone, Godeeye hesia Keliso yo agalai goo ee Dio Tei oso yimapoo olo takaso.

---

**2:22-24:** Exo 13:2, 12; Lev 12:1-8      \* **2:22-24:** Yu soboso Moseseeye tei magoo ee dodolone giso holo soomagooga, yo biame 40 ee ma kulodu kee koododilega, o moso mapoo obusomo badeliso. Osoloso biame oso koodobuuga, see kee koododilame, Yu odo dia tei moso mapoo dilesa Godee mapoo emegei di bi teneliso.

<sup>27</sup> Osoloso Dio Tei oso Simiyon yo tei moso tegei mapoo ido diso. Osoloso Meli dio Yosep dio oso tei magoo ee dadalame holope Yesu yo tei moso mapoo ido palaso.

<sup>28</sup> Esem e adaga Simiyoneeye Yesu ogoloso maduloso Godee mapoo gomogolone to egeesee takaso,

<sup>29</sup> “Godee nayo takolone a Keliso ogoloso ka talai diso.

Esiga epei nee tou teli odoo ayo mesie sabolo talai tekepo.

<sup>30-31</sup> Bei, mo howoso gie badeli pidili odoo ee nayo odoo susuga mapoo tenee a egeiso.

<sup>32</sup> Yo gadeebugu, Yu odoonee dimapoo Godeeyo goo ee yilige bigilame.

Osoloso yimaga nee Isalael odoo diba dokodoo poudileiso,” diso.

<sup>33</sup> Yesuwo ama dio owee dio Simiyoneeye taka to duloso diya howogadooso.

<sup>34</sup> Osoloso Simiyoneeye Godeeye diba pidilame takoloso Meli mapoo egeesee takaso, “Godeeye holope hagee hesiaso, Isalael odoo aboso holope hagee gowooga, Godeeye diba pepooko dalame. Osoloso odoo aboso holope hamapoo tei toga, Godeeye diba dokodoo poudileiso. Esiga odoo aboso o goo talai gowoolone yimapoo ha talaiso.

<sup>35</sup> Goo egeesi maga dibada sooloo ma kulodu egee molo goo ee woola yilige bigileiso. Osoloso goohele goo oso nee sooloo mapoo kaiyaso heleegee masi halagalaiso,” diso.

---

**2:30-31:** Isa 52:10; Luka 3:6; Tait 2:11      **2:32:** Isa 42:6; 49:6; 52:10

**2:34:** Isa 8:14; Mat 21:42; 1Pita 2:8

<sup>36</sup> Osoloso domo omapoo Godee maga to toloso kokodo takomo sili sobo hee tei moso tegei ma kulodu badebeiso, o hu Ana. Sobo yo o bala Asel. Osoloso amamo hu Panuwel. Yo sobo adaga poloso badebeiso. Yo daga gisoso huloso dugo 7 ma kulodu omobolo badoboso, omo taso.

<sup>37</sup> Esemе yayo badebei dugo 84 poogoloso, omapoo yo bau osee badebeiso. Yo biame susuga tei moso tegei mapoo howo gisimo silone, biame sabolo osoloso gesi sabolo Godeeyo hu dokodoo poudoolone nei tei yuloso badolone Godee mapoo takemeleeso.

<sup>38</sup> Osoloso Simiyoneeye Meli dio Yosep dio to kesamolome, yo domo omapoo simiso. Yo sibilesо Godee mapoo goomoga to takaso. Osoloso Yelusalem mi eyo hegi goo ee ma kuloduga gilimadoloso peegoo dilame balagamelee odoo dimapoo Yesuwo goo takaso.

<sup>39</sup> Yosep dio Meli dio Godeeye taka tei goo susuga toloso koodobuloso, see Gelili mi ee ma kulodu dia midee Nasalet mapoo wedi diso.

<sup>40</sup> Osoloso holope oso kitulugu sabolo kauwuloso goo goolee medee tekepo yimapoo meleeso. Osoloso Godeeye yo sooloo dolone pidimeleeso.

*Yesu yo pepooko mapoo tei moso mapoo peleso badebei*

<sup>41</sup> Dugo susuga ma kulodu biame hedebe mapoo Yesuwo owee dio ama dio Yelusalem mapoo Godeeye gababia wo nalame diliso.



<sup>42</sup> Osoloso dugo hee mapoo diba see gababia wo nalame dime, Yesu yo dibolo diso. Biame domo omaga Yesu o dugo 12.

<sup>43</sup> Gababia wo ne biame koodobume, diba see wedi diso. Esino Yesu yo dibolo dilega, Yelusalem mapoo badebeiso. Yesuye Yelusalem mapoo badebei owee dio ama dio gooleedele.

<sup>44</sup> Esino ama dio owee dio goolee, Yesu odo abo sabolo malalo di bele dolone, diba nosee diso. Diba dileso eli domopoo tilame dobolone, diayo dia soosoo ma kulodu osoloso dia odo ma kulodu Yesu esiaso.

<sup>45</sup> Diba omapoo Yesu esiamaleso koo egeme, see Yelusalem mapoo Yesu esilame wedi diso.

<sup>46</sup> Osoloso biame bakadio hedebe di poogoloso hamamee diayo Yesu Yu odo dia tei moso mapoo Yu odoowo tei eligili odo abo sabolo to kolone doboome egeiso. Ee ma kulodu Yesuye tei eligili odo oso eligi goo ee dulone badolone, yayo nei dimapoo woosa demeleeeso.

<sup>47</sup> Osoloso nei tei eligili odo oso woosa to eyo nei dimapoo medee tekepo wedi di duloso, osoloso o goo goolee tekepo ogoloso odo susuga oso diya howoogadooso.

<sup>48</sup> Yesuwo owee dio ama dio oso Yesuye tei eligili odo sabolo to kolone badoboome ogoloso dio diso. Esemeweeye egeese takaso, “Mo holo, nayo kasalame goo egeesee imapoo ka moodoowo? Nama asalo no esiamo silone diya kukuda sabolo sileeso,” diso.

<sup>49</sup> Esino Yesuye nei dimapoo egeese takaso, “Niyo kasalame a ka esiamo sileeyo? Ayo mo mayo moso mapoo badalai goo ee niba gooleede-

leyo?” diso.

<sup>50</sup> Esino Yesuye taka to eyo bei diba medee kibiya gooleedele.

<sup>51</sup> Osoloso Yesu see dibolo hodobo Nasalet mapoo wedi diso. Osoloso omapoo badolone, dibada to mapoo mesimo sileeso. Esino Meliye goo susuga hagee biame susuga osee goolee sabolo badebeiso.

<sup>52</sup> Yesu yo kauwulone goo goolee tekepo sabolo kauwaso. Esem Godee sabolo osoloso odoo sabolo oso yimapoo diya goomegeliso.

### 3

*Yonee odoo howo oluguli oso to taka  
(Mat 3:1-12; Maka 1:1-8; Yon 1:19-28)*

<sup>1</sup> Sisa-Taibiliyeseeye Loum wiligi toboloso badebei dugo 15 poogoloso, odoo abo hagee bia oso yima hemi wiligi tebisaloso debeiso. Pontiyus-Paileteeye Yudiya mi bameleeso, osoloso Helodeeye Gelili mi bameleeso, osoloso omolo Pilipiye Ituliya mi sabolo Talakonitis mi sabolo bameleeso. Osoloso Lisaniyaseeye Abilene mi bameleeso.

<sup>2</sup> Osoloso Anas dio Kayapas dio Yu odoo dia tei moso wiligi toboloso debeiso. Biame omapoo Sekalayayo owolo Yonee miwe poogoo mi mapoo badoboome, Godeeye o to yimapoo teneeso.

<sup>3</sup> Esem yayo dileso Yoden howo koola ogolone debeli mi mapoo Godeeyo to takomo silone, odoo susuga mapoo egeese takomo sileeso, “Nibada

tokenee mapoo miligi pialoso howo ogusige. Es-eega Godeeye nibada tokenee hapoloso boobado bigileiso,” dee takemeleeso.

<sup>4</sup> Goo hagee Godee maga to toloso kokodo takomo sili odoo Aisayaye o booka mapoo hogugu to sabolo tobuoso. Bei, yayo o booka mapoo hageesee hoguguso,

“Miwe poogoo mi omaga edebeeyo egeesee idagoo,

‘Lodee yayo sibilei eli moodee,  
osoloso medee hoodo magee.

<sup>5</sup> Osoloso mi godobia mologa, omapoo mi abo kuge.

Osoloso eli mapoo esia mologa, esia egee gebese.

Osoloso eli halaga medee hoodo magee.

Osoloso eli tokenee medee moodee.

<sup>6</sup> Eseega odoo susuga oso gie badeli pidili Godee maga simi agalaiso,’ diso.”

<sup>7</sup> Odoo mooloogoodoo Yoneeye diba howo ogusigilame sibateme, yayo dimapoo egeesee takaso, “Niba hebise, nimapoo odoo agayo takolone howo ogusiga goo oso Godeeye kamana goo egee sibo maga mada pia dabalaiso, dee ka takana?

<sup>8</sup> Esiga niyo debei goo maga nibada goo tokenee mapoo tei miligi pia goo ee eligi. Osoloso niba niso nediliyo iba Eibalahameeyo amawe dioga, Godeeye kamana maga mada pia dabalaiso dee na goolee. Bei, ayo nimapoo taka. Godee yimapoo

kitulugu moloso, yo hagoso see Eibalahameeyo amawe dio palai.

<sup>9</sup> Esiga kabee homo bei mapoo olo magoo moloso. Esiga homo kaso ko tekepo pel-ega mologa, homo egee holoso dou mapoo toodalaiso,” diso.

<sup>10</sup> Esemé odoo susuga Yoneeye taka to ee dulo-oso nei egeesee takaso, “Egeeseeega iba ogoo goo moodoolaisomo?” diso.

<sup>11</sup> Esemé Yoneeye nei dimapoo egeesee takaso, “Namapoo sedi bakadio mologa, nee odoo sedi me daga, hee yimapoo tenee. Osoloso namapoo nei mologa, nee odoo hee nei me daga, abo yimapoo tenee.”

<sup>12</sup> Osoloso tekisi molee misigeli odoo abo diba nosee howo ogusigilame sibilesi Yonee mapoo egeesee takaso, “Eligili odoo, iba ogoo goo moodoolaisomo?” diso.

<sup>13</sup> Esemé Yoneeye nei egeesee takaso, “Niyo odoo mapoo tekisi molee misigaga, hodio niyo talai ee goolone tekisi molee magalame tobuloso magoo ee na dagapele. Esino hedebe teiba ono odoo mapoo ka misige,” diso.

<sup>14</sup> Osoloso ha teli odoo aboso Yonee mapoo egeesee takaso, “Iba nosee ogoo goo moodoolai-somo?” diso.

Esemé Yoneeye nei dimapoo egeesee takaso, “Niyo emegei dia molee heli talame na seesee. Osoloso emegei dia molee heli talame dimaga gamenee goo na takee. Esino hedebe niso tou too eyo nei molee ee tolone goomoga sabolo ka debee,” diso.

<sup>15</sup> Odoo susuga oso Keliso bolone debei mapoo Yoneeye simi ogoloso, diayo goolee yo Keliso bele dee gooleeso.

<sup>16</sup> Esememe nei Yoneeye dimapoo egeese takaso, “Ayo niba howodeeso oluguliso. Esino odoo hee ama hamamee egee sibo yayo kitulugu oso ayo kitulugu dagadi. Esiga ayo o homo beiyopoo gauwuloso o homo bi ee pidigilei a tebile. Osoloso yayo Dio Tei nima kulodu tenelaiso. Esino yayo yimapoo tei tele poogoo odoo ee dou mapoo toodalaiso.

<sup>17</sup> Yayo witi wo ko sabolo osoloso so ee pilame o tou teli bi sabolo mopoodoo doloso badoso. Osoloso witi wo ko ee moso mapoo kukuleiso. Osoloso witi wo so dou koo semili mapoo toodalaiso,” diso.

<sup>18</sup> Yoneeye to tekepo ee eli opusomo opusomo di maga odoo Godee mapoo gilimado sibilame, Godeeyo to tekepo takomo siliso.

<sup>19</sup> Esino Gelili mi eyo wiligi odoo taba Helodeeye goo tokenee tooso. Goo ee omolo osee bado-boome, yayo omolowo osobo Helodiyes peedee huso. Esememe Yoneeye goo hagee ogoloso yimapoo diya takolone o tokenee goo abo sabolo yilige buguso.

<sup>20</sup> Esememe hamamee Helodee komonolone yo tokenee hee toowa tooso. Goo ee yayo Yonee neliga moso ma kulodu husooso.

*Yesu howo olugu  
(Mat 3:13-17; Maka 1:9-11)*

<sup>21</sup> Biame Yoneeye odoo howo ogusigamelee domo mapoo, Yesu yinosee howo oluguso. Yesu howo oluguloso gasibileso tobudulone Godee mapoo takomolome Kei mi osulu yamagooso.

<sup>22</sup> Esemé Dio Tei oso molo masi pusibileso yimapoo pubalagaso. Osoloso Kei mi ma dokodooga toso egeese takaso, “No ayo gooma mo holo noso, a namapoo diya goomogo,” diso.

*Yesuwo amawe diowo hu  
(Mat 1:1-17)*

<sup>23</sup> Yesu yo dugo 30 domo mapoo badolone, o tou bei mooloogooso. Odoo susuga oso Yosepeeyo owolo gweliso.

Yosep yo Heliyo owolo.

<sup>24</sup> Heli yo Matateeyo owolo.

Matat yo Libaiyo owolo.

Libai yo Melkiyo owolo.

Melki yo Yanaiyo owolo.

Yanai yo Yosepeeyo owolo.

<sup>25</sup> Yosep yo Matatiyaseeyo owolo.

Matatiyas yo Amoseeyo owolo.

Amos yo Nahumeeyo owolo.

Nahum yo Esliyo owolo.

Esli yo Nagaiyo owolo.

<sup>26</sup> Nagai yo Mateeyo owolo.

Mat yo Matatiyaseeyo owolo.

Matatiyas yo Semeineeyo owolo.

Semein yo Yosekeeyo owolo.

Yosek yo Yodayo owolo.

<sup>27</sup> Yoda yo Yohanayo owolo.

Yohana yo Lesayo owolo.

Lesá yo Selubabeleeyo owolo.  
 Selubabel yo Selatiyeleeyo owolo.  
 Selatiyel yo Neliyo owolo.

<sup>28</sup> Neli yo Melkiyo owolo.

Melki yo Adiyó owolo.

Adi yo Kosameeyo owolo.

Kosam yo Elamadameeyo owolo.

Elamadam yo Eleeyo owolo.

<sup>29</sup> El yo Yosuwáyo owolo.

Yosuwa yo Eliyeseleeyo owolo.

Eliyesel yo Yolimeeyo owolo.

Yolim yo Matateeyo owolo.

Matat yo Libaiyo owolo.

<sup>30</sup> Libai yo Simiyoneeyo owolo.

Simiyon yo Yudáyo owolo.

Yuda yo Yosepeeyo owolo.

Yosep yo Yonameeyo owolo.

Yonam yo Eliyakimeeyo owolo.

<sup>31</sup> Eliyakim yo Meleyáyo owolo.

Meleya yo Menáyo owolo.

Mena yo Matatáyo owolo

Matata yo Neiteneeyo owolo.

Neiten yo Deibidiyo owolo.

<sup>32</sup> Deibidi yo Yesiyo owolo.

Yesi yo Obedeeyo owolo.

Obed yo Bowaseeyo owolo.

Bowas yo Salmoneeyo owolo.

Salmon yo Nasoneeyo owolo.

<sup>33</sup> Nason yo Aminadabeeyo owolo.

Aminadab yo Adimineeyo owolo.

Adimin yo Aliniyo owolo.

Alini yo Hesloneeyo owolo.  
 Heslon yo Peleseeyo owolo.  
 Peles yo Yudayo owolo.  
<sup>34</sup> Yuda yo Yekobeeyo owolo.  
 Yekob yo Aisekeeyo owolo.  
 Aisek yo Eibalahameeyo owolo.  
 Eibalaham yo Telayo owolo.  
 Tela yo Naholeeyo owolo.  
<sup>35</sup> Nahol yo Selugeeyo owolo.  
 Selug yo Lewuyo owolo.  
 Lewu yo Pelegeeyo owolo.  
 Peleg yo Ebeleeyo owolo.  
 Ebel yo Selayo owolo.  
<sup>36</sup> Sela yo Keinaneeyo owolo.  
 Keinan yo Alapakasadeeyo owolo.  
 Alapakasad yo Semeeyo owolo.  
 Sem yo Nowayo owolo.  
 Nowa yo Lamekeeyo owolo.  
<sup>37</sup> Lamek yo Metuselayo owolo.  
 Metusela yo Inokeeyo owolo.  
 Inok yo Yeledeeyo owolo.  
 Yeled yo Mahalaleleeyo owolo.  
 Mahalalel yo Kenaneeyo owolo.  
<sup>38</sup> Kenan yo Enoseeyo owolo.  
 Enos yo Seteeyo owolo.  
 Set yo Adameeyo owolo.  
 Adam yo Godeeyo owolo.

## 4

*Saitenso Yesu kukulo egei*  
*(Mat 4:1-11; Maka 1:12-13)*



<sup>1</sup> Yesu yo Yoden howo mapoo Yoneeye howo oluguloso, Yesu Dio Tei oso kitulugu toloso yo miwe poogoo mi mapoo Dio Tei oso ido diso.

<sup>2</sup> Yesu miwe poogoo mi mapoo biame 40 ee ma kulodu nei nelega badoboome, Saitenso yo kukulo ogo demeleeso. Osoloso biame 40 poogoloso hamamee Yesu yo diya hodiaso.

<sup>3</sup> Esemee Saitenso ogoloso yimapoo egeesee takaso, “No tei Godeeyo owolo daga, nayo yo hagoso see wo pe dee takee,” diso.

<sup>4</sup> Esemee Yesuye nei egeesee takaso, “Godeeyo to booka mapoo hogugu oso egeesee takooso, ‘Edebeeyo hedebe nei nolone badoga oso gie badeli talaime,’” diso.

<sup>5</sup> Esemee see Saitenso Yesu idoloso mubi dokodoo ido palaso. Esemee saga omapoo Saitenso mi edebeeyo bia susuga yimapoo eligiso.

<sup>6-7</sup> Osoloso yayo Yesu mapoo egeesee takaso, “Daga Godeeye bi susuga hagee amapoo teneme, ayo bamo simiso. Esiga nayo amapoo gasuwoloso a dokodoo poudoga, mi susuga hagee sabolo, osoloso bi susuga ee ma kulodu egee molo sabolo, ayo namapoo tenelaiso. Bei, amapoo kitulugu moloso, odoo hee mapoo tenelai,” diso.

<sup>8</sup> Esemee Yesuye Saiten mapoo nei egeesee takaso, “Godeeyo to booka mapoo hogugu oso egeesee takooso,

‘Nayo hedebe nee wiligi odoo Godee mapoo gauwuloso yo dokodoo poude. Osoloso hedebe o to mapoo mesie,’” diso.

<sup>9</sup> Osoloso see tobu Saitenso Yesu idoloso Yelusalem mapoo diso. Osoloso tei moso tegei

omu ma dokodoo ido peleso tobudume yimapoo egeesee takaso, “No tei Godeeyo owolo daga, no moso omu ma dokodooga miyomoo bologobigi.

<sup>10</sup> Bei, Godeeyo to booka mapoo hogugu oso egeesee takooso,

‘Godeeye o momaiye mapoo no medee bamelee dee takaso.

<sup>11</sup> Esiga diayo no dia deeso douguleiso, no yo mapoo homodobiyaga,’” diso.

<sup>12</sup> Esino Yesuye egeesee takaso, “Godeeyo to booka mapoo hogugu oso egeesee takooso,

‘Nee wiligi odoo Godee oso kitulugu ee hoodo agalame yimapoo na kukulo ege,’” diso.

<sup>13</sup> Saitenso Yesu kukulo ogomo silee koodobuloso yo see tobu kukulo agalame biame tekepo ee bolone Yesu epedee poogoloso diso.

*Yesuye Gelili mapoo o tou bei mooloogoo*

*(Mat 13:53-58; Maka 6:1-6)*

<sup>14</sup> Yesu Dio Tei oso kitulugu sabolo Gelili mapoo wedi diso. Osoloso Gelili mi toowa ee ma kulodu odoo susuga oso Yesuwo goo dudobuguso.

<sup>15</sup> Yayo Yu odoowo howo gisili moso susuga mapoo eligimo sileeme, odoo susuga oso yimapoo goomegeliso.

<sup>16</sup> Biame heeso Yesu eyo yo kauwa o midee Nasalet mapoo diso. Osoloso Yu odoo oso hasali biame mapoo Yesu eyo seli egeesee solone, yo howo gisili moso mapoo palaso. Osoloso yo Godeeyo to booka mapoo hogugu ee hesigilame tabaso.

<sup>17</sup> Osoloso Godee maga to toloso kokodo takomo sili odoos Aisayaye hogugu booka ee yimapoo teneeso. Yo booka toloso piligamo abaga dino to hogugu domo ee ogoloso, to hagee hesigaso,

<sup>18</sup> “Godeeyo dio abolo hodobo badoso.

Bei, yayo a hesiaso, to tekepo bi mauwe odoos mapoo takalame.

Osoloso Godeeye a diye diso,

neliga moso ma kulodu debeli odoos mapoo yayo diba peegoo gilimado dileiso dee takalame.

Osoloso howo siliga odoos see agalaiso dee takalame.

Osoloso Godeeye a diye diso,

edebeeyo hegili odoos hegi goo ma kuloduga ayo peegoo gilimado dilame.

<sup>19</sup> Osoloso Godeeye a diye diso, ayo Lodeeye o odoos mapoo goo tekepo moodoolai biame oso egee sibo goo ee odoos mapoo eligilame.”

<sup>20</sup> Yesu booka hesigamelee koodobuloso, see booka bali odoos omapoo teneloso biaso. Esemee odoos susuga moso ee ma kulodu debei oso howoso medee kitulugu sabolo yimapoo bologolone debeiso.

<sup>21</sup> Osoloso yayo dimapoo egeesee takaso, “Niyo Godeeyo to hogugu booka maga takeme du goo oso nimapoo epei olo simiso,” diso.

<sup>22</sup> Esemee o to du odoos susuga oso yo tekepo odoos doloso, yayo to taka susuga ee tekepo diso. Diayo egeesee takoloso, see egeesee takaga meleeso, “Iba gooleedooso yo Yosepeeyo

owoloso. Egesino yayo kaseme to tekepo egeesee ka takayo?” dee takaga meleeso.

<sup>23</sup> Yesuye see dimapoo egeesee takaso, “A gooleedooso, niyo goo hamaga amapoo takalaiso, ‘Melesenee neli odo, no no nediliyo tekepo moodee. Osoloso nayo Kapeniyum mi mapoo goo mudu opusomo di moodoogamelee see nee midee hamapoo moodee,’ dee takalai malaiso,” diso.

<sup>24</sup> Esino Yesuye see dimapoo egeesee takaso, “Ayo nimapoo taka, Godee maga to toloso kokodo takomo sili odo yo o mosobia oso gowoolaiso.

<sup>25</sup> Esiga niba susuga dui. Ilayaye badebei biame omapoo mi toowa kibaso. Osoloso dugo bakadio hedebe osoloso a 6 ma kulodu howo sibilega nei mauwe badebeiso. Ee ma kulodu Isalael mi mapoo sobo bauwe debeiso.

<sup>26</sup> Esino ee ma kulodu Godeeye Ilayaye diba pidiye doloso yimapoo takele. Esino yo Ilayaye wulo Yu dele poogoo sobo Saidon mi ma kulodu mi hee Salipat mi mapoo badeli sobo bau ono pidilame diye diso.

<sup>27</sup> Osoloso Ilaisaye badebei biame omapoo, Isalael mi omapoo kolo tokenee odo bei debeiso. Esino Ilaisaye odo egee bia yayo pidile. Esino yayo Yu odoonee o hu Naman, Siliya mi mapoo badeli odo ono tekepo moodooso,” diso.

<sup>28</sup> Esem odo howo gisili moso mapoo debei oso to hagee duloso diya kamanagaso.

<sup>29</sup> Esem diba tebisaloso Yesu toloso mosobia pee mapoo esia goosoo mapoo halagasalame ido diso.

<sup>30</sup> Esino Yesu odoo mooloogoodoo ee ma kulduga peegoo diso.

*Odoo bo holo pala*

*(Maka 1:21-28)*

<sup>31</sup> Osoloso Yesu Gelili mi toowa ma kulodu mi hee Kapeniyum mapoo diso. Yo omapoo dileso badolone Yu odoo oso hasali biame heeso yayo howo gisili moso ma kulodu Godeeyo to eligimeleeso.

<sup>32</sup> Esem e odoo susuga oso yayo eligi duloso diya howoogadooso. Bei, yayo diya kitulugu sabolo eligime.

<sup>33</sup> Howo gisili moso ma kulodu odoo bo holo pala hee omapoo badebeiso. Yayo to neligidi Yesu mapoo egeesee takaso,

<sup>34</sup> “Hei, Yesu Nasalet odoo, nayo imapoo ogoogo moodoolame ka simiyo? Nayo iba tokenee palame ka simiyo? Esiga no iba poogoloso di. Bei, a gooleedoo no Godeeye hesia odoo oso,” diso.

<sup>35</sup> Esem e Yesuye to kitulugu sabolo bo holo mapoo egeesee takaso, “No to koodobuloso odoo ma kuloduga peegoo di,” diso. Yesuye egeesee takeme, bo holo oso peegoo poogolone odoo egee odoo howo woola miyomoo homodobuloso molone yimaga peegoo diyadeeso. Esino bo holo oso yimaga peegoo dulone yimapoo dala hee tenele.

<sup>36</sup> Esem e odoo susuga oso goo hagee ogoloso howoogadolone egeesee takaga meleeso, “Yayo taka goo ee kasiyo? Bei, yayo to kitulugu sabolo bo holo mapoo takooga diba o to mapoo mesiloso peegoo dilidoo,” dee takaga meleeso.

<sup>37</sup> Esemé odoo susuga oso goo hagee ogoloso mosobia susuga koola mapoo debeli mapoo takomo diyadeeso.

*Yesuye odoo paigiga tekepo moodoo  
(Mat 8:14-17; Maka 1:29-34)*

<sup>38</sup> Yesu howo gisili moso maga see Saimonowo mosopoo diso. Moso ee ma kulodu sobo Saimonowo nalobo pailone kolo diya dei moodoome tiameleeso. Esemé odoo susuga oso yo Yesuye tekepo moodoolame Yesu mapoo o goo takaso.

<sup>39</sup> Esemé Yesuye sibilesó yayo tiamelee koola mapoo gauwuloso badolone paiye mapoo egeesee takaso, “Yo poogoloso di,” diso. Esemé paiye saga weidooso. Esemé yayo toboloso nei toloso dimapoo piso.

<sup>40</sup> Esemé osoko todobume odoo susuga oso odoo paigiga susuga Yesu mapoo gilimado sibadeeso. Esemé yayo o deeso odoo paigiga susuga sigime wegigadooso.

<sup>41</sup> Esemé Yesuye odoo bo holo paladee tekepo moodoogoome bo holo oso peegoo dulone to neligidi takolone egeesee takaso, “No Godeeyo owoloso,” dee takaga meleeso. Esino Yesuye to kitulugu sabolo dimapoo egeesee takaso, “Niba to na ke,” diso. Bei, bo holo oso Yesu yo Godeeye hesia Keliso doloso diba gooleedooso.

<sup>42</sup> Gesikolodee mi hadobilega, Yesu tia maga hogabuloso odoo koola mauwe mi mapoo diso. Esino odoo susuga oso egeino yo me neme yima hamamee yo esiamo silesibiso. Diba Yesu esiamo

silesiboso yo ogoloso yimapoo egeesee takaso, “No iba na poogoo di,” diso.

<sup>43</sup> Esino Yesuye dimapoo egeesee takaso, “A mi abo mapoo Godeeye wiligi doloso badeli goo ee takomo dilei tekepo. Bei, Godeeye goo hamaga a diye diso,” diso.

<sup>44</sup> Osoloso Yesuye Yudiya mi toowa mapoo di-ayo howo gisili moso susuga mapoo Godeeyo to eligimo sileeso.

## 5

*Yesuye o hamamee dili odoo daga malalo abo gilimadoo*

*(Mat 4:18-22; Maka 1:16-20)*

<sup>1</sup> Biame hee mapoo Yesuye Gelili abei palaga mapoo Godeeyo to takomolome odoo susuga oso o to dulame diya mooloogoodooso.

<sup>2</sup> Yesu osee tobudulone di kebigeli odoo oso dia pei howo hapagalame dia du bakadio mubi dokodoo gisibado peleso ma molome egeiso.

<sup>3</sup> Yesu du bakadio ee ma kulodu Saimonowo du mapoo meilesa badolone Saimon mapoo takaso, “Du abei pee maga pepooko hoogoo pupubigi,” diso. Esemeyo du ma kulodu badolone odoo susuga mubiyodoo doboome, yayo Godeeyo to dimapoo eligiso.

<sup>4</sup> Yesuye odoo susuga mapoo Godeeyo to taka koodobuloso Saimon mapoo egeesee takaso, “Nee du howo bou mapoo sudo dileso di talame nibada pei howomoo oguse,” diso.

<sup>5</sup> Esino Saimonoye egeesee takaso, “Wiligi odoo, iba eiyo gesi pei ogusulone tou toowa tooso, esino iba di giligile. Esino nayo amapoo takaga, mo pei howomoo ogusuleiso,” diso.

<sup>6</sup> Osoloso diba dia pei howomoo ogusume di susuga oso dia pei mapoo tulone, dibada pei tologo bugulame seeso.

<sup>7</sup> Esem diayo dia odoo abo du hee mapoo debei deeso iso, diba pidilame. Esem diba sidademe dibada du bakadio ee diso metamag-isilone howomoo owulame sino poogooso.

<sup>8</sup> Saimon-Pitaye goo hagee ogoloso, Yesuwo homo beiyopoo gauwuloso egeesee takaso, “Lodee, amaga peegoo di, a tokenee odoo,” diso.

<sup>9</sup> Bei, yibolo osoloso o odoo sabolo diayo di bei giliga ogoloso diya howoogadooso.

<sup>10</sup> Osoloso Saimonobolo tou teli odoo Yemes dio Yonee dio diba nosee goo hagee ogoloso diya howoogadooso. Odoo bakadio Yemes dio Yonee dio hagee Sebediyo owolo.

Osoloso Yesuye Saimon mapoo egeesee takaso, “No haga na ebi! No daga di giligeli odoo badebeiso. Esino epei hamaga no see odoo Godee mapoo gilimado sibili doloso badalaiso,” diso.

<sup>11</sup> Osoloso diba dilesa dia du oluguloso bi susuga omapoo poogoloso, see Yesubolo hodobo diyadeeso.

*Yesuye odoo agagisa bia moodoo  
(Mat 8:1-4; Maka 1:40-45)*

<sup>12</sup> Biame heeso Yesu see mi hee mapoo diso. Mi omapoo odoo agagisa bia badebeiso. Odoo ogoso



Yesu ogoloso o homo beiyopoo ebiso miyomoo tugusaloso egeesee howaso, “Lodee, nayo a tekepo moodolai goomogoga, a tekepo moodee,” diso.

<sup>13</sup> Esemé Yesuye o deeso odoo egee sigolone egeesee takaso, “Ayo no tekepo palai goomogo. Esiga no tekepo pe,” diso. Esemé omapoo o kolo mapoo agagisa bia saga mauwe poogooso.

<sup>14</sup> Esemé Yesuye yo diye dolone to kitulugu sabolo egeesee takaso, “Nayo dileso no ayo tekepo pa goo ee odoo abo mapoo na takee. Esino, nee su tekepo pa goo ee, Godee ogo odoo ogo doloso domo badeli odoo yimapoo dileso eligi. Osoloso nee su tekepo pa omaga emegei di bi tenee, Moseseeye tei magoo goo ee dodolone, odoo susuga oso ogoloso tekepo pa ee gooleedalame,” diso.

<sup>15</sup> Esino odoo susuga oso Yesuwo goo ee mi susuga mapoo oposusumo dime, odoo susuga oso dulugaso. Esemé odoo susuga oso Yesuye Godeeyo to taka ee dulame sibadeeso. Osoloso Yesuye dimapoo paigiga egee molo tekepo palame.

<sup>16</sup> Esino Yesu biame susuga dimaga peegoo dileso, odoo koola mauwe mi mapoo Godee mapoo takalame diliso.

*Yesuye odoo su kakawa poogoo tekepo moodoo  
(Mat 9:1-8; Maka 2:1-12)*

<sup>17</sup> Biame heeso Yesuye odoo susuga eligimolome, Pelisi odoo sabolo tei eligili odoo sabolo diba onosee omapoo debeiso. Odoo hagee bia Gelili mi susuga maga, osoloso abo oso Yudiya

mi maga, osoloso odoo abo oso Yelusalem mi maga sibadeeso. Esemé Yesuye odoo paigiga susuga tekepo moodoogalame Godeeye kitulugu oso yibolo meleeso.

<sup>18</sup> Esemé mi omapoo odoo aboso odoo su kakawa poogoo kida mapoo magoloso tosimiso. Osoloso diayo yo Yesuye badebei mapoo todilame goomogaso.

<sup>19</sup> Esino odoo beiga Yesu mapoo dilei eli egele. Esemé diayo odoo su kakawa poogoo kida sabolo moso omu ma dokodoo imado palaso. Osoloso Yesuye to kemelee domo omaga seme ou tologo poogoloso tiso kida mapoo bagagoloso kida sabolo moso kulodu toosooso.

<sup>20</sup> Diayo odoo su kakawa poogoo moso omu maga toosooloso goolee, odoo egee yayo moodolai teiba doloso, Yesuye dia tei too ogoloso, odoo su kakawa poogoo mapoo egeesee takaso, “Mo odoo, nee goo tokenee olo hapoloso boobado buguso,” diso.

<sup>21</sup> Esemé omapoo debei tei eligili odoo sabolo Pelisi odoo sabolo oso o to duloso, dieso nediliyo egeesee gooleemeleeso, “Odoó hagosó kaseme egeesee ka takayo? Yayo Godee dagadilame see, esino goo tokenee hapeli hedebe Godeeso,” diso.

<sup>22</sup> Esemé Yesuye diayo dibada sooloo ma kulodu gooleemelee goo ee gooledoloso dimapoo egeesee takaso, “Niyo kasi maga nibada sooloo ma kulodu egeesee ka goolee malala?”

<sup>23</sup> Niba odoo su kakawa poogoo hagee ege. Yimapoo goo kasee takalai oso sebe ka mololo? Ayo odoo su kakawa poogoo mapoo ‘Nee tokenee

ayo boobado buguso,' dee takooga, o tokenee boobado bugu niyo gooleedalame. Esino ayo yimapoo takoo, 'No toboloso nee kida toloso di,' dee takoloso, yo tobooga, amapoo odoo moodeli kitulugu molo doloso niyo gooleedalaiso.

<sup>24</sup> Esino Odoo Holo amapoo kitulugu olo teneeso, mipoo hamapoo goo tokenee hapoloso boobado bigilei goo ee niyo ogoloso gooleedalame, ayo nimapoo eligileiso," doloso yayo odoo su kakawa poogoo mapoo egeesee takaso, "No hogabuloso nee kida toloso mosopoo di," diso.

<sup>25</sup> Diayo balaga molome odoo su kakawa poogoo hogabuloso, o kida toloso o mosopoo dulone Godee mapoo goomoga poudoomo diso.

<sup>26</sup> Diayo odoo su kakawa poogoo toboloso di ogoloso diya howoogadooso, osoloso Godee mapoo goomoga poudooso. Osoloso diayo obulone egeesee takaso, "Iba epei goo toowa mudu opusomo di egeiso," diso.

*Yesuye Libai idoo goo*  
(*Mat 9:9-13; Maka 2:13-17*)

<sup>27</sup> Goo hagee koodobuloso hamamee, Yesu moso kuloduga peegoo gadiso. Esemé yayo dulone egeino, tekisi molee misigeli odoo Libai tekisi molee misigeli moso kulodu badoboome egeiso. Osoloso Yesuye yimapoo egeesee takaso, "Ama hamamee sibe," diso.

<sup>28</sup> Esemé Libaiye bi susuga omapoo poogoloso Yesuye di hamamee diso.

<sup>29</sup> Esemе Yesuye Libai yo idoo goo omaga Libaiye o mosopoo nei toowa siso. Esemе tekisi molee misigeli odoо bei sabolo osoloso odoо abo sabolo Yesubolo nei nameleeso.

<sup>30</sup> Esino Pelisi odoо sabolo osoloso tei eligili odoо sabolo oso goo hagee ogoloso gowoolone Yesu o hamamee dili odoо mapoo egeesee woosaso, “Niyo kaseega tekisi molee misigeli odoо sabolo osoloso goo tokenee teli odoо sabolo nei nologolone ka dabala?” diso.

<sup>31</sup> Esemе Yesuye nei dimapoo egeesee takaso, “Odoо paiye mauwe melesenee neli odoо mapoo dileime. Esino odoо paiye ee melesenee neli odoо mapoo dileiso.

<sup>32</sup> Ayo simi hagee, Godeeyo howo woola tekepo teli odoо doloso gweli odoо ee gilimalame ka sibile. Esino tokenee teli odoо doloso gooleedoo odoо ee gilmadoloso Godee mapoo sibilame ka simi,” diso.

*Nei tei doloso badalai goo*  
(Mat 9:14-17; Maka 2:18-22)

<sup>33</sup> Esemе odoо aboso Yesu mapoo egeesee takaso, “Yoneeyo hamamee dili odoо oso howo gisilone nei tei doloso debeliso. Osoloso Pelisi dia hamamee dili odoо sabolo egeseliso. Esino bei kasi maga nee hamamee dili odoо oso biame susuga nei sabolo howo sabolo ka nalagamalala?” diso.

<sup>34</sup> Esemе Yesuye dimapoo egeesee takaso, “Ede-beeyo sobo hulei biame omapoo yo o odoо abo sabolo osee doga, diba nei nelega dabalaisomo?

Haye! Diayo sobo hulei odo sabolo hodobo dobolone goomoga sabolo nei nalaiso.

<sup>35</sup> Esino biame heeso odoo hagee dimaga peegoo ido duga, nei nelega tei doloso dabalaiso,” diso.

<sup>36</sup> Esemee Yesuye dimapoo wudu taka hee hagee takaso, “Edebeeyo o sedi dia koodoloso sedi nape mapoo opodoloso koo duseli. Egeeseega o sedi dia tokenee palaiso. Osoloso sedi dia koodoloso sedi nape mapoo opodoloso dusa ee sedi nape sabolo tebileime.

<sup>37</sup> Osoloso see edebeeyo wain i dia katolo gout be koloso moodoo nape mapoo koo salama seli. Bei, wain i dia oso kitulugu oso katolo be gout koloso moodoo nape ee gabuguga, wain i ee peegoo sologo bigileiso. Osoloso katolo gout be koloso moodoo ee tokenee palaiso.

<sup>38</sup> Esiga wain i dia ee medee katolo gout be koloso moodoo dia mapoo salama salai tekepo.

<sup>39</sup> Esiga edebeeyo wain i nape naga, yo see wain i dia nalai koo goomegeli. Bei, yayo egeese takalaiso, ‘Wain i nape ono diya hadali,’ dalaiso.”

## 6

### *Yu odooso hasali biame (Mat 12:1-8; Maka 2:23-28)*

<sup>1</sup> Yu odooso hasali biame heeso, Yesu o hamamee dili odo sabolo witi wo segei ma kuloduga diyadaga meleeso. Osoloso o hamamee dili odo oso witi wo ko ee gooloogaloso kolo soosoo poloso ko kulodu melee ono nalagamo diyadeeso.

<sup>2</sup> Esem Pelisi odoo abo oso goo hagee ogoloso dimapoo egeesee takaso, “Niba bei kasi maga ibada hasali biame mapoo witi wo ka gwayo? Niyo ibada tei gababuo,” diso.

<sup>3</sup> Yesuye dimapoo to nei egeesee takaso, “Deibidiye o odoo sabolo houdume diayo moodoo goo ee Godeeyo toso booka mapoo hogugu niyo hesigeleyo?

<sup>4</sup> Bei, Deibidiye Godeeyo tei moso ma kulodu gadilesa tei wo tolosa o odoo sabolo neso. Esino tei wo hagee Godee ogo odoo ogo dolosa domo badeli odoo hedebe oso nali. Esino Deibidiye o odoo sabolo wo ne oso tei magoo ee gababiaso,” diso.

<sup>5</sup> Yesuye dimapoo see egeesee takaso, “Niyo hasali biame egee Odoo Holo ayo wiligi dolosa ka badosa,” diso.

*Yesuye odoo dee deedee seeseegedoo poogoo tekepo moodoo*

<sup>6</sup> See Yu odoosa hasali biame hee mapoo, Yesu Yu odoowo howo gisili moso ma kulodu gapeleso odoo mapoo eligimeleso. Moso ee ma kulodu odoo dee deedee seeseegedoo poogoo badebeiso.

<sup>7</sup> Esino tei eligili odoo sabolo Pelisi odoo sabolo oso Yesu tokenee odoo dalame, Yesuwo goo ee medee balagamo silesibiso. Egeeseelone Yesuye dia hasali biame mapoo odoo dee deedee seeseegedoo poogoo tekepo moodabeleso bologolone debeiso.

<sup>8</sup> Esino diayo goo goolee melee Yesuye ogoloso gooleedoloso, dee seeseegedoo poogoo odoo

mapoo egeesee takaso, “No toboloso woola hamapoo sibilesa tebee,” diso. Esemee dee seeseegedoo poogoo odoosoo woola dileso tabaso.

<sup>9</sup> Osoloso Yesuye Pelisi odoosoo sabolo osoloso tei eligili odoosoo sabolo mapoo egeesee takaso, “Ibada tei goosoo ibada hasali biame mapoo ogoosoo takoosomo? Biame omapoo goosoo tekepo talai ee tekepowo? O, goosoo tokenee talai ee tekepowo? Osoloso tei goosoo imapoo ibada hasali biame omapoo odoosoo gie badeli pidilei goosoo ee takoo-somo? O, odoosoo gie badeli wooloomalai goosoo ee takoosomo?” diso.

<sup>10</sup> Yesuye dimapoo egeesee takoloso, see dimapoo bolone odoosoo dee seeseegedoo poogoo mapoo egeesee takaso, “Nee dee seeseegedoo poogoo egee see hoodode,” diso. Esemee odoosoo dee seeseegedoo poogoo oso o dee hoododeme o dee see tekepo paso.

<sup>11</sup> Esemee Pelisi odoosoo sabolo tei eligili odoosoo sabolo oso goosoo hagee ogoloso diya komonogolone dieso nediliyo dima kulodu Yesu tolosoo kasee woolaisomo, doloso to mousoo.

*Yesuye diye di odoosoo 12 gilimadoo goosoo  
(Mat 10:1-4; Maka 3:13-19)*

<sup>12</sup> Biame domo mapoo Yesu mubi ma dokodoo pelesoo gesi hedebe omapoo Godee mapoo takemeleeso.

<sup>13</sup> Esemee mi hadobume Yesu yima hamamee dodomo silesibili odoosoo susuga gilimadooosoo. Osoloso dima kulodu odoosoo 12 onoo tolosoo, dimapoo diye di hu teneeso. Yesuye gilimadoo 12 odoosoo dia hu hagoso.

<sup>14</sup> Saimon (odoo hagee Yesuye o hu hee Pita hediso), osoloso Saimonowo omolo Endulu sabolo, osoloso Yemes, osoloso Yonee, osoloso Pilipi, osoloso Batolome,

<sup>15</sup> osoloso Matiyu, osoloso Tomas, osoloso Alpiyeseeyo owolo Yemes, osoloso Loum gamalee odoo mapoo ha teli odoo Saimon,

<sup>16</sup> osoloso Yemeseeyo owolo Yudas, osoloso Yudas-Iskaliyot (yayo hamamee Yesu ha teli odoo dimapoo tiasooso).

*Yesuye odoo eligilone odoo susuga tekepo moodoo*

*(Mat 4:23-25)*

<sup>17</sup> Yesuye o hamamee dili odoo 12 sabolo mubi dokodooga meilesa kubo mapoo debeiso. Diba omapoo meilesa dobolone egeino, Yesu o hamamee dili odoo susuga sabolo, osoloso odoo abo susuga Yudiya maga osoloso Yelusalem maga osoloso abei toowa palaga debeli Taya mi sabolo Saidon mi sabolo omaga sibilesa doboome egeiso.

<sup>18</sup> Diayo Godeeyo to Yesuye taka ee dulame sibadeeso. Osoloso paiye dimapoo melee tekepo palame sibadeeso. Egeesi ma kulodu Yesuye odoo ma kulodu bo holoso dala tenemelee ee dimaga peegoo hasiso buguso.

<sup>19</sup> Odoo susuga oso Yesuwo kolo sigilame goomogaso. Bei, diayo egeino kitulugu Yesu maga simi oso odoo susuga tekepo moodooga neme.

*Niba goomege*

*(Mat 5:1-12)*

<sup>20</sup> Yesuye o hamamee dili odoo mapoo bolone egeese takaso,



“Bi mauwe odoo niba goomege.

Bei, Godeeye wiligi doloso badeli ee ma kulodu niba gasibileiso.

<sup>21</sup> Odoo epedee hodia hagee do, niba goomege.

Bei, hamamee niba nei nameleso diya edigileiso.

Osoloso goohele sabolo egee pupusiga molo, niba goomege.

Bei, niyo goomogalai biame ee nimapoo tenelaiso.

<sup>22</sup> Odoo Holo mo goo maga edebeeyo niba heigoga, niba goomege, osoloso diayo niba tokenee odoo doloso gowoolone managa niba goomege.

<sup>23</sup> Esiga domo omapoo goomoga toowa sabolo debee. Bei, Kei mi ma dokodoo niyo talai nei ee nibada hu sabolo olo mopoodoo doloso moloso. Esiga niyo medee goolee, nimapoo dala teneli odoo egee bia dia amawe dio oso Godee maga to toloso kokodo takomo silesibili odoo daga hoogoo debei mapoo dala hedebe hageesee masi tenemeleeso.”

### *Niba obeeyamo!*

<sup>24</sup> “Ye-ee! Bi bei odoo niba obeeyamo!

Bei, niso goomoga goo olo tooso.

<sup>25</sup> Ye-ee! Niba epedee nei naloso oduguloso egee do odoo, niba obeeyamo!

Bei, hamamee nimapoo hodia goo toowa oso sibileiso.

Ye-ee! Yiligeli odoo niba obeeyamo!

Bei, hamamee niba goohele goo sabolo dobolone pupusiga malaiso.

<sup>26</sup> Ye-ee! Odoosusuga oso niba tekepona deli odoos niba obeeyamo!

Bei, nimapoo tekepona deli odoos egeebia dia amawe dio oso gamenee godee maga to tolosokokodo takomo sili odoos onosee diba tekepo odoos dee takaga meleeso.”

*Nimapoo ha teli odoos mapoo sooloo dele*  
(Mat 5:38-48; 7:12)

<sup>27</sup> “Mo to duli odoos, ayo nimapoo ka taka, nimapoo ha teli odoos ee sooloo dele osolosoniba hegili odoos mapoo goo tekepo moodee.

<sup>28</sup> Nimapoo duwa takeli odoos dimapoo goo tekepo tolone dimapoo goomoga tenee. Osolosonimapoo dala teneli odoos diba halo Godee mapoo takee.

<sup>29</sup> Osolosoo doos heeso nee haleegi mapoo kobuguga, see nee haleegi hodio mapoo kobugulame heligi magalai tekepo. Osolosoo doos heeso nee kekeisu sedi tadoduga, see yimapoo nee sedidee tenee.

<sup>30</sup> Osolosoo doos heeso namapoo bi howaga yimapoo wulo tenee. Osolosoo doos heeso nee bi tolosoo toduga nayo nei yimaga see peedee dalame na takee.

<sup>31</sup> Esiga edebeeyo nimapoo ogoos goo moodoolame ka gooleesimo, nei niyo dimapoo goo hedebe egeesi masi moodolai tekepo.

<sup>32</sup> Niyo hedebe niba sooloo deli odoos mapoo sooloo dolone doga, odoos abosoniba tekepo odoos dalaisomo? Haye. Bei, tokenee teli odoos oso diba sooloo deli odoos mapoo nei diayo sooloo deliso.

<sup>33</sup> Osoloso niyo hedebe nimapoo goo tekepo moodeli odoo mapoo tekepo moodooga, edebeeyo niba tekepo odoo dalaisomo? Haye. Bei, tokenee teli odoo diba nosee egeesee seliso.

<sup>34</sup> Niyo teneega nei tobuloso teneli odoo hedebe mapoo bi ka tenee domologa, edebeeyo niba tekepo odoo dalaisomo? Haye. Bei, tokenee teli odoo diba nosee egeesee seliso. Diayo nei talai ee goolone dia bi odoo abo mapoo tenee deliso.

<sup>35</sup> Esino niba nimapoo ha teli odoo mapoo sooloo dolone ka debee. Osoloso dimapoo goo tekepo moodee. Osoloso dimapoo bi wulo wulayo teneloso see nei talai doloso na goolee. Niyo goo hageesi tolone doga, niba nei toowa talaiso. Osoloso niba dokodoo badeli Godeeyo owolo dalaiso. Bei, Godeeye yimapoo goomoga to koo takeli odoo sabolo osoloso tokenee teli odoo sabolo mapoo goo tekepo tenelone ka badoso.

<sup>36</sup> Nibada Ama Godee yo emegei sooloo dolone badoso. Esiga niba nosee emegei sooloo dolone ka debee.”

*Odoo heeyo goo tokenee haga na goolee mele  
(Mat 7:1-5)*

<sup>37</sup> “Nayo nee odoo heeyo goo ee goo mauwe na midi, eseega nei nee goo midileime. Osoloso nee odoo ee tokenee odoo dee na takee, eseega nei no tokenee odoo dalaime. Osoloso nee odoo oso namapoo goo tokenee toga, nayo o tokenee goo ee boobado bigi. Nayo egeesee seega nei nee goo tokenee onosee boobado bigileiso.

<sup>38</sup> Esiga nayo wulo tenemologa, no nei talaiso. Nayo odoos abo mapoo tenemologa, nei Godeeye namapoo toowa tenelaiso. Esiga Godeeye namapoo tenee goo hagoso bei molone abo peegoo misigedibileiso. Nayo bi kasee nee odoos mapoo ka teneesomo, nei Godeeye nei teiba egeesi namapoo tenelaiso,” diso.

<sup>39</sup> Osoloso Yesuye see wudu takolone egeesee takaso, “Odoos howo si oso o odoos hee howo si ido dilei tekepowo? Haya. Bei, o bakadio wulo mapoo tigidibigileiso.

<sup>40</sup> Esiga holaiso goo goolee gie tomolo oso o eligili odoos oso gooleedoo ee dagadileime. Haya. Esino yo o eligili odoos oso holaiso medee kibiya eligiga, holaiso yayo gooleedoo goo ee o eligili odoos oso gooleedoo goo sabolo tebileiso.

<sup>41</sup> Nayo kasi maga nee odoowo howo mapoo gelesi pepooko egee molo medee ogolone, hee nee howo mapoo homo toowa egee molo egelega ka pagala?

<sup>42</sup> Osoloso nee howo mapoo homo toowa egee molo egelega no see kaseega nee odoos mapoo takolone, ‘Nee howo mapoo gelesi pepooko egee molo ayo tabiga,’ dee ka takeliyo? No tei goo goolee bakadio gweli odoos. Bei, daga nee howo mapoo homo toowa egee molo ee tabigi. Egeesega nee odoowo howo mapoo gelesi pepooko egee molo medee ogoloso nayo tabigilei tebileiso.”

*Homokoko maga homo o su ee goolee deliso  
(Mat 7:16-20; 12:33-35)*

<sup>43</sup> “Esiga homo ko tekepo peli oso ko tokenee koo peli. Osoloso homo ko tokenee peli oso ko tekepo koo peli. Haye.

<sup>44</sup> Bei, homo susuga ee ko oso pa maga goolee deliso. Esiga pigi ko sabolo geleipi ko sabolo oso wulo homo hee mapoo ko koo peli. Haye.

<sup>45</sup> Esiga odoo tekepo oso o sooloo ma kulodu goo tekepo egee molo ee o maga maga woola yilige bigiliso. Osoloso odoo tokenee oso o sooloo ma kuloduga goo tokenee ee woola yilige bigiliso. Esiga ogoo goo oso odoo sooloo ma kulodu bei mologa, o maga maga goo egeesee takamalaiso.”

*Odoo bakadio oso moso tegei*

*(Mat 7:24-27)*

<sup>46</sup> “Niyo kasi maga amapoo ‘Lodee, Lodee,’ dolone dobolone hee nei ayo taka goo ee telega ka poogoosomo?

<sup>47</sup> Odoo agayo amapoo sibilesa mo to duloso mesimo siloga, yo egeesee badalaiso.

<sup>48</sup> Yo edebeeyo moso togolone mi nelegedi dooloso omou sooloso moso tegei egeesi masi badoso. Bei, howo duwolone howo ki simi oso moso omapoo weiso. Esino moso egee dabisile. Bei, moso medee kalawa tegeiga.

<sup>49</sup> Esino odoo agayo mo to duloso mesilega siloga, yo odoo heeso moso togolone omou mi nelegedi doolega, moso tegei egeesi masi badoso. Bei, howo duwolone howo ki simi oso moso omapoo woome kibilega saga goboloso guobuguso.”

# 7

*Loum ha teli odoo gibadeli odoo oso tei too  
(Mat 8:5-13)*

<sup>1</sup> Yesu goo susuga odoo mapoo eligimelee koodobuloso see Kapeniyum mi mapoo diso.

<sup>2</sup> Kapeniyum mi mapoo Loum ha teli odoo 100 gibadeli odoo badebeiso. Esino domo omapoo yo o tou teli odoo hee paiye oso talai koola taba molome egeiso. Osoloso yayo o tou teli odoo egee bia diya gweliso.

<sup>3</sup> Esiga yayo Yesuye simi duloso Yu odoowo wiligi odoo tebisa abo mapoo Yesu idilame diye diso, Yesuye sibilesa o tou teli odoo ee tekepo palame.

<sup>4</sup> Osoloso Yu odoowo wiligi odoo tebisa egee bia oso sibilesa Yesu mapoo howolone egeesee takaso, “Iba diya goomogo, nayo dilesa ha teli odoo gibadeli ee pidilei.

<sup>5</sup> Bei, yayo ibada odoo halo ibada howo gisili moso tegeiso.”

<sup>6</sup> Esemé Yesu to hagee duloso dibolo diso.

Yesu moso koola mapoo dimeleeno, ha teli gibadeli odoo oso o odoo abo diye neme, diayo sibilesa Yesu mapoo egeesee takaso, “Ha teli odoo gibadeli odoo oso namapoo to egeesee taka, nayo o moso mapoo dilei yo koo goomogogona. Bei, yo tokenee odooga, no o moso mapoo na sibiyena.

<sup>7</sup> Esiga yo see nayo bado mapoo sibilei koo goomogogona. Esino yo goomogogona nayo wulo no egee bado maga toso takeeyena o tou teli odoo ee tekepo palame.

<sup>8</sup> Osoloso yayo see egeesee taka, yo odo abo ma hemiduga tou tolone dia to mapoo mesiloso siliso. Osoloso yima hemi tou teli odo abo dosogona. Esiga yayo dimapoo koo diye daga diliso. Osoloso yayo odo hee mapoo no hamapoo sibeye daga sibiliso. Osoloso goo egee teye daga, yo see goo egee tobuloso teliso. Esiga yo goo egeesee teliga nayo see wulo hamaga badolone toso takeeyena, o tou teli odo ee weidilame.”

<sup>9</sup> Esem Yesuye ha teli odo gibadeli odo oso to taka duloso diya howoodooso. Osoloso odo mooloogoodoo yima hamamee simi omapoo bidi toboloso dimapoo bolone egeesee takaso, “Ayo nimapoo taka, ayo Isalael mi mapoo silee ee ma kulodu odo kibiya tei too odo hee egeesi egele,” diso.

<sup>10</sup> Osoloso ha teli gibadeli odo oso diye di odo diayo see wedi dileso egeino, ha teli gibadeli odo eyo tou teli odo ee weidiloso badoboome egeiso.

*Yesuye sobo bauwo owolo giso holo ta maga see hogabidi*

<sup>11</sup> Osoloso biame abo olo poogoloso hamamee Yesu mi hee Nein mapoo diso. Esem o hamamee dili odo sabolo osoloso odo abo susuga oso yo dodomo diso.

<sup>12</sup> Yesu dileso beele osulu miyopoo dumolome odo aboso edebeeyo bia mi maga giso holo gie kauwa ta eyo su imadoloso sibadeeso. Giso holo ta hagee sobo bau heeyo owolo hedebe oso. Osoloso odo susuga oso sobo bau sabolo sibadeeso.

<sup>13</sup> Lodeeye sobo bau hagee ogoloso yo diya sooloo dolone yimapoo egeesee takaso, “Haga na pise,” diso.

<sup>14</sup> Esemе Yesuye dileso giso holo ta eyo su magoo sa tegei homo su mapoo sigime, odoо ta imadoloso diyadee diba omapoo kookoodabaso. Esemе Yesuye giso holo ta yimapoo egeesee takaso, “Mo holo, ayo namapoo takooso, no tebee!” diso.

<sup>15</sup> Esemе giso holo yo hogabuloso badolone to kemeleeso. Esemе Yesuye giso holo yo owee mapoo ido diso.

<sup>16</sup> Odoо susuga oso goo hagee ogoloso diya dio dulone Godee mapoo goomoga goo poudo demeleeso. Egeeseelone diayo egeesee takaga meleeso, “Godee maga to tolosо kokodo takomo sili kitulugu odoо oso imapoo peledabadoo. Osoloso Godeeye o odoо pidilame olo simidoo,” dee takaga meleeso.

<sup>17</sup> Edebeeyo Yesuye goo moodoo ogoloso Yu odoowo mi Yudiya mi susuga mapoo osoloso mi abo koola omapoo oposusumo diyadeeso.

*Yonee odoо howo oluguli oso Yesuwo goo duloso woosa*

*(Mat 11:2-6)*

<sup>18</sup> Yonee o hamamee dili odoо oso Yesuye goo tomo silee ee Yonee mapoo takaso. Esemе Yoneeye goo hagee duloso o hamamee dili odoо bakadio oso dileso, Yesu mapoo hageesee woosalo egeye diso,

<sup>19</sup> “No tei Keliso iyo hagee bamolo osomo? O, iyo odoо hee bamalaiyo?” diso.

<sup>20</sup> Esemе Yoneeyo hamamee dili odoо oso dileso, Yesu mapoo egeesee takaso, “Yonee odoо



howo oluguli oso iba namapoo sibeye dolone egeesee taka, ‘No tei Keliso iyo bamelee osomo? O, iyo see odoo hee bamalaiyo?’ dee taka,” diso.

<sup>21</sup> Esino biame domo omapoo Yesuye odoo paigiga sabolo osoloso odoo bo holo paladee sabolo osoloso odoo howo siliga sabolo tekepo moodoomo sileeso.

<sup>22</sup> Yayo egeeseemo silone Yonee o hamamee dili odoo mapoo egeesee takaso, “Niba see wedi dileso Yonee mapoo niyo egei goo sabolo osoloso niyo du goo sabolo takee. Bei, odoo howo siliga oso see medee ogowa. Osoloso odoo kido tigidiba sabolo see tekepo poloso silesiboso. Osoloso odoo kolo e bia sabolo tekepo poloso silesiboso. Osoloso odoo dulu tabaga nose tekepo poloso to taka dulugamo silesiboso. Osoloso odoo wedia sabolo hogogabuloso see silesiboso. Osoloso to tekepo hagee bi mauwe odoo oso duluga moloso.

<sup>23</sup> Esiga odoo agayo ayo goo moodoo ee ogoloso diayo amapoo tei too goo ee pegelega poogooga, Godeeye dimapoo goomoga goo tenelaiso,” diso.

*Yesuye Yonee odoo howo oluguli eyo goo taka  
(Mat 11:7-19)*

<sup>24</sup> Yonee o hamamee dili odoo oso see wedi dime Yesuye odoo mapoo Yoneeyo goo ee takalame bei mooloogooso. Osoloso yayo egeesee takaso, “Niba miwe poogoo mi mapoo ogo goo agalame ka diyo? Pooso siboga obuso dabisa ee agalame ka diyo?

<sup>25</sup> Niba edebeeyo dugo tekepo kaloso bado-boome ee agalame ka diyo? Haye. Bei, dugo

tekepo kalagali odoo ee wiligi odoo oso debeli moso tekepo mapoo debeli.

<sup>26</sup> Esino niba wulo Godee maga to toloso kokodo takomo sili odoo ee agalame ka diyo? O. Niyo dileso egei odoo Yoneeye Godee maga to toloso kokodo takomo sili odoo daga hoogoo debei yayo dagadiso.

<sup>27</sup> Bei, Godeeyo to booka mapoo hogugu oso egeesee egee takoo, o goo ee takooso, ‘Ayo mo to tosili odoo yo daga malalo diye dalaiso. Yayo nee eli hoodo magalame.’

<sup>28</sup> Esiga ayo nimapoo taka, odoo daga hoogoo debei susuga ee Yoneeye dagadileso badoso. Esino Godeeye wiligi doloso badeli mapoo odoo wuluge oso Yonee dagadileso ka badoso,” diso.

<sup>29</sup> Odoo susuga sabolo osoloso tekisi molee misigeli odoo abo sabolo to hagee duloso Godeeyo goo ee tekepo diso. Bei, diba nosee Yoneeye howo ogusigaso.

<sup>30</sup> Esino Pelisi odoo sabolo osoloso tei eligili odoo sabolo oso Godeeye goomoga goo diayo ee talai gowoolone diba howo ogusigilega poogooso.

<sup>31</sup> Osoloso Yesuye see egeesee takaso, “Epedee domo hamapoo egee do odoo ee odoo kasi masiyo?

<sup>32</sup> Diba holaiso masi go domo mapoo dobolone emegei dimapoo nei takoo nei takoo dolone dobolone egeesee takaga meliso, ‘Iyo goomoga kosaiya poume niba hepele, osoloso iyo goohele kosaiya poume niba pupusigele.’

<sup>33</sup> Niba odoo egeesi masi doso. Bei, Yonee odoo howo oluguli oso simi ee yo wo sabolo wain i sabolo namo sile. Esino niyo yo bo holo paladoo dee takeliso.

<sup>34</sup> Osoloso hamamee Odoo Holo anosee olo simiso. Ayo sibilesa wo sabolo wain i sabolo namo siloga, niyo a wo sabolo yugune sabolo dooboo nali odoo deliso. Osoloso niyo a tekisi molee misigeli odoo sabolo osoloso tokenee teli odoo sabolo hedebe doloso ka badeli deliso.

<sup>35</sup> Esino odoo agayo Godeeye goo goolee tekepo gooleedoloso tomo siloga, yayo Godeeye goo goolee ee tekepo dolone ka eligiso,” diso.

### *Tokenee teli sobo oso Yesuwo homo hapoo*

<sup>36</sup> Biame heeso Pelisi odoo Saimonoye Yesu idoloso o moso mapoo nei nalame diso. Esemee Yesu Saimonowo moso mapoo nei nalame biaso.

<sup>37</sup> Mi omapoo goo tokenee teli sobo hee badebeiso. Esino yayo Yesuye Pelisi odoowo moso mapoo nei namelee goo ee duloso sisigageli i medee tekepo yoso moodoo howogi mapoo salamasoloso tosimiso.

<sup>38</sup> Osoloso Yesuwo miligi maga gauwuloso pusulone o didawoso Yesuwo homo balagieso. Osoloso yayo see Yesuwo homo mapoo o wudu oso tolone adameleeso. Osoloso sisigageli i medee tekepo oso Yesuwo homo mapoo soomeleeso.

<sup>39</sup> Osoloso Pelisi odoo Saimonoye goo hagee ogoloso egeesee goolee meleeso, “Odoo hagee tei Godee maga to toloso kokodo takomo sili odoo oso

diepi, soboso yo sige medee hoodo egeliyo. Bei, sobo hagee goo tokenee teli sobo,” diso.

<sup>40</sup> Esemé Yesúye Pelisi odoó mapoo egeesee takaso, “Saimon, ayo namapoo goo takalai, a goomogo,” diso.

Esemé Saimonoye egeesee takaso, “Eligili odoó, takee,” diso.

<sup>41</sup> Esemé Yesúye yimapoo egeesee takaso, “Odoó heeso odoó bakadio mapoo molee teneeso. Egeeseelone yayo odoó hee mapoo molee ko 500 tenelone, odoó hee mapoo hedebe molee ko 50 teneeso.

<sup>42</sup> Esino hamamee odoó bakadio hagee bia dimapoo molee mauwe poogoome, nei o hedebe egeesi yimapoo tenelega poogooso. Esemé bi eyo amameeye goo hagee ogoloso dimapoo egeesee takaso, ‘Bige boobado bigi,’ diso. Esiga odoó bakadio hagee ma kulodu odoó hee kaso bi eyo ama diya ka gooleebuguba?” diso.

<sup>43</sup> Esemé Saimonoye nei yimapoo egeesee takaso, “A goolee, molee toowa too odoó oso ama diya goolee malaiso,” diso.

Esemé nei Yesúye Saimon mapoo egeesee takaso, “Nayo tei goo takoo,” diso.

<sup>44</sup> Yesúye sobo mapoo bolone Saimon mapoo egeesee takaso, “No sobo hagee ege! Ayo nee moso mapoo sibume, nayo mo homo hapalame howo amapoo tenele. Esino sobo hagoso o didawoso mo homo hapoloso see o wuduso mo homo taso.

<sup>45</sup> Osoloso ayo nee moso sibume nayo goomogolone a edele. Esino ayo nee moso mapoo

simi domo omaga sobo hagoso mo homo mapoo adamelee koodobile.

<sup>46</sup> Osoloso nayo olipi i oso mo wiligi mapoo soole. Esino sobo hagoso sisigageli i medee tekepo oso mo homo mapoo sooso.

<sup>47</sup> Esiga ayo namapoo taka. Sobo hagee o goo tokenee susuga olo hapoloso boobado buguso. Esiga sobo hagoso a diya goolee goo ee weliga yilige buguso. Esino odoo agayo ayo o goo tokenee pepooko hedebe hapoloso boobado buguga, yayo a goolee goo ee haga toowanee,” diso.

<sup>48</sup> Osoloso Yesuye sobo omapoo egeesee takaso, “No nee goo tokenee susuga ee olo hapoloso boobado buguso,” diso.

<sup>49</sup> Esemee odoo abo yibolo hodobo dobolone nei nalaga melee odoo oso goo hagee ogoloso dieso nediliyo dima kulodu egeesee takaga meleeso, “Odo hagee odoo ogumo? Yayo goo tokenee hapoloso kasee boobado bugu domo ka silosomo?” diso.

<sup>50</sup> Diayo egeesee takomolome Yesuye sobo yimapoo egeesee takaso, “Nayo tei too goo maga badoboso kookaiyo gie badeli nayo olo tooso. Esiga no goomoga sabolo di,” diso.

## 8

### *Sobo aboso Yesubolo di*

<sup>1</sup> Goo hagoso dileso koodobume, Yesuye to tekepo Godeeye wiligi doloso badeli goo ee eligimo silone, mi hee maga mi hee mapoo du domo silesibiso. Osoloso o hamamee dili odoo 12 yibolo hodobo sileeso.

<sup>2</sup> Osoloso sobo paigiga Yesuye tekepo moodoo sabolo osoloso sobo bo holo paladee Yesuye tekepo moodoo oso Yesubolo sileeso. Sobo egee bia hagoso: Meli, o hu hee Magadalin. Yesuye sobo hageeyo kuloduga bo holo 7 peegoo hasiso buguso.

<sup>3</sup> Osoloso sobo hee Helodeeyo moso bali odoo hee Kusayo osobo Yowana, osoloso Susana, osoloso sobo abo dibolo silesibiso. Sobo hagee bia oso Yesu sabolo osoloso o hamamee dili odoo sabolo dimapoo diayo dia molee oso diba pidimo silesibiso.

*Witi wo ko segei maga wudu taka  
(Mat 13:1-9; Maka 4:1-9)*

<sup>4</sup> Odoo susuga mi opusomo opusomo di maga sibilesi mooloogoodeme Yesuye wudu taka hamaga oposususo,

<sup>5</sup> “Biame heeso odoo hee witi wo ko segelame diso. Yo witi wo ko sogomo sileeme, ko abo eli domo mapoo misigedibaso. Esem ebeeyo eli omaga silesibulone witi wo ko dia homoso topoomo dime sóso sibilesi neso.

<sup>6</sup> Esem witi wo ko abo ee yugogisi mi mapoo misigedibaso. Osoloso bou gasibilesi palame sino haga booloogelega wediaso. Bei, yugogisi mi ee ma kulodu howo mauwega.

<sup>7</sup> Osoloso witi wo ko abo obu ma kulodu misigedibaso. Esino haga booloogelega saga paladeeso. Esino oso polone obu sabolo palaga tiso tiadolone witi wo susuga wediaso.

<sup>8</sup> Osoloso witi wo ko abo mi tekepo mapoo misigedibaso. Osoloso bou pisoloso kauwuloso ko diya palagaso. Esem witi wo ko susuga oso ko pa homokoko 100 egeesi oso palagaso.”

Yesuye to hagee takoloso tobudulone toso neligidi egeese takaso, “Odo niba dulubolo, esiga ayo hagee takoo medee hoodo dui!” diso.

*Wudu taka goo eyo bei*

*(Mat 13:10-23; Maka 4:10-20)*

<sup>9</sup> Yesuwo hamamee dili odoo oso Yesu mapoo egeese takaso, “Wudu taka goo hageeyo bei kasiyo?” diso.

<sup>10</sup> Esem Yesuye nei dimapoo egeese takaso, “Niyo Godeeye wiligi doloso badeli goo ee ogoloso gooleedalaiso. Bei, daga Godeeye wiligi doloso badeli goo ee mada meleeso. Esino epei nimapoo woola ka yilige buguso. Esino odoo abo mapoo ayo biame susuga wudu takeliso. Bei, ‘diayo ogoloso medee kibiya egelega pagalame. Osoloso diayo duloso goo eyo bei medee kibiya gooleedelega pagalame.’

<sup>11</sup> Esiga wudu taka goo eyo bei hagoso: Witi wo ko ee Godeeyo to oso.

<sup>12</sup> Esiga odoo abo witi wo ko eli domopoo misigediba egeesi masi doso. Diba to tekepo duliso. Esino Godeeyo to hagee dibada sooloo ma kulodu egee molo ee boobado bigilame Saitenso dimapoo boobado bigili goo teneliso. Bei, diayo to omapoo tei tolosa gie badeli teyaga.

<sup>13</sup> Esiga odoo abo witi wo ko yugogisi mi mapoo misigediba egeesi masi doso. Esiga diba Godeeyo

to taka duloso goomoga sabolo medee teliso. Esino witi wo ko oso yugogisi mi mapoo polone o too medee meilega poogoo egee, diba onosee egeese seliso. Godeeyo to oso dibada sooloo ma kulodu too medee koo meili. Osoloso diayo Godeeyo to duloso biame deiyepo mapoo wulo tei teliso. Esino diayo Godeeyo to mapoo tei too maga, hegi goo sabolo dala goo sabolo oso dimapoo siboga, diayo Godeeyo to mapoo tei too goo ee saga pegeliso.

<sup>14</sup> Osoloso odoo abo witi wo ko oso we ti kauwe kadee ma kulodu misigediba egeesi masi doso. Diba Godeeyo to duloso to ee teliso. Esino mi toowayo gie badeli goolee sabolo, osoloso bi bei doloso dabalai goo gweli sabolo, osoloso dibada su oso goomoga goo ee goolee sabolo diyadulone dibada tei too tokenee peliso. Goo egeesi maga diayo tei too goo oso homokoko masi koo peli.

<sup>15</sup> Osoloso odoo abo witi wo ko mi tekepo mapoo misigediba egeesi masi doso. Diayo dibada sooloo ma kuloduga tekepo goo gweli sabolo osoloso goomoga sabolo Godeeyo to duloso dibada sooloo ma kulodu medee tei teliso. Osoloso diayo o to kibiya kookoodoloso, dobolone homokoko masi diya peliso.”

*Mo to medee dui*  
(Maka 4:21-25)

<sup>16</sup> “Edebeeyo keme pouloso tolo oso koo gagali, osoloso mada koo mageli. Yo keme pouloso woola mapoo pou mageliso, edebeeyo moso kulodu gasibileso gadeebugu ee agalame.



17 Bei, goo susuga epedee mada egee molo, see hamamee odoo susuga oso agalame woola peledabalaiso. Osoloso odoo susuga oso koo duli goo ee see odoo susuga oso dulame woola yilige bigileiso.

18 Mo to hagee niyo medee dui. Bei, to taka medee duli odoo mapoo Godeeye goo goolee tekepo tenelaiso. Esino edebeeyo eyo nediliyo yo Godeeye wiligi doloso badeli goo ee yo gooleedoo doloso mo to dulega poogooga, Godeeye yimapoo goo goolee pepooko egee molo see eyo peedee dalaiso,” diso.

*Yesuwo owee sabolo omolo dio sabolo  
(Mat 12:46-50; Maka 3:31-35)*

19 Biame heeso Yesuwo owee sabolo omolo dio oso Yesu agalame sibadeeso. Esino odoo bei diya mooloogoodoloso ka doboome, diba Yesuye badebei mapoo hodu dilei tebile.

20 Esemee odoo heeso diba ogoloso, Yesu mapoo egeesee takaso, “Noowee sabolo osoloso nomolo dio sabolo oso peegoo no agalame balaga moloso,” diso.

21 Esemee Yesuye odoo mooloogoodoo mapoo nei egeesee takaso, “Edebeeyo Godeeye eligi goo ee duloso mesimo silesiboga, diba mo wee dio osoloso molo dio oso,” diso.

*Yesuye i sabolo howo ki sabolo hamaga taka  
(Mat 8:23-27; Maka 4:35-41)*

22 Biame heeso Yesuye o hamamee dili odoo dimapoo egeesee takaso, “Iba abei hodiokoo dalo

soowoomo,” diso. Esemе diba du mapoo bu-lumaloso soowadeeso.

<sup>23</sup> Diba abei domopooga damolome, Yesu tila poogoome tiaso. Esemе haga booloogelega i toowa sibume, abei omapoo howo ki toowa simiso. Esemе howo ki toowa oso sibulone dibada du ma kulodu howo sasoo oso diba dia du sabolo howomoo owulame siso.

<sup>24</sup> Esemе Yesu o hamamee dili odoososo dilesososo, Yesu tidilone egeesee takaso, “Wiligi odoososo, iba howomoo owulosososo wedilame see!” diso.

Esemе Yesu tia hogabulosososo tobudulone i sabolo howo ki sabolo koodobilame to kitulugu sabolo takaso. Esemе i sabolo howo ki sabolo simi saga omapoo koodobiasososo.

<sup>25</sup> Esemе Yesuye o hamamee dili odoososo dimapoo egeesee takaso, “Niyo tei too kasomososo?” diso.

Esemе Yesuwo hamamee dili odoososo oso goososo hagee ogolosososo howoogadolosososo obugulone diesonososo egeesee takaga meleesososo, “Odoososo hagee odoososo ogumososo? I sabolo howo ki sabolo o to dulosososo koodobiasososo,” dee takaga meleesososo.

*Yesuye odoososo bo holo pala ee tekepo moodososo  
(Mat 8:28-34; Maka 5:1-20)*

<sup>26</sup> Osolosososo Yesu o hamamee dili odoososo sabolo Gelili mi magasoso abei dalosososo Gelasa mi mapoo peledabasososo.

<sup>27</sup> Yesu du magasoso widi pee mapoo pubalogolone egeinososo, odoososo bo holo pala oso yo tugodalame sibume egeisososo. Odoososo hagee dagasoso hoogososo doodusoso boodososo diwe silone biame susugasoso odoososo bi mapoo badeli.

28-29 Bei, bo holo oso kitulugu oso yimapoo toga edebeeyo ki tiso yo tialogoloso mageliso. Esino bo holoso kitulugu oso ki tiso tialogoloso magoo ee kookoobuguloso odoo ee idoloso dobudu diliso. Esino odoo hagoso Yesu ogoloso miyomoo gasuwoloso gwa sabolo tiamolone toso neligidi yimapoo egeesee takaso, “Dokodoo badeli Godeeyo owolo Yesu, nayo amapoo ogoo goo moodoolame ka simiyo?” diso. Osoloso yayo Yesu mapoo howoolone see egeesee takaso, “Nayo amapoo dala na tenee,” diso. Odoo bo holo pala oso to hageesee taka. Bei, daga Yesuye bo holo odoo ma kulodu egee bado mapoo takolone peegoo gasibeye, dee takeme ka taka.

30 Esemé Yesuye yimapoo egeesee takaso, “Nee hu ogumo?” diso.

Esemé yayo to nei egeesee takaso, “Ibada hu ee Bei,” diso. Bei, bo holo susuga oso yima kulodu doso.

31 Esemé bo holo odoo ma kulodu debei oso egeesee takaga meleeso, “Nayo iba Dou mi mapoo na seesee peegee,” dee takaso.

32 Esemé biame omapoo, esia ma dokodoo be hu susuga oso mooloogoo doloso, mi nalagamo silesibiso. Esemé bo holo odoo ma kulodu debei oso Yesu mapoo howoolone egeesee takaso, “Iba be ma kulodu galaga di dee takee,” diso. Esemé Yesuye dimapoo egeesee takaso, “Niba be ma kulodu galaga dilei soowa!” diso.

33 Esemé bo holo susuga oso odoo ma kuloduga peegoo galaga dileso see be ma kulodu galaga diso. Esemé be susuga oso godobia maga kukolo meilesó, howomoo wediaso.

<sup>34</sup> Eseme be bali odoo oso goo hagee ogoloso kukulo dilesa dia mi mapoo osoloso mi pepooko abo mapoo goo egee takomo diso.

<sup>35</sup> Eseme odoo susuga oso goo hagee duloso ee agalame sibadeeso. Diba sibilesa egeino, bo holo pala odoo ee tekepo poloso Yesuwo homo beiyopoo badolone goo goolee tekepo tolosa dugo kalosa badoboome egeiso. Eseme diba diya ebigaso.

<sup>36</sup> Eseme Yesuye odoo bo holo pala ee tekepo moodoome egei odoo oso diayo egei goo ee agalame sibadee odoo dimapoo oposususo.

<sup>37</sup> Eseme Gelasa mosobia odoo susuga sabolo osoloso koola omapoo debeli odoo susuga sabolo oso Yesu mapoo egeese takaso, “No mi hamaga saga peegoo di,” diso. Bei, diba Yesuye goo moodoo mapoo ogoloso diya obugume. Eseme Yesu dilame yo du mapoo dabagaso.

<sup>38</sup> Eseme odoo bo holo pala Yesuye tekepo moodoo oso Yesubolo dilame goomogaso. Esino Yesuye yimapoo egeese takaso,

<sup>39</sup> “Haye. No abolo na sibe. No nee mi mapoo see wedi dilesa Godeeye namapoo goo toowa moodoo goo ee oposisi,” diso. Eseme odoo yo o mi mapoo see wedi dilesa, Yesuye yo tekepo moodoo goo ee oposusumo sileeso.

*Yesuye Yailaseeyo owolo ta ee see hogabilame tekepo moodoo sabolo osoloso sobo paiye tekepo moodoo goo*

*(Mat 9:18-26; Maka 5:21-43)*

<sup>40</sup> Yesu see abei hodiokoo dalo sibume, yo bolone debei odoosusuga oso yayo simi ogoloso diya goomogaso.

<sup>41</sup> Esememapoo haga booloogelega odooshe, Yu odoodia howo gisili moso gibadeli odooshe, Yailaseeye, sibilesosYesuwo homo beiyopoo gawusolosobadolone Yesu mapoo howoolone egeesee takaso, “No mosopoo sibe!

<sup>42</sup> Bei, mosobohohedebe, odugo 12, paiye oso olotalame soomoloso,” diso.

EsemesYesuye Yailaseeyomosopoo dumolome eli domopoo odoosusuga oso yimahodu diya mooloogoodolosodulone nei halagabugu nei halagabugudomo diyadeeso.

<sup>43</sup> Osolosoo doo mooloogoodolosodiyadee eema kulodusobo hee asowooloomaloso badebei sabolo diso. Yo asowooloomaloso badebeiososee dugo 12 poogooso. Esino odoosheeso yotekepo moodoolaitebile.

<sup>44</sup> EsinosobohagososYesu dumolome, madamiligiyopooga sibilesosYesuwo dugosu mapoo sigeme, asowoolooma oso sawososomelee omapoo sago koodobiaso.

<sup>45</sup> EsemesYesuye egeesee takaso, “Odoosagayo aka sigoba?” diso.

Esino odoosusuga ososYesu sigiledolosodiya pulugume, PitayesYesu mapoo egeesee takaso, “Wiligi odoosusuga ososnobolo hodobodulone no kasigo domodu,” diso.

<sup>46</sup> EsemesYesuye nei egeesee takaso, “Haye. Egeesee sele. Odoosheeso aka sigiwa. Esemes odoosweidilame moodelikitulugu amamelee oso peegoodi mawogooleedoso,” diso.

<sup>47</sup> Sobo hagosoo goo moodoo ee mada magalai tebile doloso gooleedoloso kikiliga sabolo dilesoo, Yesuwo homo beiyopoo gasuwoloso badebeiso. Osoloso Yesuye sobo yo weidilame moodoo goo sabolo, osoloso yayo Yesu sige goo ee oposusume odoosusuga oso duso.

<sup>48</sup> Esemee Yesuye sobo yimapoo egeesee takaso, “Mo sobo holo, no tei too maga no olo tekepo paso, esiga no mesie sabolo di,” diso.

<sup>49</sup> Osoloso Yesuye sobo yimapoo to takomolome, odoosusuga oso heeso Yailaseeyo moso abaga sibilesoo, Yailas mapoo egeesee takaso, “Nee sobo holo olo ta moloso. Esiga nayo eligili odoosusuga wulo goo mauwe na ido sibe,” diso.

<sup>50</sup> Esino Yesuye goo hagee duloso Yailas mapoo egeesee takaso, “No haga na ebi, wulo amapoo tei te. Egeeseeega nee sobo holo ta egee molo see weidileiso,” diso.

<sup>51</sup> Diba dilesoo mosopoo doboome, Yesuye dulone hedebe Pita, Yonee, Yemes, osoloso sobo holo eyo owee dio ama dio ono gilimadoloso, moso kulodu galagadiso.

<sup>52</sup> Diba moso kulodu galagadilesoo egeino, odoosusuga oso sobo holo ta ee halo pupusiga molome egeiso. Esemee Yesuye dimapoo egeesee takaso, “Niba egee pupusiga molo epedee omapoo koodobie. Bei, sobo holo yo koo ta moloso. Esino yo wulo tia moloso,” diso.

<sup>53</sup> Esemee Yesuye egeesee taka duloso diba yiligaso. Bei, sobo holo oso ta diba olo egeiga.

<sup>54</sup> Esino Yesuye sobo holo ta eyo dee mapoo toloso yimapoo egeesee takaso, “Sobo holo, no tebee,” diso.

<sup>55</sup> Esememe sobo holo ta ee o gie badeli see wedi sibume, yo hogabuloso tabaso. Esememe Yesuye dimapoo egeesee takaso, “Sobo holo mapoo nei tenee,” diso.

<sup>56</sup> Esino sobo holo eyo ama dio owee dio goo hagee ogoloso diya howoogadooso. Esememe Yesuye dimapoo egeesee takaso, “Niso egei goo hagee odoo abo mapoo na takee,” diso.

## 9

### *Yesuye o hamamee dili odoo 12 diye di (Mat 10:5-15; Maka 6:7-13)*

<sup>1</sup> Yesuye o hamamee dili odoo 12 gilimadoloso dimapoo kitulugu teneeso, diayo bo holo odoo ma kuloduga peegoo hasiso bugu domo silesibulone odoo paigiga sabolo tekepo moodoo dalame.

<sup>2</sup> Osoloso yayo diba diye diso, diayo dileso Godeeye wiligi doloso badeli goo ee odoo mapoo eligimo silesibulone, odoo paigiga sabolo tekepo moodoo dalame.

<sup>3</sup> Osoloso yayo dimapoo egeesee takaso, “Niyo dulone, susu, osoloso o, osoloso wo, osoloso molee, osoloso kali bi bakadio na todi, wulo hedebe todi.

<sup>4</sup> Niba mi omapoo dileso peledobooga, omapoo edebeeyo niba o moso mapoo ido pologa, moso hedebe omapoo tia melee. Osoloso niyo mi omaga mi hee mapoo dulone, mi egee wulo poogoo du domo silesibe.

<sup>5</sup> Osoloso niyo mi hee mapoo dileso ede-beeyo niba o moso mapoo ido pelega poogooga, niba mi egee poogoo dulone, nee homo mapoo basago mologa omapoo tegene peegee, Godeeye komonolone dimapoo dia goo tokenee eyo nei tenelai goo ee gooleedalame,” diso.

<sup>6</sup> Osoloso diba see diyadeeso. Diba mi hee maga mi hee mapoo du domo silesibulone, Godeeyo to tekepo takomo silesibiso. Osoloso odo paigiga susuga see tekepo moodoo domo silesibiso.

*Helodeeye goo tiadoo*

*(Mat 14:1-12; Maka 6:14-29)*

<sup>7</sup> Yesuye moodoomo sili goo susuga ee Gelili mi ee bali odo Helodee duso. Esemee goo hagee duloso yo diya goo tiadooso. Bei, odo aboso Yesuwo goo mapoo egeesee takaso, “Yo Yonee odo howo oluguli ta maga see ka hogabiadoo,” diso.

<sup>8</sup> Osoloso odo aboso egeesee takaso, “Yo Ilayadoo.” Osoloso odo aboso egeesee takaso, “Yo Godee maga to toloso kokodo takomo sili odo hee daga badebei oso ta maga hogabuloso see ka simidoo,” diso.

<sup>9</sup> Esemee Helodeeye goo hagee duloso egeesee takaso, “Yonee ayo wooloomeye neme olo woolomaso. Esino ayo goo toowa hagee dumolo ee agamo goo ee dumolosomo?” diso. Yo diya goo tiademe, yayo Yesu agalame diya goomogaso.

*Yesuye odo 5,000 mapoo nei pi*

*(Mat 14:13-21; Maka 6:30-44; Yon 6:1-14)*



<sup>10</sup> Yesuye diye di odoo 12 diba see wedige sibilesa, goo diayo moodoo sabolo osoloso goo diayo eligi susuga ee Yesu mapoo oposususo. Osoloso Yesuye diba gilimadoloso Betesaida mi mapoo dibusomo dabalame diyadeeso.

<sup>11</sup> Esino odoo susuga oso goo hagee duloso diba nosee hamamee diyadeeso. Esem diayo simi Yesuye ogoloso diba gilimadoloso dimapoo Godeeye wiligi doloso badeli goo ee eligilone odoo paigiga sabolo weidilame tekepo moodoo demeleso.

<sup>12</sup> Yesu yo egeeseemo sileeme, o hamamee dili odoo oso habe sibilesa yimapoo egeese takaso, “Odoo susuga hagee epedee diye dee, diba mosobia koola omapoo dilesa dieso nei nalai sabolo moso tilei sabolo ee esilame. Bei, mi iyo hagee do mapoo nei iyo nalai sabolo moso iyo tilei sabolo mauwedoo,” diso.

<sup>13</sup> Esem Yesuye dimapoo nei egeese takaso, “Niyo dimapoo nei tenee,” diso.

Esem diayo nei egeese takaso, “Odoo hagee diya bei. Esino imapoo wo si hedebe dee tiadoo sabolo di bakadio sabolo moloso. Esino nayo imapoo nei abo talame diye doloso ka takala?” diso.

<sup>14</sup> Bei, biame omapoo mooloogoodoo ee ma kulodu gisowe hesiga ee 5,000.

Esem Yesuye o hamamee dili odoo dimapoo egeese takaso, “Odoo susuga nei nalame odoo 50 egeesiso mooloogoodolo ka buluma, odoo 50 egeesiso mooloogoodolo ka buluma dee takee,” diso.

15 Esemе odoо susuga olo nei nalame egeesee bulumamo diso.

16 Osoloso wo si dee tiadoo sabolo di bakadio Yesuye toloso, Kei mi ma dokodoo bolone nei pidilame goomoga goo Godee mapoo takaso. Osoloso yayo wo popeiloso di bakadio agisaloso, o hamamee dili odoо mapoo piso, see diayo odoо susuga mapoo pilame. Esemе diayo wo si popei sabolo di hwei sabolo odoо susuga mapoo piso.

17 Esemе odoо susuga nei ne oso diya edigime nei hosudelega abo poogooso. Osoloso diayo nei naloso abo poogoo ee Yesu o hamamee dili odoо oso misigamo dileso bou tegei mapoo soo 12 egeesi metamagisaso.

*Pitaye Yesuwo goo yilige bugu  
(Mat 16:13-19; Maka 8:27-29)*

18 Biame heeso Yesu obusomo Godee mapoo takolone badoboome, o hamamee dili odoо oso yimapoo sibadeeso. Esemе Yesuye dimapoo egeesee takaso, “Edebeeyo a odoо ugu deliyo?” diso.

19 Esemе diayo nei Yesu mapoo egeesee takaso, “Odoо aboso taka no Yonee odoо howo oluguli dee takeliso. Aboso taka no Ilaya deliso, osoloso odoо aboso taka no Godee maga to toloso kokodo takomo sili odoо hee daga badebei oso ta maga hogabuloso see ka simidoo, dee takeliso.”

20 Esemе Yesuye nei dimapoo egeesee takaso, “Esino nei niyo a odoо ugu deliyo?” diso.

Esemе Pitaye nei egeesee takaso, “No Godeeye hudi magoo Kelisoso,” diso.

<sup>21</sup> Eseme see Yesuye nei o hamamee dili odo o dimapoo egeesee takaso, “Niyo odo abo mapoo takolone a Keliso dee na takee,” diso.

*Yesuye eyo talai goo ee taka*  
(*Mat 16:21; Maka 8:31*)

<sup>22</sup> Osoloso see tobu Yesuye o hamamee dili odo o dimapoo egeesee takaso, “Odo Holo, a dala toowa bei talaiso. Osoloso Yu odoowo wiligi odo o tebisa sabolo, tei moso wiligi odo o tebisa sabolo, tei eligili odo o sabolo oso a diya gowoolone pagalaiso. Osoloso edebeeyo a teli mapoo magalaiso. Esino biame bakadio midoo ma kulodu ta moloso biame hee mapoo see hogabileiso.”

*Yesuye yayo di hamamee dilei goo ee eligi*  
(*Mat 16:24-28; Maka 8:34-38*)

<sup>23</sup> Yesuye see odo o susuga mapoo egeesee takaso, “Edebeeyo ayo di hamamee sibilei goomogoga, yo daga eyo goomoga goo tomo sili ee poogoloso, biame susuga ma kulodu eyo talai sabolo dala toowa talai goo sabolo medee mopoodoo doloso ama hamamee ka sibe.

<sup>24</sup> Osoloso odo o agayo o gie badeli eyo nediliyo pidilame seega, yo o gie badeli ee osugobalaiso. Esino odo o agayo mo goo maga o gie badeli pee-goo magooga, yo badoboso kookaiyo gie badeli talaiso.

<sup>25</sup> Esino odo o agayo mipoo toowa hamapoo badolone, eyo goomoga goo susuga tomo siloso, hedebe gie badeli goo ee telega dagaduga, yo see ogo o talaisomo? Mauwe.

<sup>26</sup> Osoloso odoo agayo abolo osoloso mo to mapoo gowooga, Odoo Holo ayo toowa doloso badeli goo omaga mo gadeebugu sabolo, osoloso mo Maye toowa doloso badeli goo omaga o gadeebugu sabolo, osoloso Godeeyo momaiye oso toowa doloso debei omaga gadeebugu sabolo sibilesa nei diba gowoolaiso.

<sup>27</sup> Esiga ayo nimapoo ka taka. Nima kulodu odoo abo olo doso, diba Godeeye wiligi doloso badalai biame oso simi ogoloso, hamamee wedileiso,” diso.

*Yesu o su opusomo di*  
(*Mat 17:1-8; Maka 9:2-8*)

<sup>28</sup> Osoloso biame 8 egeesi poogoloso, hamamee Yesuye dulone, Pita, Yonee, osoloso Yemes esee gilimadoloso mubi dokodoo Godee mapoo takalame palaso.

<sup>29</sup> Yesuye Godee mapoo takomolome, o mudu opusomo doloso o dugo diya heliye poloso omaga poniso.

<sup>30</sup> Esemе haga booloogelega, Ilaya dio Moses dio galaga sibilesa Yesubolo to kemeleeso.

<sup>31</sup> Diayo Kei mi diya gadeebugu sabolo peledoboloso Yesuye Godeeyo to dodolone Yelusalem mapoo dileso talai goo ee oposususo.

<sup>32</sup> Pita o odoo abo sabolo tiesaloso hogogabuloso keesee egeino, Yesu yayo toowa doloso badeli goo omaga o gadeebugu sabolo tobudulone odoo bakadio sabolo to kesamolome egeiso.

<sup>33</sup> Odoo bakadio oso Yesubolo to kesameleso dilame doboome, Pitaye medee goo goolega

Yesu mapoo egeesee takaso, “Wiligi odoo, iba hamapoo dabalai tekepo. Esiga iyo waseme bakadio hedebe di tegegalaiso. Hee nee, hee Moseeseyo, osoloso hee Ilayayo,” diso.

<sup>34</sup> Pita to osee komolome, koloboso sibilesa diba gidiseme, diya ebigaso.

<sup>35</sup> Osoloso kolobo maga toso egeesee taka, “Hagee mowolo, ayo hesia oso. Esiga o to medee dui!” diso.

<sup>36</sup> Kolobo ma kuloduga to taka koodobuloso, diayo Yesu obusomo tobudume egeiso. Pita diayo mubi ma dokodoo egei goo ee odoo abo mapoo saga takele.

*Yesuye giso holo bo holo pala tekepo moodoo*

*(Mat 17:14-18; Maka 9:14-27)*

<sup>37</sup> Diba biame hee mapoo mubi maga kumoo meilesa doboome, odoo susuga oso Yesuye badebei mapoo saga sibadeeso.

<sup>38</sup> Esemee odoo mooloogoodoo ma kuloduga odoo hedebeso toso neligidi Yesu mapoo egeesee takaso, “Eligili odoo, ayo namapoo howaso, nayo mo giso holo agalame sibe. Bei, yo mo holo hedebegea.

<sup>39</sup> Bei, bo holo oso yimapoo pologa, yo kikiliga sabolo homodobuloso gwa sabolo molone maga maga makawo tiobiliso. Bo holo oso yimapoo dala tenemolome yo biame susuga ma kulodu haga medee koo sili.

<sup>40</sup> Esino ayo nee hamamee dili odoo mapoo bo holo hagee peegoo hasiso bigi deme, diayo peegoo hasiso bigilei tebilena,” diso.

<sup>41</sup> Esemé Yesúye egeesee takaso, “Niba tei too mauwe tokenee odoó. Niyo amapoo tei talame a biame kasolo nibolo hodobo ka badalaiyo? Esino nowolo amapoo ido sibe,” diso.

<sup>42</sup> Giso holo Yesu mapoo ido sibumolome, bo holo yimapoo pala oso kilikolone mi mapoo homodobiaso. Esemé Yesúye bo holo peegoo hasiso buguloso, yo tekepo polosó oma mapoo ido diso.

<sup>43</sup> Esemé odoó susuga oso Godeeye kitulugu goo ogoloso diya howoogadooso.

Odoó susuga oso Yesúye goo moodoo susuga ee osee goolone doboome, Yesúye o hamamee dili odoó mapoo egeesee takaso,

<sup>44</sup> “Odoó Holo, a ha teli odoó mapoo tiasalaiso. Esiga niba ayo epedee goo hagee takoo na boobadee,” diso.

<sup>45</sup> Esino o hamamee dili odoó oso Yesúye taka goo eyo bei medee kibiya gooleedele poogooso. Bei, goo eyo bei ee dimaga mada magoloso meleeso. Esemé diayo see Yesu mapoo woosalai ebigaso.

*Odoó agayo toowa doloso ka badalaiyo?*

*(Mat 18:1-5; Maka 9:33-37)*

<sup>46</sup> Yesu o hamamee dili odoó oso dima kulodu odoó agayo toowa doloso ka badalaisomo, doloso dieso nediliyo toso agadigaso.

<sup>47</sup> Esino Yesúye dibada goo goolee ogoloso holope idoloso yima koola mapoo sibilesó tobudume, o hamamee dili odoó mapoo egeesee takaso,

<sup>48</sup> “Odoó agayo holope hageesi masi mo hu

maga yibolo badalame idoga, yayo a idoso. Osoloso odoo agayo a idoga, yayo mo Ma a diye di ee idoso. Esiga nima kulodu odoo agayo eyo nediliyo pepooko daga, yo see toowa doloso badalaiso,” diso.

*Edebeeyo namapoo ha telega badoga, yo nee odooso*  
(Maka 9:38-40)

<sup>49</sup> Esemе Yoneeye egeesee takaso, “Wiligi odoo, iba odoo heeso bo holo ee nee hu sabolo odoo ma kuloduga peegoo hasiso bugume egeiso. Esemе iyo yo hamaga takaso. Bei, yo ibada mooloo-goodoo ma kulodu koo badeli,” diso.

<sup>50</sup> Esino Yesuye yimapoo egeesee takaso, “Yo na hamaga takee. Bei, edebeeyo nimapoo ha telega badoga, yo nibada odoo oso,” diso.

*Samaliya odooso Yesu gowe*

<sup>51</sup> Yesu yo Kei mi ma dokodoo ido palai biame ee olo koola tooboome, yo Yelusalem mapoo dilame goomogaso.

<sup>52</sup> Esemе yayo odoo abo Samaliya mi ee ma kulodu mi pepooko hee mapoo malalo diye diso, diayo dileso omapoo yayo tilei moso ee mopoodoo dalame.

<sup>53</sup> Esino mosobia oso Yesuye Yelusalem mapoo dileigo di goo ee dulosoo, diayo yo gowoolone yimapoo moso tenele.

<sup>54</sup> Esemе Yesu o hamamee dili odoo Yonee dio Yemes dio goo hagee dulosoo yimapoo egeesee

takaso, “Lodee, douso mosobia odo hagee pilig-ilame, iyo Kei mi ma dokodooga dou toose dee takalai, no goomogosomo?” diso.

<sup>55</sup> Esino Yesuye dimapoo bidi toboloso tobudulone dimapoo diya takaso.

<sup>56</sup> Osoloso diba see mi hee mapoo diyadeeso.

*Yesu dadalai doloso to taka odo*  
(*Mat 8:19-22*)

<sup>57</sup> Yesu o hamamee dili odo sabolo eli maga diyadaga molome, odo hedebe oso sibilesu Yesu mapoo egeese takaso, “Nayo mi hee kamapoo dusomo, ayo no deede sileiso,” diso.

<sup>58</sup> Yesuye yimapoo nei egeese takaso, “Dobu so oso debeli mi ee moloso. Osoloso sóso tieseli ou moloso. Esino Odo Holo, ayo tieli moso mauwe,” diso.

<sup>59</sup> Esem Yesuye see odo hee mapoo egeese takaso, “Nayo a deede sibe,” diso.

Esino odo ogoso nei egeese takaso, “Lodee, nayo epedee amapoo biame tenee, ayo mo ma toga midoosolaiya,” diso.

<sup>60</sup> Esem Yesuye yimapoo nei egeese takaso, “Dio maga odo wedia oso dieso nediliyo odo wedia ee midoosodolone dabalai tekepo. Esino no sibilesu Godeeye wiligi doloso badeli goo ee odo mapoo takomo sile,” diso.

<sup>61</sup> Esem odo heeso see egeese takaso, “Lodee, a nama hamamee dadalai goomogo. Esino a epedee hamapoo mo sooso dimapoo emegei di to takalame dia,” diso.



<sup>62</sup> Eseme Yesuye see yimapoo nei egeesee takaso, “Odo agayo ama hamamee dodolone see wedi dilame hamamee bidi ogo domo duga, odo egeesi masi oso Godeeye wiligi doloso badeli goo ee halo tou talai tebile,” diso.

## 10

### *Yesuye odoo 72 diye di*

<sup>1</sup> Goo hagoso dilesa koodobume, Lodeeye odoo 72 hesigaso. Osoloso dima kulodu odoo bakadio tooboo bakadio tooboo doloso yayo dilei mosobia pepooko mapoo diba malalo diye diso.

<sup>2</sup> Egeeseelone yayo dimapoo egeesee takaso, “Homolee ma kulodu bi susuga ee olo teeleegeeloso goolai ee moloso. Esino bi ee gooloogalai odoo ee haga beinee. Esiga homolee gibadeli odoo mapoo woose, yayo o homolee ma kulodu bi susuga teeleegee ee gooloogali odoo diye dalame.

<sup>3</sup> Esiga niba di! Esino niba goolee sabolo di. Bei, ayo niba sipi be hu pe masi dobu so kamanali oso egee do mi ma kulodu diye deeso. <sup>4</sup> Niba dulone molee sabolo, o sabolo, osoloso homo mapoo kali bi sabolo na todi. Osoloso niba eli domopoo dulone, odoo abo tugodoloso dibolo to na ke.

<sup>5</sup> Niyo mi hee mapoo dilesa peledobooga, moso kamapoo gilimado polosomo, niyo daga moso mapoo egee do odoo mapoo emegei di to takolone, ‘Godeeyo mesie goo nibolo mele,’ dee takee.

<sup>6</sup> Esiga mesie odoososo ee ma kulodu dogana, niyo emegei di to taka oso dibolo osee malaiso. Esino moso ee ma kulodu debeli odoososo mesili daga, niyo emegei di to taka oso dibolo malaime.

<sup>7</sup> Osoloso moso kasee nimapoo ka teneesomo, niba moso hedebe omapoo debee. Osoloso niba moso hedebe omapoo dobolone, diayo nimapoo nei teneega, nei ee nolone ka debee. Bei, tou teli odoososo ee dia nei talai tebiliso. Esiga niba moso hee mapoo dobolone, moso hee mapoo na du dee.

<sup>8</sup> Niba mi hee mapoo duga, mosobia odoososo emegei dolone nei teneega, hedebe ee namelee.

<sup>9</sup> Osoloso mi omapoo odoososo paigiga tekepo moodoogolone dimapoo ‘Godeeye wiligi doloso badeli goo ee nima koola mapoo moloso,’ dee takee.

<sup>10-11</sup> Esino niba mi hee mapoo dileso peledo-booga, mosobia oso niba gowoolone moso tenel-ega poogooga, niba diayo bia eli domopoo dileso, to kitulugu sabolo dia mi basago oso nibada homo mapoo obooga ee dia howo woola mapoo te, Godeeye komonolone dimapoo dia goo toke-nee eyo nei tenelai goo ee gooleedalame. Osoloso niyo dimapoo egeesee takee, ‘Niba medee goolee, Godeeye wiligi doloso badeli goo ee koola hamapoo moloso.’

<sup>12</sup> Esiga ayo nimapoo taka, mosobia kaso niba sibadeega, ogoloso goomoga sabolo niba iyadelega poogooga, nei Godeeye midilei biame

omapoo dala toowa diayo talai oso Sodom mosobia oso dala talai ee dagadileiso.”

*Yesuye tei tele poogoo mosobia odoo mapoo taka*

*(Mat 11:20-24)*

<sup>13</sup> “Ye-ee! Kolasin mosobia odoo osoloso Betsaida mosobia odoo sabolo. Dala toowa oso niba bamoloso. Bei, ayo nibada mi mapoo goo toowa mudu opusomo opusomo di ee moodoogamo silee egeesi masi Yu odoonee mosobia Taya mapoo osoloso Saidon sabolo mapoo moodoogamo silee diepi, diba haga booloogelega, dibada goo tokenee maga miligi pialoso debeli. Osoloso diayo dibada goo tokenee maga miligi pia goo ee eligilone dugo tokenee megigaloso dosou holugaloso silesibili.

<sup>14</sup> Goo egeesi maga Godeeye goo midilei biame mapoo dala toowa Kolasin mosobia sabolo osoloso Betsaida mosobia oso talai oso Taya mosobia sabolo osoloso Saidon mosobia oso dala talai ee dagadileiso.

<sup>15</sup> Esino Kapeniyum mosobia odoo niba biame omapoo Kei mi ma dokodoo ido palaiso, doloso goolee sabolo dosomo? Haye, niba tolosou Dou mi mapoo toodalaiso.

<sup>16</sup> Esiga odoo agayo nibada to duloso toga, yo mo to tolone ka seeso. Esino odoo agayo nibada to duloso niba diya gowooga, yo a gowoolone ka seeso. Esino odoo agayo a gowooga, yayo mo Ma a diye di ee gowoolone ka seeso,” diso.

*Odoo 72 oso see wedi simi*

<sup>17</sup> Yesuye odoo 72 diye di oso goomoga sabolo see wedi sibilesa egeese takaso, “Lodee, iyo nee hu sabolo takomo sileeme, bo holo odoo ma kulodu debei oso ibada to duloso mesiloso peegoo galagadiso,” diso.

<sup>18</sup> Yesuye dimapoo nei egeese takaso, “Keiso saga egee ebedigebugu egeesi masi Kei mi ma dokodooga Saiten miyomoo homodobume ayo egeiso.

<sup>19</sup> Esiga niba dui, niyo hebise sabolo homolobe sabolo mapoo dokodoo nibada homoso hamadabalame ayo nimapoo kitulugu olo teneeso. Esiga kitulugu oso Saitenso kitulugu ee dagadilesa moloso. Esiga bi heeso nimapoo dala tenelai mauwe.

<sup>20</sup> Esino bo holo oso nibada to duloso mesiloso peegoo kukulo di goo mapoo haga na goomege. Esino nibada hu ee tei gie badeli booka mapoo egee molo omaga goomege,” diso.

*Yesuye Ama Godee mapoo goomoga tenee  
(Mat 11:25-27; 13:16-17)*

<sup>21</sup> Yesu yo Dio Tei oso kitulugu maga goomoga sabolo badolone egeese takaso, “Ma, Kei mi sabolo osoloso mipoo sabolo nayo wiligi doloso badoso. Esiga a namapoo goomogo. Bei, nayo wiligi doloso badeli goo mada egee molo, goo goolee toowa odoo mapoo yilige bigile poogooso. Esino nayo goo goolee dele poogoo odoo mapoo yilige buguso. O. Tei takoo, Ma. Goo hagee nayo goomoga goo oso.

<sup>22</sup> Mo Maye goo susuga amapoo olo teneeso. Es-

---

**10:18:** Yon 12:31; Yili 12:8-9      **10:19:** Psa 91:13; Maka 16:18

**10:20:** Pil 4:3; Yili 3:5      **10:22:** Yon 3:35; 10:15

iga odoo heeso Owolo a gooleede. Esino hedebe Maye Owolo, a ka gooleedoo. Osoloso odoo heeso Ma gooleede. Esino hedebe Owolo ayo Ma ka gooleedoo. Esiga odoo ugu bia mapoo Owolo ayo Mayo goo ee yilige bigilame gooleega, odoo egee bia oso Mayo goo ee diba gooleedalaiso,” diso.

<sup>23</sup> Osoloso o hamamee dili odoo mapoo bidi toboloso omapoo tobudulone dimapoo egeesee takaso, “Niyo egeli goo susuga mapoo goomege.

<sup>24</sup> Bei, ayo nimapoo taka, Godee maga to toloso kokodo takomo sili odoo daga hoogoo debei sabolo osoloso Yu odoowo wiligi odoo tebisa daga debei oso niyo epedee hagee ogo goo ee agalai doloso balaga meleeso. Esino diayo egele. Osoloso diayo goo niyo epedee egee dumolo goo sabolo dulei doloso balaga meleeso. Esino diba dule,” diso.

### *Samaliya odooso emegei di goo*

<sup>25</sup> Biame hee mapoo tei eligili odoo heeso sibilesu Yesu tei ma susuga ee gooleedoloso badaba beleso egeesee takaso, “Eligili odoo, a gie badeli talame ogo goo talaiyo?” diso.

<sup>26</sup> Yesuye to nei egeesee takaso, “Godeeyo to booka mapoo hogugu oso kasee takoolo? Nayo hesigaloso kasee gweliyo?” diso.

<sup>27</sup> Odoo oso to nei egeesee takaso, “Nee sooloo ma kuloduga goolee sabolo, osoloso nee dio maga, osoloso nayo kitulugu sabolo, osoloso nayo goo goolee sabolo oso nee wiligi odoo Godee diya goolee. Osoloso no nediliyo diya gweli egeesi

masi nee odo onosee diya egeesee goolone ka badebee,” diso.

<sup>28</sup> Yesuye yimapoo nei egeesee takaso, “Nayo tei goo takoo. Esiga no goo egeesi tolone badoga, goo oso no badoboso kookaiyo gie badeli talaiso,” diso.

<sup>29</sup> Esino odo yayo eyo nediliyo yo tekepo dolone egeesee takaso, “Esino mo odo ogumo?” diso.

<sup>30</sup> Esemee Yesuye yimapoo oposusu hee hagee oposususo, “Odo hee Yelusalem maga Yeliko mapoo moumeleeso. Yo eli domopoo moumolome, mesiya aboso yo woomele poogoloso eli domopoo magoloso o dugo yayo ka sabolo osoloso o bi susuga sabolo heli toloso diyadeeso.

<sup>31</sup> Yo eli domopoo talame seemolome, Godee ogo odo ogo doloso domo badeli odo oso eli hedebe omaga sibulone egeiso. Osoloso yayo sibulone egeino, odo egee olo talame semelee ogoloso peegooga boloodabaso.

<sup>32</sup> Osoloso yima hamamee abaga tei moso tegei mapoo tou teli odo, o bala Libai, yinosee sibulone egeino, odo eli domopoo mi mapoo homodobuloso tiamolome, peegooga boloodabaso.

<sup>33</sup> Esino Samaliya odo yinosee eli hedebe omaga sibulone egeino, odo eli domopoo talame seemolome egeiso. Yayo odo egee ogoloso yo diya sooloo dalaso.

<sup>34</sup> Esemee yo odo oso tiamelee mapoo dileso o kolo kookoo mapoo olipi i sabolo wain i sabolo oso hoduloso dugoso tialogooso. Osoloso yayo yo

o be donki ma dokodoo tiedoloso, odoo soowo moso mapoo ido dilesa yo bameleeso.

<sup>35</sup> Osoloso see biame hee mapoo Samaliya odoo oso odoo soowo moso gibadeli odoo mapoo molee ko bakadio yimapoo tenelone egeese takaso, ‘Odo hagee nayo medee bamelee. Esino nayo odoo hagee bolone molee hagee hosudoloso, see nee molee oso pidimologa, ayo see wedi simi biame omapoo, nei o egeesi ayo namapoo tenelaiso,’ diso.”

<sup>36</sup> Osoloso Yesuye see egeese takaso, “Odo bakadio hedebe di hageeyo kulodu mesiyaso wei eyo odoo tei ogumo?” diso.

<sup>37</sup> Esem tei eligili odoo oso nei egeese takaso, “Edebeeyo yo sooloo dolone yo pidi odoo ono tei o odoo oso,” diso.

Esem Yesuye yimapoo egeese takaso, “O. Tei takoo. Esiga no dilesa goo egeesi tomo sile,” diso.

### *Meli dio Mata dio*

<sup>38</sup> Yesu o hamamee dili odoo sabolo dulone, mi hee mapoo dilesa peledabaso. Esem mi omapoo badeli sobo hedebe Mataye o moso mapoo Yesu ido palaso.

<sup>39</sup> Esem Matayo omolo Meliye sibilesa Yesuwo homo beiyopoo badolone o to dulone badebeiso.

<sup>40</sup> Biame omapoo Mataye moso kulodu Yesuwo mooloogoodoo odoo eyo wo silone, tou bei neme Yesu mapoo sibilesa egeese takaso, “Lodee, moloye nobolo badoga, ayo mobusomo tou ka toga, diya kwasio. Esiga yayo a pidilame nayo yo sibeye dee takee,” diso.

<sup>41</sup> Esino Lodeeye egeesee takaso, “Mata emegei, no tou susuga tomo silone goolone goo diya kodio.

<sup>42</sup> Esino tou susuga ee ma kulodu tou hedebe hagono toowa ka moloso. Esino Meliye goo tekepo toowa olo tooso. Esiga odoos heeso goo egee yimaga peedee dalaime,” diso.

## 11

*Yesuye Godee mapoo takeli goo ee eligi*  
(*Mat 6:9-13; 7:7-11*)

<sup>1</sup> Biame heeso Yesu mi hee mapoo dilesos Godee mapoo takemelee koodobume, o hamamee dili odoos heeso egeesee takaso, “Lodee, Yoneeye o hamamee dili odoos mapoo Godee mapoo takeli goo eligimo silee egeesi masi nayo iba nosees Godee mapoo takeli goo ee eligi,” diso.

<sup>2</sup> Esemee Yesuye dimapoo egeesee takaso, “Niyo Godee mapoo takolone egeesee takee:

‘Ma, biame susuga ma kulodu hedebe nee hu oso toowa doloso mele dee, odoos susuga oso dokodoo poudalame.

Esiga nayo wiligi doloso badeli goo oso sibilei iba goomogo.

<sup>3</sup> Osoloso biame susuga ma kulodu nei iyo nalai imapoo tenemelee.

<sup>4</sup> Osoloso ibada tokenee hapoloso boobado bigi.

Bei, iba nosees odoos susuga oso goo tokenee susuga imapoo moodeli ee boobado bigiliso.

Osoloso iba goo tokenee mapoo na gido di dee’,” diso.



<sup>5-6</sup> Yesu Godee mapoo takeli goo hagee eligimeleso koodobuloso dimapoo see egeesee takaso, “Niba to hee hagee goolee. Odoosoo heeso gesi domo mapoo nee mosopoo sibileiso. Esino nayo yimapoo nei siloso tenelai nei mauwe daga, mosobia ma kulodu nee odoosoo mapoo nei talame dileiso. No nee odoosoo mosopoo dileso osulu mapoo kalamadulone egeesee takalaiso, ‘Mo odoosoo, odoosoo hee mo mosopoo simiga. Esino ayo yo pidilei nei mauwe. Esiga ayo namapoo nei talame ka siba,’ dee.

<sup>7</sup> Eesega nee odoosoo moso kulodu badebei oso egeesee takalaiso, ‘No see wedi di. Bei, a mo holo dio sabolo osulu kisiloso tiesamoloso. Esiga a toboloso namapoo nei tenelaime,’ dee.”

<sup>8</sup> Esemes Yesuye see dimapoo egeesee takaso, “Esino ayo nimapoo taka, yayo no wulo emegei doloso bi tenelaime. Esino nayo kalamadulone osee howamologa, yayo toboloso namapoo bi tenelaiso.

<sup>9</sup> Esiga ayo nimapoo taka, niba woose. Egeeseega nimapoo tenelaiso. Osolosoo niba esie. Egeeseega, niyo agalaiso. Osolosoo niba osulu mapoo kalamadi. Egeeseega osulu ee nimapoo yamagalaiso.

<sup>10</sup> Bei, woosali odoosoo oso goo talaiso. Osolosoo esieli odoosoo oso goo agalaiso. Osolosoo osulu mapoo kalamadili odoosoo mapoo osulu yamagalaiso.

<sup>11</sup> Esiga ma dio niba dui! Odoosoo agayo owoloye di nala poogoo daga, yimapoo sa tenelisomo? Haya.

<sup>12</sup> Osolosoo yayo só ho nala poogoo daga, nayo yimapoo homolobe tenelisomo? Haya.

<sup>13</sup> Niba tokenee odoo. Esino niba gooleedooso, nibada owolo dimapoo bi tekepo tenelai. Esiga iba gooleedooso, Ma Godee Kei mi ma dokodoo egee bado oso yimapoo woosali odoo mapoo Dio Tei wulo tenemoloso,” diso.

*Yesu dio Belsebul dio*  
(*Mat 12:22-30; Maka 3:20-27*)

<sup>14</sup> Biame heeso odoo hee badebeiso. Daga bo holo oso odoo eyo su ma kulodu palademe, to kelega poogoloso badebeiso. Esemé Yesuye odoo eyo su ma kulodu bo holo paladee peegoo habuguso. Osoloso bo holo oso odoo ma kuloduga peegoo gadime, to koo keli odoo yo see to keiso. Esemé odoo susuga oso goo hagee ogoloso diya howoogadooso.

<sup>15</sup> Esino odoo aboso egeesee takaga meleeso, “Yesu yo Belsebuleeye kitulugu maga bo holo peegoo ka hasiso bigili molodoo. Bei, Belsebul yo bo holo dia wiligi odoo taba oso,” dee takaga meleeso.

<sup>16</sup> Esemé odoo aboso Yesuye kitulugu egee tomolo tei Godee maga simibeleso agalame yimapoo egeesee takaso, “Nayo Kei mi ma dokodooga goo toowa opusomo di ee imapoo eligi,” diso.

<sup>17</sup> Esino Yesuye diayo goo goolee olo gooleedoloso dimapoo egeesee takaso, “Mi toowa mapoo debeli odoo oso abo puloso dieso nediliyo ha toga mi toowa egee malaime, tokenee palaiso. Osoloso soosoo heeso abo puloso dieso nediliyo ha toga soosoo egee pododalaiso.

<sup>18</sup> Esiga Saitenso o mooloogoodoo ma kulodu domo puloso dieso nediliyo ha toga, kaseega yayo wiligi doloso badeli goo oso osee ka malaiyo? Tokenee palaiso. Bei, niyo a Belsebul oso kitulugu maga bo holo peegoo ka hasiso bugu deligo daga, ayo goo hagee nimapoo ka taka.

<sup>19</sup> Esino ayo bo holo peegoo hasiso bigili kitulugu hagee tei Belsebul oso kitulugu maga ka hasisimo silo daga, nibada hamamee dili odoo oso bo holo peegoo egee hasisimo silesibo kitulugu ee kamapoo toowo? Esiga diayo takooga, niyo amapoo egee takoo goo ee tei goonee, dee takalaiso.

<sup>20</sup> Esino ayo Godeeye kitulugu maga bo holo peegoo ka hasisimo silo daga, Godeeye wiligi doloso badeli goo ee nimapoo olo simiso.

<sup>21</sup> Esiga kituluguli odoo oso tai sabolo tio sabolo toloso o moso gibadoga, o bi moso kulodu meli ee edebeeyo heli talaime.

<sup>22</sup> Esino see diya kitulugu odoo oso siboga, yayo moso gibadeli odoo wooloso o tai sabolo tio sabolo peedee dalaiso. Osoloso moso kulodu peleso o bi susuga toloso odoo abo mapoo pileiso.

<sup>23</sup> Esiga odoo agayo a dokolo tebelega poogooga, yo amapoo ha tomoloso. Osoloso odoo agayo abolo odoo Godee mapoo gilimado sibilega poogooga, yayo odoo ee Godee maga peegoo hasiso bugu domoloso.”

*Bo holo oso see wedi sibili goo  
(Mat 12:43-45)*

<sup>24</sup> Esemе Yesuye egeesee takaso, “Esiga bo holo oso odoо maga peegoo gaduga, yo dilesо miwe poogoo mi mapoo eyo badalai mi esiamo sileiso. Yo mi esiamo siloso koo ogoga, eyo nediliyo egeesee takalaiso, ‘A mawo daga badebei mapoo see wedi dia,’ dalaiso.

<sup>25</sup> Yo sibilesо ogoga, moso gelesi kadoloso bi medee mopoodoo ma molo agalaiso.

<sup>26</sup> Osoloso yo see wedi dilesо bo holo diya kitulugu abo 7 gilimadoloso moso omapoo dabalaiso. Egeesega odoо hagee eyo daga badeli poogoloso see diya tokenee badalaiso.”

### *Odoо agayo goomoga sabolo ka dosomo?*

<sup>27</sup> Yesuye goo hagee odoо mapoo takomolome, odoо mooloogoodoo ma kuloduga sobo heeso toso neligidi egeesee takaso, “No soomagoloso too nedimo silee sobo omapoo Godeeye goomoga tenelai tekepo,” diso.

<sup>28</sup> Esino Yesuye yimapoo egeesee takaso, “Haye, emegei. Goo egeesi koo moloso. Odoо agayo Godeeyo to duloso omapoo mesie sabolo siloga, odoо yimapoo Godeeye goomoga teneliso,” diso.

### *Edebeeyo goo opusomo di ee agalame goomoga (Mat 12:38-42)*

<sup>29</sup> Edebeeyo Yesu mapoo sibilesо mooloogoodeme, Yesuye dimapoo egeesee takaso, “Epedee hamapoo egee do odoо ee diya tokenee. Osoloso diba wulo goo opusomo di agalame amapoo take-liso. Esino ayo dimapoo goo toowa opusomo di

hee eligileime. Esino hedebe Yonayo goo ono dimapoo ka eligilei.

<sup>30</sup> Bei, Godeeye Yona mapoo moodoo goo oso Niniba odo mapoo yayo tei Yona diye di goo ee eligiso. Esiga Odo Holo amapoo goo peledabalai ee odo epedee hagee do mapoo Godeeye tei a diye di goo ee eligileiso.

<sup>31</sup> Osoloso goo midilei biame mapoo Siba mi eyo wiligi taba sobo onosee nibolo goo midi mapoo badolone nibada goo midiloso, niba tokenee odo dalaiso. Bei, yayo eli sage abaga sibilesa odo toowa Solomonoye eligi goo ee dulame simiso. Esino ayo Solomonon dagadilesa ka badoso. Esino niyo mo to dulei ka gowooso.

<sup>32</sup> Esiga Niniba odo oso goo midi mapoo nibolo dobolone, nibada goo midiloso, niba tokenee odo dalaiso. Bei, Yonaye Godeeyo to dimapoo tosibume, diba dia goo tokenee mapoo miligi piaso. Esino Yona ayo dagadilesa badoso. Esino ayo Godeeyo to nimapoo takomo sibume, niyo duloso nibada goo tokenee mapoo miligi pile.”

*Ibada su mapoo howo oso gadeebugu ka moloso*

*(Mat 5:15; 6:22-23)*

<sup>33</sup> “Edebeeyo keme pouloso mada koo mageeya. Osoloso toloso koo geegeeya. Haye, keme pouloso woola mageeya edebeeyo moso kulodu gasiboga gadeebugu ee agalame.

<sup>34</sup> Esiga nee su mapoo nee howo oso keme masi ka moloso. Osoloso nee howo oso tekepo mologa, nee su susuga gadeebugu malaiso. Esino

nee howo oso tokenee poga nee su susuga neliga malaiso.

<sup>35</sup> Esiga obeeyamo. Nee su mapoo gadeebugu egee molo medee hoodo ege. Bei, gadeebugu ee neliga molo malaiso.

<sup>36</sup> Esiga nee su ma kulodu gadeebugu toowa oso molone neliga hee me daga, nee su mapoo kemeso pouni masi gadeebugu malaiso.”

*Yesuye Pelisi odoo sabolo osoloso tei eligili odoo dimapoo taka*

*(Mat 23:1-36; Maka 12:38-40)*

<sup>37</sup> Yesu to takameleso koodobume, Pelisi odoo heeso o mosopoo nei nalame ido diso. Esemee Yesu yibolo dilesa nei nalame biaso.

<sup>38</sup> Pelisi odoo oso Yesuye Yu odoo dia tei magoo ee dedelega poogoloso dee howo sawwilega nei ne ogoloso dio dulone diya gooleeso.

<sup>39</sup> Esemee Lodeeye yimapoo egeesee takaso, “Pelisi odoo niba wulo nibada kapu sabolo peleta sabolo hedebe kolo ee hapoolone hee kulodu hapelega pegeli niba egeesi masi doso. Bei, niyo nibada kolo ono hapeliso. Esino sooloo ma kulodu tokenee goo sabolo osoloso bi goomegeli goo oso ka moloso.

<sup>40</sup> Niba boobada odoo! Bei, Godeeye kolo sabolo osoloso kulodu sabolo moodooso.

<sup>41</sup> Esiga nimapoo bi teiba mologa bi mauwe odoo pidi. Niyo egeesee seega niba tokenee goo mauwe malaiso.

<sup>42</sup> Ye-ee Pelisi odoo! Bei, niyo Godee mapoo emegei di bi kobu sabolo bi pepuso abo sabolo medee molone 10 ma kulodu hedebe Godee

mapoo tenee dolone nei tei ma hogugu ee ma kulodu goo toowa magoo ee telega pegeliso. Goo ee odo mapoo goo tekepo moodeli sabolo osoloso Godee gweli goo sabolo oso. Esiga niyo Godee mapoo emegei di bi tenelone goo toowa bakadio hagee tobuloso moodee.

<sup>43</sup> Ye-ee Pelisi odo! Bei, edebeeyo niba agalame howo gisili moso kulodu peleso odo hu toowa too oso bili mapoo bilame goomegeliso. Osoloso eli domopoo edebeeyo nimapoo gauwuloso emegei di to takooga ee dulei, niba diya goomegeliso.

<sup>44</sup> Ye-ee Pelisi odo! Niba odo bi mada magoo masi moloso. Edebeeyo odo bi egelega, dokodooga diliso. Niba egeesi masi moloso.”

<sup>45</sup> Osoloso tei eligili odo heeso Yesu mapoo egeese takaso, “Eligili odo, nayo Pelisi odo mapoo tokenee sisi oso ibolo hodobo tokenee ka susu,” diso.

<sup>46</sup> Osoloso Yesuye see tei eligili odo mapoo egeese takaso, “Ye-ee, tei eligili odo! Bei, niyo tei eligi goo oso odo mapoo hegi goo teneliso. Esino niyo diba pidilone hegi goo ee see niso koo teli.

<sup>47</sup> Ye-ee tei eligili odo! Bei, niyo Godee maga to toloso kokodo takomo sili odo ta eyo bi mapoo moso pepooko medee tekepo tegeliso. Esino niba gooledeleyo, odo egee bia namawe diayo piligu oso?

<sup>48</sup> Niyo namawe diayo goo moodoo tekepona doloso odo dieso piligu eyo bi ma dokodoo moso pepooko tegeliso.

<sup>49</sup> Esiga Godeeye niyo goo moodoo olo hoodo ogoloso egeesee takaso, ‘Ayo Godee maga to toloso kokodo takomo sili odoo sabolo diye di odoo sabolo Isalael odoo mapoo diye dalaiso. Esino diayo abo piligilone abono wulo dala tenelaiso,’ diso.

<sup>50-51</sup> Osoloso mi bei mooloogoo omaga sibulone namawe diayo Godee maga to toloso kokodo takomo sili odoo piligimo simiso. Egeeseelone diayo Eibol maga wooloomalai bei mooloogooloso abaga simino Sekalaya wooloomaloso omapoo koodobiaso. Bei, diayo Sekalaya yo tei moso tegei ogo osoloso Godee mapoo gala wooloso sili dousulu ogo doloso domo omapoo woolomaso. Esiga epedee hagee do odoo niyo namawe diayo Godee maga to toloso kokodo takomo sili odoo piligu eyo nei tokenee niyo talaiso. Esiga ayo nimapoo tei goo taka. Bei, niyo namawe diowo tokenee eyo nei talaiso.

<sup>52</sup> Ye-ee tei eligili odoo! Bei, Godee gooleedalai osulu yeli ki bi niyo mada magoloso ka doso. Osoloso niyo edebeeyo osulu omaga gadiyaga, kisiloso see niso koo gadu domoloso.”

<sup>53-54</sup> Yesuye Pelisi odoo sabolo tei eligili odoo mapoo to takameleso koodoboloso diba poogoloso diso. Esemme diayo diya komonolone hamamee biame abo mapoo Yesu mapoo woosali goo opusomo opusomo di woosameleeso. Bei, diayo goomoga Yesuye to nei taka ee ma kulodu Moseseeye tei magoo gababuoga, yo toloso goo midilame.



# 12

*Yesuye goo bakadio gweli odo mapoo kokodo taka*

*(Mat 10:26-27)*

<sup>1</sup> Osoloso biame domo omapoo odo susuga oso Yesu mapoo mooloogoodolone diya kumugulone nei halagabugu nei halagabugu diso. E-eme Yesuye daga o hamamee dili odo mapoo egeese takaso, “Niba obeeyamo! Pelisi odo oso goo bakadio gweli goo ee wo habia egeesi masi moloso. Bei, wo giedege wo habia sabolo hamaga, wo giedege tokenee palaiso.

<sup>2</sup> Esiga goo susuga mada egee molo see woola peledabalaiso. Osoloso edebeeyo koo duli goo ee see woola takooga duleiso.

<sup>3</sup> Osoloso niyo mada taka to ee see woola takooga duleiso. Osoloso niyo moso kulodu dulu mapoo mada taka see hamamee odo susuga dulame moso omu ma dokodooga neligidi woola takalaiso.

*Godeebolo ebi*

*(Mat 10:28-31)*

<sup>4</sup> Esiga emegei, ayo nimapoo taka. Odo wulo su hagee wooloomali yibolo na ebi. Bei, yo hedebe su wooloomali ee gooleedoo, esino dio wooloomali yo tebile.

<sup>5</sup> Esino ayo nimapoo taka. Niba hedebe Godeebolo obulone ka debee. Bei, odo wooloomaloso dio Dou mi mapoo toodalai kitulugu yimapoo moloso. Esiga niba hedebe Godeebolo obulone ka debee.

<sup>6</sup> Esiga niyo só pepuso dee tiadoo molee ko ta oso teliso. Esino ee ma kulodu Godeeye só pepuso hedebe koo boobado bigili.

<sup>7</sup> Osoloso Godeeye nibada wudu susuga yo gooleedooso. Bei, wudu susuga egee yayo olo hesigaso. Esiga niba haga na ebi. Bei, Godeeyo howo woola só ee goo toowa koo moloso. Haye. Niyo goo toowa ka moloso.”

*Odoo howo woola Kelisowo goo yilige bigi  
(Mat 10:32-33; 12:32; 10:19-20)*

<sup>8</sup> “Esiga ayo nimapoo taka. Odoo agayo odoo howo woola tobudulone yayo amapoo tei too goo ee woola yilige buguga, nei Odoo Holo ayo Godeeyo momaiye eyo mudugiyo abaga tobudulone yo mo odoo dalaiso.

<sup>9</sup> Esino odoo agayo odoo howo woola tobudulone amapoo tei tele poogoo goo ee woola yilige buguga, nei ayo Godeeyo momaiye dia mudugiyo abaga tobudulone yo mo odoonee dalaiso.

<sup>10</sup> Osoloso odoo agayo Odoo Holo amaga to tokenee takooga, Godeeye o tokenee hapoloso boobado bigileiso. Esino odoo agayo Dio Tei eyo goo maga to tokenee takooga, o tokenee ee Godeeye hapalaime.

<sup>11</sup> Esiga edebeeyo niba howo gisili moso mapoo osoloso wiligi odoo taba eyo moso mapoo nibada goo midilame ido pologa, niyo nei takalai ee haga na goolee.

<sup>12</sup> Bei, niyo omapoo peleso tobudulone, to takalai ee Dio Tei oso nimapoo eligileiso.”

*Yesuye bi bei odoowo goo oposusu*

<sup>13</sup> Odoo mooloogoodoo ma kuloduga odo heeso Yesu mapoo egeesee takaso, “Eligili odo, nayo mo ei mapoo takee, yayo ibada ama ta eyo bi gilibo toloso badolone bi susuga yayo egee bamolo puloso abo hodio amapoo tenelame,” diso.

<sup>14</sup> Esem e Yesuye yimapoo nei egeesee takaso, “Emegei, amapoo kitulugu mauwe, nee bakadio nimapoo nibada nama ta eyo bi domo puloso pilei,” diso.

<sup>15</sup> Yesuye see odoo omapoo debei mapoo egeesee takaso, “Niba obeeyamo! Niba bi bei doloso badalai goo omapoo haga na goomege. Bei, bi bei doloso badalai goo oso tei gie badeli koo teneli,” diso.

<sup>16</sup> Osoloso Yesu to hagee takoloso see wudu taka hagee oposususo, “Bi bei odo o mi mapoo yayo nei howo segei oso nali bi diya palagaso.

<sup>17</sup> Osoloso eyo nediliyo egeesee takaso, ‘Nei nali bi hagee malai amapoo moso hee mauwe. Esiga ayo ogoo goo talaiyo?’ diso.

<sup>18</sup> Esem e yayo egeesee takaso, ‘A mo nei nali bi mageli moso guobuguloso see moso toowa abo tegelaiso. Osoloso ayo nei nali bi sabolo bi abo sabolo moso ee ma kulodu malaiso.

<sup>19</sup> Egeeseega amapoo bi tekepo bei oso dugo susuga ee ma kulodu osee ma malaiso. Esiga a tou hee talai mauwe. Esino a goomoga sabolo wulo badolone, wo sabolo osoloso howo sabolo namalaiso,’ diso.

<sup>20</sup> Eseme Godeeye yimapoo egeesee takaso, ‘No boobada odoodoo! Esiga epei gesi nee gie badeli ayo namaga peedee dalaiso. Osoloso nayo nee su pidilame bi maloso meli see odoo agayo ka talaiyo?’ diso.”

<sup>21</sup> Osoloso Yesuye see egeesee takaso, “Odo agayo mipoo hamapoo bi bei mooloogoo maloso badolone, nei Godeeyo howo woola goo toowa telega poogooga, goo hageesi oso yimapoo peled-abalaiso,” diso.

*Tei toloso dobolone haga na goolee*  
(*Mat 6:19-21, 25-34*)

<sup>22</sup> Yesuye see o hamamee dili odoo mapoo egeesee takaso, “Ayo nimapoo taka. Niyo dobolone nei nalai sabolo osoloso dugo kalai sabolo omapoo haga na goolee.

<sup>23</sup> Bei, nei nali bi oso goo toowa koo moloso. Haye. Esino nibada gie badeli goo oso goo toowa ka moloso. Osoloso kali bi oso goo toowa koo moloso. Haye. Esino nibada su oso goo toowa ka moloso.

<sup>24</sup> Esiga niba só ogoloso goolee. Diba nei nali bi dieso sogoloso koo gooloogali. Osoloso diba nei nali bi magalai moso mauwe. Esino Godeeye dimapoo nei nali bi ka tenemoloso. Esino Godeeyo howo woola só oso goo toowa koo moloso. Esino niyo goo toowa ka moloso.

<sup>25</sup> Esiga edebeeyo kali bi sabolo osoloso nei nali bi sabolo omapoo diya gooleega, o gie badeli see hoogoo sagelisomo? Haye.

<sup>26</sup> Goo pepooko hageesi moodoolai nimapoo kitulugu me daga, niba see goo abo mapoo haga na goolee.

<sup>27</sup> Osoloso niba see dobudu meli palapalawa tekepo ogoloso goolee. Bei, diayo dieso nediliyo pidilei tou koo teli. Osoloso dugo dieso kalai koo duseli. Esiga ayo nimapoo ka taka, daga Solomonoye wiligi odoo toboloso badebei mapoo yayo kali bi medee tekepo kalaga meleeso. Esino dobudu meli palapalawa oso tekepo oso dugo tekepo Solomonoye kali ee dagadi.

<sup>28</sup> Esiga dobudu meli palapalawa tekepo oso epei gasibilesa moloso, see biame hee mapoo wooseliso. Esino Godeeye palapalawa omapoo dugo masi tekepo ka kadili daga, a tei toso, Godeeye nimapoo dugo tekepo tenelaiso. Niba tei too kibile odoo oso debei masi na debee.

<sup>29</sup> Esiga niba nei sabolo howo sabolo namalai mapoo haga na goolee.

<sup>30</sup> Bei, mi odoo oso bi egee talame diya gweliso. Esino Nama Godeeye bi niyo talame goomegeli ee yayo malalo olo gooleedooso.

<sup>31</sup> Esino niba daga malalo diya esie, Godeeye wiligi doloso badeli goo ee talame. Niyo egeesee seega nei yayo bi niyo goomoga ee nimapoo tenelaiso.

<sup>32</sup> Esiga niba haga na ebi. Bei, sipi be bali odoo oso o be medee bali egeesi masi, Godeeye niba medee egeesee bamoloso. Osoloso niba ebia sabolo na debee. Bei, Godeeye niba yibolo wiligi doloso badalame yayo goomoga sabolo niba olo hesiaso.

<sup>33</sup> Nibada bi odoo mapoo teneloso nei molee toloso bi mauwe odoo mapoo pi. Niyo egeese seega, nei Kei mi ma dokodoo bi bei nibada hu sabolo malaiso. Bi bei ogooso Kei mi ma dokodoo mologa mauwe pagalaime. Bei, mi omapoo heli teli odoo oso sibilesi bi ee heli koo teli. Osoloso siso bi koo nali.

<sup>34</sup> Nimapoo bi bei toowa ma mologa, nibada goo goolee oso omapoo meliso.

*Odoo Holo oso sibilei goo mapoo mopoodoo doloso debee*

*(Mat 24:45-51)*

<sup>35</sup> Esiga niba bi mopoodoo doloso goo mapoo dulone dobolone keme peyigaloso debee.

<sup>36</sup> Bei, tou teli odoo oso dia wiligi odoo ee sobo hu wo nalame di siboga, agalame bameli egeesi masi debee. Bei, yayo see wedi sibilesi osulu mapoo kalamadiga osulu saga yadalaiso.

<sup>37</sup> Tou teli odoo oso sibilei mapoo dulone dobolone osee bamologa, yayo simi ogoloso dimapoo goomogalaiso. Esiga ayo nimapoo taka, wiligi odoo yayo o tou teli odoo ogoloso goomogolone, diba bulume doloso dimapoo nei nali tenelaiso.

<sup>38</sup> Esiga wiligi odoo oso sibilei, yo gesi domo sibumobelee o, kudi daga takooga sibumobelee, biame diba gooleedelee. Esino o tou teli odoo oso yayo egee sibo mapoo dulone dobolone osee bamologa, yayo sibilesi diba ogoloso dimapoo goomogalaiso.

<sup>39</sup> Esino niba goo hagee medee goolee. Ede-beeyo heli teli odoososo o mosopoo sibilei biame ee duloso badebei diepi, yo olo mopoodoo doloso bolone badolone, heli teli odoososo simi ogoloso yayo habigili.

<sup>40</sup> Esiga niba olo mopoodoo doloso dulone bolone ka debbee. Bei, Odoososo Holo ayo sibilei biame niba gooleedele.”

<sup>41</sup> Esem Pitaye egeesee takaso, “Lodee, no wudu hagee takoo wulo hedebe iyo dulame ka takala o, odoososo susuga oso dulame ka takala?” diso.

<sup>42</sup> Esem Lodeeye nei egeesee takaso, “Goo mapoo mesimo silone tou tekepo teli bali odoososo ogumo? Wiligi odoososo odoososo egeesi masi mapoo kitulugu tenelaiso, yayo o tou teli odoososo susuga gibolone yayo dimapoo wo tenemalame.

<sup>43</sup> Osoloso wiligi odoososo oso peegoo dileso bado-boso see wedi sibilesoso ogoga o tou teli odoososo oso o tou ee medee tekepo tolone badebei ogoloso yimapoo goomogalaiso.

<sup>44</sup> Esiga ayo nimapoo taka, wiligi odoososo oso o tou teli odoososo oso tou medee tekepo tolone badebei ogoga, yayo see yimapoo o bi susuga ee bamelee dalaiso.

<sup>45</sup> Esino tou tokenee teli odoososo oso o wiligi odoososo saga sibilega poogooga eyo nediliyo egeesee takalai malaiso, ‘Mo wiligi odoososo saga koo sibo,’ doloso, emegei sobo sabolo giso sabolo tou teli odoososo abo woomele poogoloso, wo sabolo yugune sabolo ee nolone halabolone badalaiso.

<sup>46</sup> Yo egeesee badolone mopoodoo delega badebei mapoo, o wiligi odoososo sibilesopeledabalaiso. Egeeseega o wiligi odoososo sibilesoyo Godee mapoo odoosokoo mesilisabolo badalame, yodiya woomelesopeegootogobigileiso.

<sup>47</sup> Esiga tou teli odoososo o wiligi odoososo goomoga goo ee gooleedolosou ee telega poogolosomopoodoo delega badoga, yodiya woolaiso.

<sup>48</sup> Esino tou teli odoososo o wiligi odoososo goomoga goo ee gooleedelega badolone goo ee telega badoga yohaga woolaime. Esiga Godeeye edebeeyoyou toowa talame goo gooleetekepo teneeso. Esiga yogoomogoso, goo gooleetekepo sabolou ee toowatolone badalame. Osolosogodeeye edebeeyou pepookotalame goo gooleetekepo teneeso. Esiga yogoomogoso, goo gooleetekepo sabolou pepooko ee tolone badalame.

*Mesie goo mauwe, esino domo pilei moloso  
(Mat 10:34-36)*

<sup>49</sup> Ayo odoosusugadomopulosodougigalagalame mi toowamapooka simi. Esinoduosopaiya ee agalai a goomogo.

<sup>50</sup> Esino ayo dala talai biame olo siboso. Esiga amapoo goohele toowa osomoloso. Esino ayo dala ma kuloduga gaduga, goohele amapoo egeemolo amapoo mauwe pagalaiso.

<sup>51</sup> Esiga niyo goo goolee oso a mipoo hamapoo mesie goo tosimidoo dee gweliyo? Haye, domo pilei goo ee tosimi.



<sup>52</sup> Esiga epedee domo hamaga dulone soosoo ma kulodu domo pimalaiso.

<sup>53</sup> Egeeseelone ama dio owolo giso holo dio domo pileiso. Osoloso owee dio owolo sobo holo dio domo pileiso. Osoloso gisowo owee dio osobo dio domo pileiso.”

*Gooso peledabalai biame ee medee ogoloso gooleedalai*

*(Mat 16:2-3)*

<sup>54</sup> Yesuye see odoo susuga mapoo egeesee takaso, “Niba kei ma dokodoo ogoga hemiye mologa, niyo egeesee takeliso, ‘Epedee howo sibilodoo,’ deliso. Egeeseega howo tei sibiliso.

<sup>55</sup> Osoloso niba kei ma dokodoo ogoga kolobo me poogoloso kei dasege mologa, niyo egeesee takeliso, ‘Epei mi kibolodoo,’ deliso. Egeeseega mi kibiliso.

<sup>56</sup> Niba goo bakadio gweli odoo! Howo sibilei goo sabolo osoloso mi kibilei goo sabolo niba olo gooleedooso. Esino bei kasi maga niba epedee hamapoo goo egee peledoboo ogoloso gooleedel-ega ka dabala?”

*Namapoo goweli odoo sabolo mesie*

*(Mat 5:25-26)*

<sup>57</sup> “Niba kasi maga nisono goo tekepo talai goo ee gooleedelega ka dabala?”

<sup>58</sup> Esiga namapoo goweli odoo oso no goo midilei mapoo ido duga, no saga eli domopoo yibolo dulone yayo namapoo gowe egee molo pagalame yibolo emegei dee. Esino nayo goo egeesi moodelega poogooga, yayo no goo midili odoo

mapoo ido peleso nee goo midileiso. Egeeseega see goo midili odoosoo no neliga moso gibadeli odoosoo mapoo tenelaiso. Egeeseega see yayo no neliga moso ma kulodu toosoolaiso.

<sup>59</sup> Esiga ayo namapoo taka, no neliga moso ee ma kulodu badolone, nayo peegoo dilei eli agalaime. Esino molee yayo hesia sabolo tobuloso nayo yimapoo teneega, no peegoo dileiso.”

## 13

*Niba nibada goo tokenee maga miligi pilega poogooga, niba wedileiso*

<sup>1</sup> Biame omapoo odoosoo abo oso sibilesosoo Yesu mapoo Gelili odoosoo abosoo Godee mapoo gala hu wooloso tenelone doboome, Paileteeye diba piligu goo ee oposusoso.

<sup>2</sup> Esemee Yesuye nei dimapoo egeesee takaso, “Niyo goo hagee ogoloso kasee gooleesomo? Gelili odoosoo abo piligu odoosoo hagee biasoo Gelili odoosoo susuga ma kulodu hedebe diayo goo tokenee toowa tomo silesibume ka seeyo?

<sup>3</sup> Haye, egeeseenee. Esino niyo nibada goo tokenee maga miligi pialosoo Godee mapoo bidiga debelega poogooga, goo hedebe egeesee noseenimapoo peledabalaiso.

<sup>4</sup> Osolosoo niba goo hee hagee goolee. Sailowam mi mapoo moso egi doko tegei oso goboolone odoosoo 18 piligusoo. Odoosoo 18 piligu hagee biasoo Yelusalem odoosoo ma kulodu hedebe diayo goo tokenee toowa tomo silesibume ka seeyo?

<sup>5</sup> Haye, egeeseenee. Esino niyo nibada goo tokenee maga miligi pialoso Godee mapoo bidiga debelega poogooga, goo hedebe egeesee nosee nimapoo peledabalaiso.”

<sup>6</sup> Osoloso Yesuye dimapoo wudu taka hee hagee takaso, “Odo heeso geleipi ko segei ma kulodu pigi homo tabameleeso. Esino biame heeso segeli odo oso pigi ko goolame agalame simiso. Esino sibilesa egeino, pigi ko pelega molome egeiso.

<sup>7</sup> Esemé yayo o homolee bali tou teli odo mapoo egeesee takaso, ‘Dugo bakadio hedebe di ma kulodu a goomogaso, pigi homo hagoso ko poga nalame. Esino yo ko pele. Esiga heemagee. Yayo mo homolee ma kulodu molone mi tekepo ee namalai tekeponee,’ diso.

<sup>8</sup> Esemé o tou teli odo oso yimapoo egeesee takaso, ‘Iba epedee dugo hedebe ma kulodu bolone, ayo medee mi nemalaiso.

<sup>9</sup> Egeesi ma kulodu yayo ko poga, tekepo. Esino yayo ko pelega poogooga, omapoo iba homo su egee heemagalaiso,’ diso.”

*Yesuye sobo gauwuloso sili tekepo moodoo*

<sup>10</sup> Yu odoowo hasali biame hee mapoo Yesuye dia howo gisili moso mapoo peleso eligimeleeso.

<sup>11</sup> Biame omapoo sobo hee dugo 18 ee ma kulodu badolone bo holoso o kulodu badoboome, yayo biame susuga ma kulodu gauwuloso siliso.

<sup>12</sup> Esino Yesuye yo ogoloso yo malalo hapoo sibe doloso yimapoo egeesee takaso, “Sobo no biame susuga ma kulodu gauwuloso egee silo epedee hamapoo olo mauwe poogooso,” diso.

<sup>13</sup> Egeesee takoloso Yesuye o deeso sobo ee sigeso. Esememe biame omapoo sobo gauwuloso sili ee see hoododoloso tekepo silame bei mooloo-gooloso Godee mapoo goomoga poudooso.

<sup>14</sup> Esememe howo gisili moso wiligi odoo taba oso Yesuye diayo hasali biame mapoo sobo tekepo moodoo ogoloso diya komonolone odoo susuga mapoo egeesee takaso, “Sadee hedebe ma kulodu biame 7 moloso. Esiga odoo susuga oso biame 6 ma kulodu tou talai tekepo. Esiga niyo biame 6 hama kulodu odoo paiye susuga gilimado sibilesa tekepo moodoolai tekepo. Esino niyo iyo hasali biame mapoo sibilesa goo egeesi moodoolai tekeponee,” diso.

<sup>15</sup> Esememe Lodeeye nei yimapoo egeesee takaso, “Niba goo bakadio gweli odoo. Bei, niba susuga oso hasali biame mapoo bulumakau ebigi pidiga buguloso howo nalame hado diliso.

<sup>16</sup> Esiga niyo iyo hasali biame mapoo nibada be hu pidiliso. Esino iyo hasali biame mapoo Eibal-ahameeyo eiye hagee tiso tia masi tiamolome pidibugu egee tekeponeeyo? Bei, Saitenso kitulugu oso sobo hagee dugo 18 ee ma kulodu tiso tialoso melee masi meleeso.”

<sup>17</sup> Yesuye to hagee taka goo oso yimapoo kamanali odoo mapoo simili goo teneeso. Esino odoo abo oso Yesuye goo medee tekepo moodoog-amo sili ogoloso diya goomogaso.

*Godeeye wiligi doloso badeli goo ee Yesuye wudu takolone eligi*

*(Mat 13:31-33; Maka 4:30-32)*

<sup>18</sup> Osoloso Yesuye see dimapoo egeese takaso, “Godeeye wiligi doloso badeli goo ee kaseeyo? Ayo ogoo goo maga Godeeye wiligi doloso badeli goo ee nimapoo ka eligileiyo?”

<sup>19</sup> Esiga Godeeye wiligi doloso badeli goo ee egeesi masi moloso. Odo heeso ko pepooko masted deli todiles o homolee mapoo segeiso. Esiga ko pepooko oso peleso homo toowa poloso, dee bo moodooga, soso sibiles o mapoo ou tegegeliso.

<sup>20</sup> Ayo ogoo goo maga Godeeye wiligi doloso badeli goo ee nimapoo ka eligileiyo?

<sup>21</sup> Ee egeesi masi. Soboso palawa wo silame, daga homolone palawa wo toowa ma kulodu yist pepooko kuko siliso. Egeeseega yist pepooko oso palawa wo ee diya kodiliso.”

### *Osulu pepooko*

*(Mat 7:13-14, 21-23)*

<sup>22</sup> Yesuye Yelusalem mapoo dulone, mosobia pepooko abo eli domopooga dagamo dulone, Godeeyo to eligimo diso.

<sup>23</sup> Egeeseemo dumolome odo heeso Yesu mapoo egeese woosaso, “Lodee, odo wulo hedebe bakadio oso gie badeli ka talaiyo?” diso.

Eseme yayo nei yimapoo egeese takaso,

<sup>24</sup> “Niba osulu pepooko maga gadilame diya kitulugi. Bei, ayo nimapoo taka, odo susuga oso osulu pepooko omaga gadilame diya kituluguleiso, esino diba o mapoo gadilei tebileime.

<sup>25</sup> Bei, moso eyo amaye toboloso osulu kisileiso. Egeeseega niyo peegooga silesibulone

osulu yamagalame osulu mapoo kalamadileiso. Egeeseelone egeesee takalaiso, ‘Wiligi odoo, iba gasibileiya osulu yamagee,’ dalaiso.

Esino yayo egeesee takalaiso, ‘A niba gooleedele. Niba mi kamaga sibadeeyo?’

<sup>26</sup> Egeeseega niyo nei egeesee takalaiso, ‘Iba nobolo hodobo silesibulone wo sabolo howo sabolo namo siliso. Osoloso ibada mi mapoo nayo imapoo to tekepo eligimo siliso,’ dalaiso.

<sup>27</sup> Esino yayo nimapoo see egeesee takalaiso, ‘A niba gooleedele. Niba mi kamaga sibadeeyo? Niba ayo hagee bado mapoo na sibadee. Amaga peegoo diyadee, niba goo tokenee tomo silesibili odoo,’ dalaiso.

<sup>28</sup> Esiga niba Godeeye wiligi doloso badeli mi maga peegoo poogooga, peegooga dobolone, Eibalaham dio Yekob dio osoloso Aisek dio osoloso Godee maga to toloso kokodo takomo sili odoo susuga oso Godeeye wiligi doloso badeli mi mapoo do ogoloso gooholone mei kumudoo sabolo dobolone pupusiga malaiso.

<sup>29</sup> Osoloso mipoo toowa hamapoo debeli mi susuga maga odoo susuga oso Godeeye wiligi doloso badeli mi mapoo wo nalame sibilesi dalaiso.

<sup>30</sup> Esiga odoo susuga eyo howo woola odoo hu toowa toloso epedee hagee do, ee see hamamee Godeeyo howo woola odoo wuluge masi dalaiso. Esino odoo susuga eyo howo woola odoo wuluge epedee hagee do, ee see hamamee

Godeeyo howo woola diba hu toowa toloso dabal-aiso.”

*Yesuye Yelusalem goolee goo*  
(*Mat 23:37-39*)

<sup>31</sup> Biame omapoo Pelisi odoo aboso sibilesu Yesu mapoo egeesee takaso, “No mi hagee poogoloso see mi hee mapoo di. Bei, Helodeeye no wooloomalame ina,” diso.

<sup>32</sup> Esemene nei Yesuye dimapoo egeesee takaso, “Niba dileso dobu so masi Helodee mapoo takee, ‘A epei osoloso godigi mapoo bo holo paladee odoo sabolo osoloso odoo paigiga sabolo ee tekepo moodoolone badalaiso. Osoloso see biame bakadio hedebe di mapoo a mo tou hosudalaiso,’ dee takee.

<sup>33</sup> Tei taka, epei sabolo osoloso godigi sabolo osoloso biame hee sabolo mapoo mo tou ee osee tomo dileiso. Bei, edebeeyo Godee maga to toloso kokodo takomo sili odoo ee Yelusalem mi peegoo wooloomalai tekeponee.

<sup>34</sup> Yelusalem, Yelusalem, nayo kasi maga Godee maga to toloso kokodo takomo sili odoo piliguloso see Godeeye diye di odoo ee piligilame yoso ka enigeliyo? A biame kasolo mapoo kolokoloso o pe medee gilimadoloso wili egeesee selame ayo nee holo gilimado sibilame goomegeliso. Esino no koo goomegeli.

<sup>35</sup> Esiga Yelusalem odoo, niba dui. Nibada tei moso ee mosoowe malaiso. Esiga ayo nimapoo taka. Niyo a see agalaime. Esino biame oso siboga, niyo egeesee takalaiso, ‘Odo Godeeyo hu

maga kitulugu sabolo egee sibo Godeeye yimapoo goomogoso,' dalaiso. Biame omapoo niyo a see agalaiso.”

## 14

### *Yesuye Pelisi odoowo mosopoo di*

<sup>1</sup> Yu odoow diayo hasali biame heeso Yesu Pelisi odoowo wiligi odoow taba eyo mosopoo peleso nei nalame badebeiso. Esem e odoow susuga oso Yesu mapoo medee hodu dileso yimapoo balaga meleeso.

<sup>2</sup> Bei, moso ee ma kulodu odoow hee paiye toowa oso toloso o su susuga tidodoloso molome egeiso.

<sup>3</sup> Egeesee ogoloso Yesuye Pelisi odoow sabolo osoloso tei eligili odoow dimapoo egeesee takaso, “Iyo hasali biame mapoo odoow tekepo moodolai ee ibada teiyo?” diso.

<sup>4</sup> Esino diba to hee takele. Esem e Yesuye odoow ee o deeso sigime tekepo paso. Osoloso yo diye diso.

<sup>5</sup> Osoloso yayo see Pelisi odoow sabolo osoloso tei eligili odoow sabolo mapoo egeesee takaso, “Nima kulodu nibada holo hee, o, bulumakau egeesi oso iyo hasali biame mapoo midoo ma kulodu todobuoga, yo peegoo tamagelega pagalaisomo? Haye. Niyo yo midoo ma kuloduga peegoo tamagalaiso,” diso.

<sup>6</sup> Esem e diayo Yesu mapoo nei takalai me pogooso.

*Eyo nediliyo toowa dalai sabolo osoloso pe-pooko dalai goo sabolo*



<sup>7</sup> Yesu moso ee ma kulodu badolone egeino, odoosuga oso wo ne mapoo sibulone odoosuga hu toowa too oso bili mapoo bulumalame diya goolee sabolo sibume egeiso. Esemes Yesuye wudu taka hagee dimapoo egeeseetako,

<sup>8</sup> “Odoos heeso namapoo takolone sobo hu wo ne mapoo sibeye daga, no sibilesos wo nalame saga dilesos odoos hu toowa too oso bili mapoo na bie. Bei, odoos hu toowa too hee nama hamamee sibilei malaiso.

<sup>9</sup> Egeeseega mosowo amaye namapoo egeeseetako, ‘Nayo egee bado mapoo odoos toowa oso bie dee. Esiga no tobolos hamamee koo bilame di,’ dalaiso. Egeeseega no hamamee mapoo bilame diya simiye sabolo dilesos bileiso.

<sup>10</sup> Esino sobo hu wo nalame no sibeye daga, no sibilesos hamamee bie. Egeeseega mosowo amaye no hamamee mapoo badebei ogolosos no see malalos koodos peleos bie dalaiso. Osolosos wo ne mapoo buluma odoos oso goos hagee ogolosos no odoos toowa dalaiso.

<sup>11</sup> Esiga odoos agayos eyo nediliyos yo toowa daga, nei yos Godeeye pepookos dalaiso. Esino odoos agayos eyo nediliyos yo pepookos daga, nei yos Godeeye toowa dalaiso.”

<sup>12</sup> Osolosos Yesuye see yos sibeye dee taka Pelisios odoos mapoo egeeseetako, “No wo toowa nalame nee odoos sabolos osolosos nemei dios sabolos osolosos nee soosos sabolos osolosos nee bi bei odoos sabolos na gilime. Bei, nayo diba gilimaga, nei diayos dibolos hodobos wo nalame no idileiso. Egeeseega no nei hee talaimes.

<sup>13</sup> Esino no wo toowa nalame mopoodoo doloso wulo bi mauwe odoo sabolo, osoloso kido todobia odoo sabolo, osoloso su kakawa poogoo odoo sabolo, osoloso howo si odoo sabolo ee gilime.

<sup>14</sup> Bei, nayo goo hageesi moodooga, Godeeye namapoo nei tenelaiso. Bei, diayo nei namapoo egeesi pidilei tebile. Esiga Godeeyo howo woola tekepo debeli odoo oso wedia maga hogadilei biame omapoo Godeeye namapoo nei tenelaiso.”

*Wo ne toowa eyo goo maga wudu taka  
(Mat 22:1-10)*

<sup>15</sup> Yesubolo hodobo wo nolone debei odoo heeso to hagee duloso Yesu mapoo egeesee takaso, “Godeeye wiligi doloso badeli mi mapoo peleso hodobo wo nalai odoo diba diya goomogalaiso,” diso.

<sup>16</sup> Eseme Yesuye yimapoo egeesee takaso, “Odo heeso wo toowa nalame mopoodoo doloso odoo susuga gilimaso.

<sup>17</sup> Osoloso wo olo nalame o tou teli odoo hee mapoo dilesa yayo gilimadoo odoo ee iyado sibe diso.

<sup>18</sup> Eseme o tou teli odoo oso diba gilimalame simi ogoloso diayo wo ne mapoo sibilei gowoolone goo abo maga gamenee goo takaso. Egeesee odoo heeso yimapoo egeesee takaso, ‘A mi neiso epedee too. Esiga a dilesa mi egee agalaiso. Esiga nayo dilesa nee wiligi odoo mapoo takee, a wo ne mapoo sibileimego dee takee,’ diso.

<sup>19</sup> Eseme see odoos heeso egeesee takaso, 'A bulumakau 10 neiso epedee too. Esiga bulumakau egee sabolo tou talai teiba beleso dibolo tou talame dileiso. Esiga nayo dileso nee wiligi odoos mapoo takee, a wo ne mapoo sibileimego dee takee,' diso.

<sup>20</sup> Osoloso see odoos heeso egeesee takaso, 'A sobo epedee hu. Esiga a wo ne mapoo sibileime,' diso.

<sup>21</sup> Odoos susuga oso egeesee takageme, to todili odoos oso see wedi dileso o wiligi odoos mapoo odoos susuga oso taka goos susuga ee yimapoo takaso. Eseme wo ne eyo wiligi odoos taba oso diya komonolone see o tou teli odoos mapoo egeesee takaso, 'No saga dileso mosobia domopoo bi mauwe odoos sabolo, osoloso kido todobia odoos sabolo, osoloso su kakawa poogoo odoos sabolo, osoloso howo si odoos sabolo iyado sibe,' diso.

<sup>22</sup> Eseme o tou teli odoos oso saga dileso odoos iyado sibilesos o wiligi odoos mapoo egeesee takaso, 'Wiligi odoos, ayo odoos abo olo iyado simiso. Esino debi pooba abo odoos mauwe moloso,' diso.

<sup>23</sup> Eseme wiligi odoos oso see o tou teli odoos mapoo egeesee takaso, 'No see dileso odoos eli domopoo egee silesibo sabolos osolosos wadou moso mapoo debeli odoos ee hapoo sibilame to kitulugu sabolos takee, mo moso kulodu debi pooba ee edebeeyo tolo tebilame.

<sup>24</sup> Esiga ayo namapoo taka, wo ne hagee ma kulodu odoos daga ayo gilimome sibilei gowe odoos oso wo ayo mopoodos doo nalaimo,' diso."

*Yesu dadalai goo ee kaseeyo?*  
(*Mat 10:37-38*)

<sup>25</sup> Odoos susuga oso Yesu dedeme, Yesuye dimapoo bidi toboloso tobudulone egeesee takaso,

<sup>26</sup> “Odoos agayo ama sabolo, osoloso owee sabolo, osoloso osobo sabolo, osoloso owolo sabolo, osoloso o soosoo sabolo, osoloso o gie badeli sabolo mapoo diya goolone, nei a goolee pepooko daga, yo ayo di hamamee deede sibilei tebile.

<sup>27</sup> Osoloso odoos agayo talai sabolo dala toowa talai sabolo goo medee moodelega poogoloso ayo di hamamee dedelega poogooga, yo ayo di hamamee deede sibilei tebile.

<sup>28</sup> Edebeeyo kulo moso tegelame gooleega, yo daga badolone yayo kulo moso tegelai molee teiba beleso agalame hesigileiso.

<sup>29-30</sup> Bei, yo daga molee hesigelega tou bei mooloogooga, molee hosudoga, tou hoo malaime. Egeesega odoos susuga oso moso ee togodelega poogoo ogoloso manolone yiligilone egeesee takalaiso, ‘Odoos hagee moso tegelame bei mooloogooso. Esino hosudalai tebile,’ dalaiso.

<sup>31</sup> Wudu taka hee hagosoo. Mi bakadio oso ha talaiso. Egeesi ma kulodu mosodei heeso odoos 10,000 gilimado sibileiso. Osoloso mosodei heeso odoos 20,000 gilimado sibileiso. Esino odoos 10,000 gilimadoo ha teli wiligi odoos taba oso daga medee badolone, odoos 20,000 mapoo ha talai teiba beleso goo ee goolone badalaiso.

<sup>32</sup> Osoloso yayo o odoo sabolo odoo 20,000 mapoo ha talai ee koo tobuoga, yayo o odoo hee odoo 20,000 gilimado simi dia wiligi odoo taba mapoo to todi dalaiso, yibolo see mesilame.

<sup>33</sup> Esiga odoo agayo ama hamamee dadalame gooleega, yayo o bi susuga poogoloso a ka deede sibe.

<sup>34</sup> Solu ee bi tekepo. Esino solu hadali me daga, nayo solu ee see hadalame kasee moodoolaiyo?

<sup>35</sup> Esiga solu egee goo mauwe mologa, odoo susuga oso solu egee togobigileiso.

Odoo niba dulubolo, esiga ayo hagee takoo medee hoodo dui.”

## 15

*Yesuye sipi be osugoba maga wudu taka  
(Mat 18:12-24)*

<sup>1</sup> Tekisi molee misigeli odoo sabolo osoloso goo tokenee teli odoo sabolo Yesuwo to dulame sibilesa debeiso.

<sup>2</sup> Esino Pelisi odoo sabolo osoloso tei eligili odoo sabolo oso goo hagee ogoloso gowoolone egeesee takaga meleeso, “Odoo hagoso tokenee teli odoo ee gilimadoloso dibolo hodobo wo namo siliso,” diso.

<sup>3</sup> Esemé Yesuye wudu taka hagee dimapoo takaso,

<sup>4</sup> “Sipi be hu bali odoo oso o sipi 100 bameleeso. Egeesi ma kulodu hedebe osugobooga, yayo ogoo goo moodoolaisomo? Yayo go woolalowe poogoo mapoo o sipi be abo 99 omapoo holoogoloso, see hedebe osugoba ee esiamo dileiso.

5-6 Yayo esiameloso ogoga, yo goomogolone sipi be ee mosopoo imado sibileiso. Osoloso o odo o abo ee gilimadoloso egeesee takalaiso, ‘Mo sipi be osugoba epedee olo egeiso. Esiga niba sibilesa abolo goomoga poude,’ dalaiso. <sup>7</sup> Esiga ayo nimapoo taka, Kei mi mapoo odo 99 Godeeyo howo woola tekepo debeli dia goo mapoo goomoga goo oso osee moloso. Esino goo tokenee teli odo hedebeso o goo tokenee maga miligi pialoso see Godee mapoo bididoobooga, Kei mi mapoo goomoga toowa oso malaiso.”

*Yesuye molee ko oso osugoba maga wudu taka*

<sup>8</sup> “Biame hee mapoo sobo hee o molee ko 10 ma kulodu hedebese osugobalaiso. Eseega yo ogo goo moodoolaisomo? Yayo keme pudoloso esiamo silone, o moso kulodu goko oso kakabalaiso.

<sup>9</sup> Osoloso yayo o molee ko osugoba ee ogoga, yayo o odo ee iyadoloso egeesee takalaiso, ‘Mo molee ko osugoba epedee olo egeiso. Esiga niba sibilesa abolo hodobo goomoga poude,’ dalaiso.

<sup>10</sup> Esiga ayo nimapoo taka. Goo tokenee teli odo hedebeso o goo tokenee maga miligi pialoso see Godee mapoo bididoobooga, Godeeyo momaiye susuga Kei mi ma dokodoo egee do oso goomoga toowa poudileiso.”

*Yesuye holaisoso peegoo dobudo di maga wudu taka*

<sup>11</sup> Yesuye see wudu taka hee hagee odo mapoo egeesee oposususo, “Odo hee owolo giso holo bakadio debeiso.

<sup>12</sup> Esino biame heeso omoloye ama mapoo egeesee takaso, ‘No toga nee bi ayo talai malalo

epedee amapoo tenee,' diso. Esemé amaye owolo bakadio ee ma kulodu o bi abo puloso dimapoo piso.

<sup>13</sup> Esemé omoloye biame abo poogoloso hamamee amameeye yimapoo bi pi ee toloso see odoo abo mapoo neiso toloso see mi hee eli sage mapoo diso. Yo omapoo dileso tokenee goo ma kulodu badolone, o molee toowa hosudooso.

<sup>14</sup> Yayo o molee toowa hosudoloso melee biame omapoo mi kibiya oso mi omapoo hodia goo meleeso. Esemé yayo see gilibo holo masi badolone, hodia goo toowa egeliso.

<sup>15</sup> Esiga yayo molee tou talame mosobia odoo hee mapoo dileso peledabaso. Esemé mosodei odoo ogoso yo o go mapoo dileso o be bamelee diso.

<sup>16</sup> Esemé yo dileso be hu nei nolone beso nali nei ee ogoloso nalame gweliso. Esino odoo heeso beyo nei sabolo osoloso nei abo sabolo yayo nalame koo tosibili.

<sup>17</sup> Yayo egeesee badebei ma kulodu, biame heeso yimapoo goo goolee tekepo oso sibume, yayo egeesee gooleeso, 'Mo mamó tou toloso nei teli odoo susuga ee hodia sabolo koo debeli. Esino a hamapoo hodia sabolo badolone talame ka seeso.

<sup>18</sup> Esiga a see wedi dileso mo ma mapoo egeesee takalaiso: Ma, ayo Godee mapoo osoloso namapoo goo tokenee olo tooso.

<sup>19</sup> A tokenee odoo. Esiga nayo see epedee amapoo mo holo dalai tekeponee. Esino tekepo,

nayo a nee tou toloso nei teli odoos hee dee takee,' diso.

<sup>20</sup> Osoloso yo amameeye badebei mi mapoo diso.

Esino yo eli sage abaga osee sibumolome, amaye ogoloso owolo diya sooloo dolone, yayo saga hoguo dileso owolo mapoo boooloomaloso adaso.

<sup>21</sup> Esemew owoloye yimapoo egeesee takaso, 'Ma, a Godee mapoo osoloso namapoo goo tokenee olo tooso. A tokenee odoos. Esiga nayo amapoo mo holo dalai tekeponee,' diso.

<sup>22</sup> Esino amaye o tou teli odoos mapoo egeesee takaso, 'Dugo tekepo sabolo osoloso homo bi sabolo osoloso dee sesa mapoo kali ki bi sabolo saga tosibilesa yimapoo kadige.

<sup>23</sup> Osoloso mo gala hu ma kulodu bulumakau be hu kauwa wooloso si. Osoloso hodobo wo nolone goomogalaiso.

<sup>24</sup> Bei, mo holo hagee olo tano, see epedee gie badoso. Osoloso olo dobudo diso, esino epedee ogoso,' diso. Esiga diayo hodobo wo nolone goomoga poudooso.

<sup>25</sup> Diba egeesee lone doboome, emei o homolee ma kulodu tou temeleso sibulone, amayo moso kulodu odoos susuga goomogolone hopolone kosaia pegigamolome duso.

<sup>26</sup> Esemew yayo o tou teli odoos hee idoloso yimapoo woosaso, 'Mo mamomoso ma kulodu ogoo goo tolo?' diso.

<sup>27</sup> Esemew o tou teli odoos oso yimapoo egeesee takaso, 'Nomolo epei simiso. Esiga namaye owolo



yo medee tekepo wedi simi ogoloso, goomogolone bulumakau be hu kauwa wooloso siloso wo toowa ka nalagamoloso,' diso.

<sup>28</sup> Esememe emei goo hagee duloso komonolone wo ne mapoo dile. Esememe amaye sibilesa o daga holo yo wo ne mapoo gadilame giso.

<sup>29</sup> Esino yayo ama mapoo egeesee takaso, 'Ayo dugo susuga ma kulodu nee tou teli odoo masi silone nee to mapoo mesimo silone tou toowa temeleso. Esino nayo gout be hu pepooko wooloso amapoo takolone, nee odoo sabolo neye, dee takele.

<sup>30</sup> Esino nowolo hagoso nee bi sabolo nee molee sabolo tolosa domo sili sobo sabolo badolone hosudoloso sibume, nei nayo yimapoo goomogolone be kauwa wooloso wo toowa nolone ka dabala?' diso.

<sup>31</sup> Esino amaye owolo mapoo egeesee takaso, 'Mo holo, nayo biame susuga abolo badebeiso. Esiga mo bi susuga ee nee.

<sup>32</sup> Esino epei iba goomogalai tekepo. Bei, nomolo hagee olo tano, epedee yo see gie ka badoso. Osoloso yo osugobano, see epei yo ogoso,' diso."

## 16

### *Molee gibadeli odoo maga wudu taka*

<sup>1</sup> Yesuye o hamamee dili odoo mapoo egeesee takaso, "Biame heeso bi bei odooso o molee gibadeli idoloso badebeiso. Egeesi ma kulodu bi bei odoo o molee gibadeli odoo oso o molee mada namelee goo ee yo duso.

<sup>2</sup> Osoloso yayo o molee gibadeli odoo ee idoloso yimapoo egeesee takaso, 'Nayo mo molee tokenee bameleena. Esiga no tekepo, nayo tou temelee goo susuga ee booka mapoo hoguguloso amapoo eligi. Bei, nayo see mo molee gibadalai tekeponee. Esiga no tou epedee pagalaiso,' diso.

<sup>3</sup> Esememe molee gibadeli odoo oso egeesee gooleeso, 'Mo wiligi odoo oso mo tou ee olo pee-goo magooso. Esiga a see ogoou tou toomoba? A nei howo segelame mi gabalai a kitulugu mauwe. Osoloso ayo odoo mapoo wulo hoowamo silei diya simileeyo.

<sup>4</sup> Esino ayo mo tou poogooga, mo odooso a dia mosopoo ido palame, ayo goo talai epedee olo gooleedoso.'

<sup>5</sup> Egeesee gooloso yayo o wiligi odoo mapoo bi wulayo temelee odoo ee gilimadooso. Osoloso daga odoo hee mapoo egeesee takaso, 'Nayo mo wiligi odoo mapoo bi wulayo too eyo nei tenelega ka pagala? Nei kasolowo?' diso.

<sup>6</sup> Esememe odoo ogoso nei egeesee takaso, 'Ayo mo dalamoo 100 mapoo olipi i keedoo ee nei tenele,' diso.

Esememe molee gibadeli odoo oso nei yimapoo egeesee takaso, 'Wiligi odoo o booka hagosoo. Esiga no saga buloso booka hamapoo nayo dalamoo 100 mapoo olipi i keedeme hogugu ee tabuguloso, see dalamoo 50 mapoo olipi i keedoo ono too doloso hogugi,' diso.

<sup>7</sup> Osoloso molee gibadeli oso see odoo hee mapoo egeesee takaso, 'Nayo mo wiligi odoo mapoo bi wulayo too eyo nei tenelega ka molo-somo? Nei kasolowo?' diso.

Eseme odoo ogoso nei egeesee takaso, ‘Ayo mo wogai 100 mapoo palawa wo soo too eyo nei tenele,’ diso.

Eseme molee gibadeli odoo oso yimapoo nei egeesee takaso, ‘Wiligi odoo o booka hagoso. Esiga no saga buloso booka hamapoo nayo wogai 100 mapoo palawa wo soo too hogugu ee tabuguloso, see wogai 80 mapoo palawa wo soo ono too doloso hogugi,’ diso.

<sup>8</sup> Esino o wiligi odoo oso goo hagee duloso o molee tokenee gibadeli odoo mapoo egeesee takaso, ‘Nayo odoo abo pidi goo oso see hamamee no pidileiso,’ diso.”

Eseme Yesuye see egeesee takaso, “O, mi odoo oso eyo nediliyo goolone emegei dimaga pidili goo susuga ee medee gooleedooso. Esino Godeeyo odoo oso goo egeesi moodoolai kibiya gooleedele.

<sup>9</sup> Esiga ayo nimapoo taka, niyo mipoo toowa hamapoo dobolone, nibada molee sabolo osoloso nibada bi sabolo oso emegei pidi osoloso emegei dolone ka debee. Niyo egeeseega nei bi egee mauwe poogooga, Godeeye niba Kei mi ma dokodoo kookaiyo moloso osee malai moso omapoo ido palaiso.

<sup>10</sup> Esiga edebeeyo goo pepooko medee kibiya bamologa, yo see goo toowa balai tebileiso. Osoloso odoo agayo goo pepooko balai tebilega poogooga, yo goo toowa balai tebileime.

<sup>11</sup> Esiga niyo mi toowa eyo bi medee belega poogooga, see niyo Kei mi eyo goo ee medee kasee balaisomo?

**12** Osoloso see niyo nee odoowo bi medee belega poogooga, odoo agayo nee bidee ee no balame namapoo ka tenelaiyo?

**13** Esiga edebeeyo wiligi odoo bakadio eyo to mapoo mesiloso silone tou talai tebile. Bei, yo o wiligi odoo hee goomogolone hee gowoolaiso. Egeeseelone yayo wiligi odoo heeyo to mapoo mesiloso silone, see heeyo to mapoo mesileime. Esiga edebeeyo Godee mapoo mesimo silone molee toowa tolosa badalai goo mapoo mesilei tebile.”

**14** Esem Pelisi odoo oso Yesuye to taka hagee duloso manolone yiligaso. Bei, Pelisi odoo hagee bia molee diya goomegeli.

**15** Esem Yesuye dimapoo egeese takaso, “Niba wulo edebeeyo tekepo odoo dalame, odoo howo woola gamenee goo tekepo moodeliso. Esino ee ma kulodu Godeeye niyo goo goolee olo gooleedooso. Esiga edebeeyo nibada goo ogoloso tekepo deli ee nei Godeeye nibada goo ee diya tokenee deliso.

**16** Godeeye tei magoo Moses mapoo tenee ee hogugu sabolo osoloso Godee maga to tolosa kokodo takomo sili odoo oso to hogugu oso odoo abaga gilimado simino, Yoneeye badebei biame omapoo peledabaso. Osoloso Yoneeyo biame poogoloso hamamee mapoo to tekepo Godeeye wiligi doloso badeli goo ee odoo mapoo takaso. Esiga edebeeyo Godeeye wiligi doloso badeli goo mapoo gadilame diya ka kituluguso.

<sup>17</sup> Esiga mipoo sabolo kei sabolo oso me pagalai ee teiba. Esino Godeeye tei magoo hogugu ee ma kulodu hu bei pepuso hee peegoo pagalai tebile.

<sup>18</sup> Esiga edebeeyo osobo poogoloso, see sobo hee huga, yo sobo egee goo heli toso. Osoloso edebeeyo sobo omoye poogoo huga, yo odo heeyo osobo ee peedee huso.”

*Bi bei odo dio Lasales dio*

<sup>19</sup> “Biame heeso bi bei odo badebeiso. Yo biame susuga dugo kali bi tekepo kaloso badolone nei medee tekepo nolone badebeiso.

<sup>20-21</sup> Biame domo mapoo bi mauwe odo badebeiso, o hu Lasales. Yo o su susuga e buloso badebeiso. Esino yo biame susuga bi bei odoowo moso osulu miyopoo iboduloso badolone bi bei odo oso nei ne kokou mou ee nalame goomegeliso. Osoloso soso sibilesa o e mapoo pieliso.

<sup>22</sup> Osoloso biame abo poogoloso hamamee bi mauwe odo Lasales taso. Esem Godeeyo momaiye oso yo todilesa Eibalahameeye badebei koola mapoo ibediso. Osoloso hamamee bi bei odo taso. Esem odo aboso o su midoosooso.

<sup>23</sup> Yo tolosa abaga dino odo wedia oso debeli mi mapoo dala ma kulodu badebeiso. Yo omapoo badolone, dokodoo egeino, Eibalaham eli sage badoboome ogoloso, yima koola mapoo Lasales badoboome egeiso.

<sup>24</sup> Esem yo ilone egeese takaso, ‘Ma Eibalaham, nayo a sooloo dele. Osoloso Lasales amapoo sibeye dee, yayo sibilesa o dee wolugu oso howomoo olugudoloso, mo i mapoo sigoga,

kekebie palame. Bei, a dou hagee ma kulodu dala sabolo bado,' diso.

<sup>25</sup> Esino Eibalahameeye nei egeesee takaso, 'Mo holo, no goolee. Nayo gie badebei biame omapoo bi medee tekepo ono temeleso. Esino Lasales yo bi mauwe gilibo holo masi badebeiso. Esiga epedee Lasaleseeeye hamapoo goomoga sabolo badoga, nei nayo dala ma kulodu ka badoso.

<sup>26</sup> Osoloso goo hee ee, niba ogo osoloso iba ogo doloso domo omapoo goodobia diya toowa edebeeyo hodiokoo dabagalai tebile moloso. Esiga iyo hagee do omaga niyo egee do mapoo dabagalai eli mauwe. Osoloso niyo egee do omaga edebeeyo iyo hagee do mapoo dabagalai onosee eli mauwe,' diso.

<sup>27</sup> Esemé bi bei odoo oso nei egeesee takaso, 'Ma Eibalaham, ayo namapoo howaso, nayo Lasales mo mayo moso mapoo wedi diye dalame.

<sup>28</sup> Bei, mo mayo moso mapoo molo dio dee tiadoo omapoo doso. Esiga Lasaleseeeye see wedi dileso dimapoo kokodo takalai tekepo, diba toga see dala mi hamapoo sibiyaga,' diso.

<sup>29</sup> Esemé Eibalahameeye egeesee takaso, 'Dimapoo Moseseeye tei hogugu sabolo osoloso Godee maga to tolosa kokodo takomo sili odoo oso Godeeyo to hogugu sabolo olo moloso. Esiga dia goo goolee tekepo palame, diayo kokodo taka to ee dulei tekepo,' diso.

<sup>30</sup> Esemé bi bei odoo oso nei egeesee takaso, 'Haye, egeesee selaimé. Esino odoo hee ta maga see hogado sibilesa dimapoo takooga, diayo dibada goo tokenee maga miligi pialoso Godee mapoo ka sibilei,' diso.

<sup>31</sup> Esino Eibalahameeye see tobu yimapoo egeesee takaso, ‘Diayo Moseeseye tei hogugu sabolo osoloso Godee maga to tolosa kokodo takomo sili odoo oso Godeeyo to hogugu omapoo tei telega poogooga, diayo see kasi maga odoo hee ta maga hogado sibilesa to takooga, omapoo tei ka talaiyo?’ diso.”

## 17

*Tokenee goo mapoo gido dili goo  
(Mat 18:6-7, 21-22; Maka 9:42)*

<sup>1</sup> Biame heeso Yesuye o hamamee dili odoo mapoo egeesee takaso, “Edebeeyo goo tokenee mapoo gido dilei goo ee tei sibileiso. Esino goo egee bei mooloogoomo sili odoo mapoo, ayo yimapoo ka taka, ye-ee!

<sup>2</sup> Esiga odoo heeso tei too odoo hee goo tokenee mapoo gido duga, nei odoo heeso o mu mapoo yo toowa bagagoloso howo bou mapoo toosolai ee dala haga toowanee. Bei, hamamee Godeeye odoo goo egeesi moodeli mapoo dala toowa tenelaiso.

<sup>3</sup> Esiga niba niso nediliyo medee bamelee.

Osoloso nee odoo tei too odoo oso goo tokenee toga, yimapoo takee. Osoloso yayo o goo tokenee mapoo goohele sabolo o tokenee mapoo miligi piaga, o tokenee egee boobado bigi.

<sup>4</sup> Osoloso yayo biame hedebe ma kulodu namapoo tokenee too ee 7 daga, osoloso namapoo sibilesa yayo emegei di to taka onosee 7 daga, nayo o tokenee goo ee boobado bigi.”

*Tei too goo*

<sup>5</sup> Diye di odoo oso Lodee mapoo egeesee takaso, “Iyo tei too goo ee toowa moodee,” diso.

<sup>6</sup> Esemé Lodeeye nei egeesee takaso, “Niyo tei too goo oso homokoko pepooko egeesi masi nimapoo mologa, niba teiba niyo molobei hamapoo takolone, ‘No nee too sabolo tado dileso abei mapoo tebee,’ daga egeesee selaiso,” diso.

*Wiligi odoo o tou teli odoo eyo goo*

<sup>7</sup> “Tou teli odoo oso o wiligi odoowo homolee mapoo mi doomelee maga, o, sipi be hu bamelee maga siboga, yo wulo sibilesó nei nalaimé, haye.

<sup>8</sup> Yo daga o wiligi odoo taba eyo nei siloso, dugo hapoo ee kaloso, nei si ee yimapoo tenelaiso. Osoloso o wiligi odoo taba oso nei naloso koodobuoga, see hamamee yayo wo sabolo howo sabolo nalaiso.

<sup>9</sup> Esino yayo tou egeesi tomo siloga, o wiligi odoo taba oso nei yimapoo goomoga to takalaimé. Bei, egee o tou.

<sup>10</sup> Esiga niba egeesee selai tekepo. Ayo nimapoo tou teye daga, niyo goo egee toloso egeesee takalai tekepo, ‘Iba wulo tou teli odoo. Esiga iyo tou hagee tomo silesibo goo hee talame koo seeso,’ dee takee,” diso.

*Yesuye odoo e bia 10 ee tekepo moodoo*

<sup>11</sup> Yesu Yelusalem mi mapoo dulone, Gelili mi ogo osoloso Samaliya mi ogo doloso domo abaga diso.



<sup>12</sup> Yo eli domo mapoo mi pepooko hee mapoo dumolome, odo e bia 10 egeiso. Odo e bia 10 oso Yesu ogoloso yima hegi sibadele. Esino wulo eli sage tebisamolone,

<sup>13</sup> toso neligidi yimapoo egeese takaso, “Yesu, wiligi odo, nayo iba sooloo dolone pidi!” diso.

<sup>14</sup> Esem yayo diba ogoloso egeese takaso, “Niba dileso Godee ogo odo ogo doloso domo debeli odo mapoo nibada su eligi,” diso. Diba Yesuye egeese taka duloso dimelee omapoo, dia kolo see tekepo paso.

<sup>15</sup> Osoloso dima kulodu odo hee o kolo tekepo pa ogoloso Yesu mapoo wedi sibulone, toso neligidi Godee mapoo goomoga poudoomo simiso.

<sup>16</sup> Egeeseemo sibilesu Yesuwo homo beiyopoo gasuwoloso badolone Yesu mapoo goomoga teneeso. Odo hagee Samaliya odo.

<sup>17</sup> Esem Yesuye egeese takaso, “Ayo odo 10 olo tekepo moodoso. Esino odo abo egee bia kasomo?”

<sup>18</sup> Bei kasi maga, Yu odoonee hedebe hagoso obusomo Godee mapoo goomoga tenelame ka wedi simiyo?” diso.

<sup>19</sup> Osoloso Yesuye odo hamapoo egeese takaso, “Nayo amapoo tei too maga no olo tekepo paso. Esiga no toboloso di,” diso.

*Godeeye wiligi doloso badeli goo oso sibilei  
(Mat 24:23-28, 37-41)*

<sup>20</sup> Biame heeso Pelisi odoososo Yesu mapoo egeesee takaso, “Godeeye wiligi dolosobadeli goo ee kopolone sibileiyo?” diso.

Eseme Yesuye nei dimapoo egeesee takaso, “Godeeye wiligi dolosobadeli goo ee woola sibogalame.

<sup>21</sup> Osolosoo edebeeyo Godeeye wiligi dolosobadeli goo ee hamapoo hagee molosoo, oo, koogee molosoo, dee takalame. Bei, Godeeye wiligi dolosobadeli goo ee nima kulodoo molosoo,” diso.

<sup>22</sup> Osolosoo see oo hamamee dili odoososo mapoo egeesee takaso, “Odoososo Holo mo biame osososi-boga niyo agalame goomogalabiame ee sibileiso. Esino niba agalame.

<sup>23</sup> Osolosoo see edebeeyo nimapoo takolone, ‘Odoososo Holo a koo badosoo, oo, hamapoo badosoo,’ dee takooga, dia to mapoo tei tolosoo omapoo na agala di.

<sup>24</sup> Esino Odoososo Holo ayo sibilei biame ee, kei ebiedi buguga mi susuga egee gadeebugoo egeesee selaisoo. Egeeseega odoososo susuga osososo agalaisoo.

<sup>25</sup> Esino daga Odoososo Holo a dala toowa talaisoo. Osolosoo odoososo epedee hagee do osososo a diya gowoolaisoo.

<sup>26</sup> Nowaye badebei biame omapoo goosopeledaba, goosohedebe egeesee masi osososo Odoososo Holo ayo sibilei biame omapoo peledabalaisoo.

<sup>27</sup> Nowaye badebei biame mapoo edebeeyo nei na howo na dolone dobolone, sobosoo gisoo obuo osolosoo gisoo sobo huya dolone debeisoo. Egeesee solone doboome, biame heeso Nowa du

ma kulodu gadiso. Eseme howo toowa duwa oso sibilesa odoo susuga piliguso.

<sup>28</sup> Osoloso goo hedebe egeesi masi oso Loteeye badebei biame mapoo peledabaso. Bei, Loteeye badebei biame mapoo edebeeyo nei na howo na dolone debeiso. Osoloso biso emegei nei pidi nei pidi dolone debeiso. Osoloso nei howo sogo, moso togo dolone debeiso.

<sup>29</sup> Egeesee solone doboome biame heeso, Loteeye Sodom mi poogoloso dime, kei ma dokodooga dou sabolo osoloso yo dei heliye oso sibilesa odoo Sodom mi mapoo debeli susuga piliguso.

<sup>30</sup> Esiga Odoo Holo ayo sibilei biame mapoo odoo susuga oso goo egeesi tolone dogo, ee ma kulodu a ka sibilei.

<sup>31</sup> Esiga biame omapoo odoo hau mapoo badebei oso see moso kulodu o bi talame gadilei tekeponee. Osoloso odoo homolee mapoo nei howo sogomologa, yo see mosopoo wedi dilei tekeponee.

<sup>32</sup> Esiga niba Loteeyo osobowo goo ee goolee.

<sup>33</sup> Esiga odoo agayo o gie badeli eyo nediliyo pidilame wegegeega, o gie badeli egee osugobal-aiso. Esino odoo agayo mo goo maga o gie badeli peegoo magooga, yo badoboso kookaiyo gie osee badalaiso.

<sup>34</sup> Esiga ayo nimapoo taka, biame omapoo giso bakadio kida hedebe mapoo tileiso. Esino odoo hee ido polone, odoo heeno omapoo pagalaiso.

<sup>35</sup> Osoloso biame omapoo sobo bakadio wo gamalaiso. Esino sobo hee ido polone, sobo heeno

omapoo pagalaiso. [

<sup>36</sup> Osoloso biame omapoo giso bakadio homolee ma kulodu tou tomo sileiso. Esino odoos hee ido polone, heeno omapoo pagalaiso.”]

<sup>37</sup> Yesuye to hageesee takoloso koodobume, o hamamee dili odoos oso yimapoo egeesee takaso, “Lodee, goo hagee kamapoo peledabalaiyo?” diso.

Eseme Lodeeye dimapoo nei egeesee takaso, “Mi hee mapoo gala ta eyo su hune mologa, kukodee susuga hune egee nalame omapoo busiliso,” diso.

## 18

### *Sobo bauwo goo maga wudu taka*

<sup>1</sup> Osoloso Yesuye see tobu wudu taka hamaga o hamamee dili odoos dimapoo eligiso, diayo biame susuga Godee mapoo takomo silone gowoolega pagalame.

<sup>2</sup> Egeeseelone yayo egeesee takaso, “Mi hee mapoo goo midili odoos badebeiso. Esino yo Godeebolo ebilega badolone, odoos koo gweli.

<sup>3</sup> Osoloso mi hedebe omapoo sobo bau hee badebeiso. Esino sobo hagosos biame susuga goo midili odoos hamapoo sibilesos howolone egeesee takeliso, ‘Nayo a pidilone odoos amapoo ha egee tomolos eyo goo midi,’ deliso.

<sup>4</sup> Esino goo midili odoos oso daga sobo hagee pidilei yo goomegele. Esino biame susuga sobo hagosos yimapoo sili sileeme ogolosos egeesee

gooleeso, ‘A Godeebolo koo ebili osoloso a odo koo gweli.

<sup>5</sup> Esino a sobo hageeyo to dumeleso diya gowoo. Esiga yayo see mo moso mapoo sibili ee pagalame yo pidileiso,’ diso.”

<sup>6</sup> Esiga Lodeeye egeesee takaso, “Goo medee koo midili odo eyo goo hagee ogoloso goo goolee medee kibiya te. Bei, goo midili odo hagoso daga sobo hagee pidilei gowoomeleso see hamamee yo pidiso.

<sup>7</sup> Esiga Godeeye hesiga odo oso biame sabolo gesi sabolo yimapoo hoowa mologa ogoloso diba tei pidileiso. Osoloso yayo diayo yimapoo taka to ee duloso nei tenelai koo dagili.

<sup>8</sup> Esiga ayo taka, Godee o odo oso yimapoo hoowa duloso goomoga sabolo diba pidiliso. Esino Odo Holo ayo see wedi sibilei biame mapoo, mipoo hamapoo tei too goo ee molo agalaisomo?”

*Pelisi odo sabolo osoloso tekisi molee misigeli odo sabolo*

<sup>9</sup> Odo abo dieso nediliyo diba Godeeyo howo woola tekepo dolone, hee odo abo tokenee deli odo mapoo Yesuye wudu taka hageesee takaso,

<sup>10</sup> “Odo bakadio, Pelisi odo sabolo osoloso tekisi molee misigeli odo sabolo, Yu odoowo tei moso mapoo Godee mapoo takalame palaso.

<sup>11</sup> Osoloso Pelisi odo oso toboloso obusomo tobudulone dokodoo hageesee takaso, ‘Godee, a namapoo goomoga to taka. Bei, a odo abo egeesinee. Bei, diba adaba bi teliso, osoloso goo tokenee teliso, osoloso diba adaba sobo sabolo giso sabolo heli teliso. Osoloso a see tobu

namapoo goomoga to taka. Bei, a tekisi molee misigeli odo keeseenee.

<sup>12</sup> Bei, a sadee hedebe ee ma kulodu biame bakadio nei nelega tei doloso badeliso. Osoloso ayo bi too biame mapoo mo bi 10 ee ma kulodu hedebe namapoo teneliso,' diso.

<sup>13</sup> Esino tekisi molee misigeli odo oso hamameedee hoogoo bia omaga toboloso o goo tokenee mapoo gooholone o su eyo nediliyo o budo mapoo kobuguloso oo goobodo buloso tobudulone Godee mapoo egeese takaso, 'Godee, a tei medee diya tokenee odo. Esiga nayo a sooloo dolone mo goo tokenee eyo nei na tenee,' diso.

<sup>14</sup> Esiga ayo nimapoo taka, tekisi molee misigeli odoo hagos o mosopoo wedi dulone, Godeeyo howo woola abaga tekepo odoo doloso diso. Esino Pelisi odo mapoo goo hageesi mauwe meleeso. Esiga odo agayo eyo nediliyo yo toowa daga, nei yo Godeeye pepooko dalaiso. Esino odo agayo eyo nediliyo yo pepooko daga, nei Godeeye yo toowa dalaiso."

*Yesu sabolo holaiso sabolo  
(Mat 19:13-15; Maka 10:13-16)*

<sup>15</sup> Biame hedebeso odo aboso holope Yesu mapoo ido sibadeeso, o deeso sigoloso pidilame. Esino o hamamee dili odo oso goo egee ogoloso hamaga takaso.

<sup>16</sup> Esemee Yesuye holaiso gilimadoloso, o hamamee dili odo dimapoo egeese takaso, "Holaiso amapoo sibilei soowa. Niyo na hamaga

---

**18:12:** Isa 58:1-4; Mat 23:23  
23:12; Luka 14:11

**18:13:** Psa 51:1

**18:14:** Mat

takee. Bei, edebeeyo holaiso hageesi masi poga, diba Godeeye wiligi doloso badeli mapoo gasibileiso.

<sup>17</sup> Ayo nimapoo taka, edebeeyo o goo holaiso masi amamo to mapoo mesimo sili, egeesi sel-ega poogoloso, Godee mapoo mesilega poogooga, yo Godeeye wiligi doloso badeli mapoo gasibilei mauwe.”

*Bi bei odoo*

*(Mat 19:16-30; Maka 10:17-31)*

<sup>18</sup> Wiligi odoo heeso sibilesa Yesu mapoo egeesee takaso, “Eligili odoo tekepo, ayo ogoogo toga kookaiyo badoboso gie badeli ka talaiyo?” diso.

<sup>19</sup> Esemes Yesuye nei yimapoo egeesee takaso, “Bei kasalame nayo a tekepo odoo dee ka takala? Tekepo odoo hee koo badoso. Esino hedebe Godeeno tekepo.

<sup>20</sup> Esiga Godeeyo tei magoo no olo gooleedooso: adaba kooka sobo na peedee hui, osoloso odoo na wooloome, osoloso heli na te, osoloso odoo hee mapoo gamenee na gigidi, osoloso nama dio noowee dio oso taka to omapoo mesie.”

<sup>21</sup> Esemes odoo oso Yesu mapoo egeesee takaso, “A holope pepooko maga simi tei magoo susuga hagee tobuloso tomo simiso,” diso.

<sup>22</sup> Esemes Yesuye o to duloso nei egeesee takaso, “No goo hedebe dooboo dagadi moloso. No dileso nee bi susuga odoo abo mapoo tenee, nei molee talame. Osoloso bi too eyo nei molee ee bi mauwe odoo mapoo pi. Nayo egeesee seega, Kei mi ma

---

**18:17:** Mat 18:3

**18:18:** Luka 10:25

**18:20:** Exo 20:12-16;

Deut 5:16-20

dokodoo bi tekepo nee hu sabolo mologa agalaiso. Esiga no a deedee sibe,” diso.

<sup>23</sup> Odoos hagoso Yesuwo to duloso diya pupudasoo. Bei, yimapoo bi bei meleega.

<sup>24</sup> Esemee Yesuye yimapoo bolone egeesee takaso, “Bi bei odoos oso Godeeye wiligi doloso badeli mapoo gadilei diya kalawa.

<sup>25</sup> Esiga dugo duseli midole ou maga kemol be toowa oso gadilei kalawa. Esino bi bei odoos oso Godeeye wiligi doloso badeli mapoo gasibilei diya kalawa toowa.”

<sup>26</sup> Esemee o hamamee dili odoos oso eligi goos hagee duloso egeesee takaso, “Esino kalawa egeesee odoos agayo gie badeli ka talaisomo?” diso.

<sup>27</sup> Esemee Yesuye dimapoo egeesee takaso, “Edebeeyo eyo nediliyo o gie badeli pidilei tebile. Esino hedebe Godee yino teiba. Bei, yayo goos susuga ee moodoolai yimapoo kalawa mauwe,” diso.

<sup>28</sup> Esemee Pitaye Yesu mapoo egeesee takaso, “Iba ibada bi susuga poogoloso, no dodomo simiso,” diso.

<sup>29-30</sup> Esemee Yesuye dimapoo nei egeesee takaso, “Ayo nimapoo taka, edebeeyo Godeeye wiligi doloso badeli goos maga o moso sabolo, osoloso osobo sabolo, osoloso emei dio sabolo omolo sabolo, osoloso ama dio owee dio sabolo, osoloso owolo dio sabolo poogoloso siboga, yayo epedee hamapoo nei toowa talaiso. Osoloso hamamee yo kookaiyo badoboso gie badeli talaiso,” diso.

*Yesuye see eyo talai goos ee taka  
(Mat 20:17-19; Maka 10:32-34)*



<sup>31</sup> Osoloso see Yesuye o hamamee dili odoo 12 gilimadoloso peegoo gilimado dilesa dobolone dimapoo egeesee takaso, “Iba epei Yelusalem mi mapoo poloso. Esiga Godee maga to toloso kokodo takomo sili odoo oso daga Odoo Holo mo goo hogugu susuga omapoo peledabalaiso.

<sup>32</sup> Osoloso a Yu odoonee mapoo tenelaiso. Osoloso diayo a manalaiso, osoloso amapoo toke-nee goo moodolaiso, osoloso amapoo makawo pagalaiso.

<sup>33</sup> Osoloso a tiso dabalaiso, osoloso a wooloomalaiso. Esino a midoo ma kulodu tamoloso, biame bakadio hedebe di poogoloso see gie badeli toloso hogabileiso,” diso.

<sup>34</sup> Esino Yesu o hamamee dili odoo oso to hagee duloso goo eyo bei medee kibiya gooleedele. Bei, goo eyo bei dimaga mada magooga.

*Yesuye odoo howo neliga tekepo moodoo  
(Mat 20:29-34; Maka 10:46-52)*

<sup>35</sup> Yesu Yeliko mi koola mapoo sibumolome, odoo howo neliga oso Yesuye sibilei eli pee mapoo badolone molee howameleeso.

<sup>36</sup> Egeeseelone odoo mooloogoodoo susuga oso to boowoomo sibume duloso odoo abo mapoo woosaso, ogoo goo oso peledaba beleso.

<sup>37</sup> Esemee odoo aboso yimapoo takolone egeesee takaso, “Yesu Nasalet odoo oso odoo abo sabolo ka diyadee,” diso.

<sup>38</sup> Yo to hagee duloso neligidi iso, “Yesu, Deibidiyo amawe, nayo a sooloo dolone a pidiye!” demeleeso.

<sup>39</sup> Esino odoos malalo diyadee oso yimapoo to kitulugu sabolo egeesee takaso, “No to mauwe badebee,” diso. Esino edebeeyo yimapoo egeesee takeme, yayo dia to mapoo dulega, to kitulugu sabolo neligidi egeesee takolone badebeiso, “Deibidiyo amawe, nayo a sooloo dolone a pidiye!” demeleeso.

<sup>40</sup> Esemee Yesu o to duloso omapoo kookoo toboloso tobudulone, odoos abo dimapoo egeesee takaso, “Odoos egee hamapoo ido sibe,” diso. Osoloso odoos howo si olo Yesu mapoo ido sibilesos badoboome, Yesuye yimapoo egeesee takaso,

<sup>41</sup> “No ayo namapoo ogoos goos moodoolai goomogodo?” diso.

Esemee howo neliga odoos oso nei yimapoo egeesee takaso, “Lodee, mo howo tekepo pe. A see agalai goomogo,” diso.

<sup>42</sup> Esemee Yesuye yimapoo egeesee takaso, “Esiga no epedee nee howo see ege. Bei, no tei tooga, no see olo tekepo paso,” diso.

<sup>43</sup> Esemee haga booloogelega o howo bakadio see tekepo paso. Esemee yayo Yesubolos dulone Godee mapoo goomoga poudoomo diso. Esemee goos peledaba hagee egei odoos susuga oso Godee mapoo goomoga poudoomo diyadeeso.

## 19

### *Sekiyes tekisi molee misigeli odoos*

<sup>1</sup> Yesu Yeliko mi mapoo peledoboloso, see mi domo abaga dimeleeso.

<sup>2</sup> Mi omapoo tekisi molee misigeli wiligi odoo taba badebeiso, o hu Sekiyes. Osoloso yo bi bei odoo.

<sup>3</sup> Yesu eli domo abaga dumolome, odoo susuga oso yo agalame diya mooloogoodooso. Sekiyes yo Yesu agalai goomogaso. Esino yo odoo diya deiyepoga, yayo Yesu agalai odoo mooloogoodoo oso yo gooloogooso.

<sup>4</sup> Esemme Sekiyes yo Yesu agalame Yesu diayo sibademelee eli su mapoo malalo saga hoguo dileso homo ma dokodoo peleso badebeiso.

<sup>5</sup> Esemme Yesuye sibilesa egeino, Sekiyes yo homo ma dokodoo peleso badoboome ogoloso yimapoo egeese takaso, "Sekiyes, no saga miyomoo mei. A epei nobolo hodobo nee mosopoo dilei goomogo," diso. <sup>6</sup> Esemme yo saga miyomoo meilesa, goomoga sabolo Yesu o mosopoo ido diso.

<sup>7</sup> Osoloso odoo susuga oso goo hagee ogoloso diya gowoolone egeese takaso, "Yesu tokenee teli odoowo mosopoo diso," dee takaga meleeso.

<sup>8</sup> Osoloso diba dileso Sekiyeseeyo moso mapoo dobolone Sekiyeseeye toboloso egeese takaso, "Lodee, a epei goo hageesi moodoolaiso: Ayo mo bi abo hodio ee bi mauwe odoo mapoo pileiso. Osoloso adaba molee ayo gamenee taka maga ayo hedebe too eyo nei see mawo dimapoo nei toowa bakadio bakadio di egeesi dimapoo tenelaiso," diso.

<sup>9</sup> Esemme Yesuye Sekiyeseeyo to duloso yimapoo egeese takaso, "Epei moso hageeyo kulodu de-

beli odoo mapoo gie badeli goo olo tosimiso. Bei, Sekiyes hagee nose Eibalahameeyo amawe.

<sup>10</sup> Bei, Odoo Holo ayo simi hagee tei tele poogoo odoo peegoo osugoba ee esiameselelo ogoloso diba gilimadoloso dimapoo gie badeli tenelame ka simi,” diso.

*Wiligi odoo oso o tou teli odoo mapoo molee tenee*

*(Mat 25:14-30)*

<sup>11</sup> Edebeeyo Yesuwo to hagee dulone dobolone egeesee goolone debeiso, “Yesu Yelusalem koola mapoo sibilesi badoso. Esiga Godeeye wiligi doloso badeli goo onosee koola tooboo malaiso,” demeleso. Egeesee gooloogamelee ogoloso, Yesuye wudu taka hagee takaso,

<sup>12-13</sup> “Osoloso wiligi odoo hee mi eli sage mapoo gibadeli hu tala dilame badolone, o tou teli odoo 10 gilimadoloso dimapoo molee ko mina\* deli hedebe tenee, hedebe tenee diso. Esiga yayo dimapoo egeesee takaso, ‘Niyo ayo see wedi sibilei ee bolone molee see toowa palame, biyo moso togoloso bei mooloogee,’ diso.

<sup>14</sup> Osoloso yo dime, o mosobia oso yo diya gowoolone, yima hamamee odoo abo diye diso, yayo diba gibadalai goo maga diayo gowe goo ee takalame.

<sup>15</sup> Esino odoo egee gibadeli hu toowa toloso see wedi simiso. Yo see wedi sibilesi odoo molee

---

**19:10:** Luka 15:4-5; Yon 3:17; 1Tim 1:15 \* **19:12-13: Molee ko mina** deli hagee molee toowa. Esiga tou teli odoo oso tou tomo dimeleso biame 100 tugodoga, eyo nei molee ko mina deli hedebe teliso.

yayo pi ee gilimadooso, molee toowa mala beleso agalame.

<sup>16</sup> Osoloso daga odoo heeso malalo sibilesa egeesee takaso, 'Nayo molee amapoo tenemeni oso biyo moso togoloso bei mooloogoloso see molee ko mina deli abo 10 egeesi tooso,' diso.

<sup>17</sup> Esemee gibadeli odoo oso yimapoo goomogolone egeesee takaso, 'No tou medee tekepo todoo. Esiga nayo goo pepooko hagee medee bameleega, see nayo mi 10 wiligi doloso bolone badalaiso,' diso.

<sup>18</sup> Esemee see omapoo badeli tou teli odoo hee oso sibilesa egeesee takaso, 'Nayo molee amapoo tenemeni oso biyo moso togoloso bei mooloogoloso see molee ko mina deli abo dee tiadoo egeesi tooso,' diso.

<sup>19</sup> Esemee gibadeli odoo oso yimapoo egeesee takaso, 'Nayo mi dee tiadoo wiligi doloso bolone badalaiso,' diso.

<sup>20</sup> Osoloso see tou teli odoo hamameedee oso sibilesa egeesee takaso, 'Wiligi odoo, nee molee hagoso. Nayo amapoo teneme, todilesa dugoso tiadoloso mada magooso.

<sup>21</sup> Bei, no diya kitulugu odoo. Esiga a nobolo diya ebiase. Osoloso nayo kitulugu maga odoo aboso bi ma ee teliso. Osoloso odoo aboso nei segei nayo gebiseliso,' diso.

<sup>22</sup> Esemee o wiligi odoo taba oso yimapoo egeesee takaso, 'No tou tokenee teli odoo. Esiga no to egeesee taka goo omaga, ayo nee goo midileiso. Bei, nayo takolone a diya kitulugu

odoo diso. Osoloso nayo amapoo takolone ayo kitulugu maga odoo aboso bi ma ee teliso diso. Osoloso odoo aboso nei segei nayo wulo gebiseliso.

<sup>23</sup> Egeesi ma kulodu bei kasi maga molee toowa palame molee gibadeli odoowo mosopoo magel-ega ka poogoowo, ayo see wedi sibilesa molee toowa poloso mologa ka talai?’ diso.

<sup>24</sup> Yo egeese badolone odoo koola omapoo tebidi mapoo egeese takaso, ‘Niba yimapoo molee ko mina deli ege molo tolosa see molee ko mina deli 10 too odoo mapoo tenee,’ diso.

<sup>25</sup> Esem diayo yimapoo egeese takaso, ‘Wiligi odoo, no ege, yo molee ko mina deli 10 olo tolosa badosa,’ diso.

<sup>26</sup> Esino wiligi odoo oso dimapoo egeese takaso, ‘Ayo nimapoo taka, odoo agayo dimapoo bi tenee ee medee gibadoga, dimapoo see bei tenelaiso. Esino odoo agayo dimapoo tenee bi ee medee gibadelega poogooga, dimapoo bi pepusa abo ege molo tolosa peegoo todileiso.

<sup>27</sup> Osoloso odoo agayo ayo diba gibadalame seme amapoo gowe, diba hamapoo iyado sibilesa mo howo woola piligi,’ diso.”

*Yesuye Yelusalem mi mapoo wiligi odoo masi toboloso gadi*

*(Mat 21:1-11; Maka 11:1-11; Yon 12:12-19)*

<sup>28</sup> Yesuye to taka hagee koodobulosa see Yelusalem mapoo dimeleeso.

29 Yo Olipi mubi kuli mapoo mosodei bakadio, Betapage osoloso Betani koola mapoo peled-abaso. Osoloso o hamamee dili odoo bakadio diye dolone dimapoo egeesee takaso,

30 “Mosodei koogee mapoo dileso omapoo ogoga, be hu gie kauwa donki edebeeyo wagi ma dokodoo buloso dilega poogoo ee, o mu mapoo ebigiso bagagoloso, omou mapoo bagagoo moloso. Esiga be ee niyo ebigi pidi poogoloso, hapoo hado sibe.

31 Egeeseega odoo heeso sibilesa nimapoo takolone, ‘Bei kasalame be hu donki ebigi ka pidibagala’, dee takooga, niyo yimapoo to nei egeesee takee, ‘Lodeeye be hagee talai goomogona,’ dee takee,” diso.

32 Esemé o hamamee dili odoo oso Yesuye taka to ee duloso mi omapoo diyadeeso. Diba dileso egeino, goo susuga Yesuye taka to sabolo tobuloso molome egeiso.

33 Esemé diba donki be hu ee ebigi pidimeleeno, be eyo amameeye dimapoo egeesee takaso, “Niba kasalame be ebigi ka pidibagala?” diso.

34 Esemé nei diayo dimapoo egeesee takaso, “Lodeeye be hagee talai goomogona,” diso.

35 Esemé diayo donki be ee Yesu mapoo hado simiso. Osoloso dibada kekeisili dugo tigadoloso donki be eyo wagi ma dokodoo malosó, Yesu dee mapoo tolosó dokodoo bediso.

36 Yo be ma dokodoo buloso dumolome, odoo susuga oso dibada kekeisu dugo susuga tigadoloso yayo dilei eli mapoo poomo diso.

37 Osoloso Yesuye Olipi mubi ma dokodooga Yelusalem mapoo moumolome, o hamamee

dedeli odoo susuga oso yayo goo opusomo di moodomo silee goo maga Godee mapoo goomoga neligidi poudoomo mouso.

<sup>38</sup> Egeeseelone diayo egeesee takaga meleeso,  
 “Wiligi odoo taba ee Godeeyo hu maga kitulugu sabolo egee sibo o hu dokodoo poude!  
 Osoloso Kei mi ma dokodoo mesie goo oso mele dee!

Osoloso Kei mi ma dokodoo badeli Godee mapoo goomoga poude!” dee takolone debeiso.

<sup>39</sup> Esino mooloogoodoo toowa ee ma kulodu Pelisi odoo abo omapoo debeiso. Diayo Yesu mapoo egeesee takaso, “Eligili odoo, no nee hamamee dedeli odoo diba to koodobilame dimapoo to kitulugu sabolo takee,” diso.

<sup>40</sup> Esemé Yesuye nei dimapoo egeesee takaso, “Ayo nimapoo taka, odoo hagee bia oso to mauwe duga, nei yo susuga hagoso to neligidi kesalaiso,” diso.

### *Yesuye Yelusalem mi ogoloso pisa*

<sup>41</sup> Yesu Yelusalem koola mapoo dulone, Yelusalem mi ee malalo molo ogoloso pusulone egeesee takaso,

<sup>42</sup> “Yelusalem odoo, niba kaseeyo? A diya goomogo, epedee niyo mesie goo toloso sibilei goo ono diya gooleedalame. Esino niba goo hagee medee ogoloso koo gooleedo. Bei, mesie goo ee nimaga mada magoo moloso.



<sup>43</sup> Esiga nimapoo ha teli odoo oso nee mi beelee pee maga sulo doboloso mi kukaloso omaga peleso mi edebeeyo bia ee ma kulodu gadilei biame oso nimapoo sibileiso.

<sup>44</sup> Osoloso diayo nibada moso guobuguloso odoo susuga piligileiso. Osoloso nibada mi guobugu ee ma kulodu yo heeso yo hee ma tobudoo molo agalaime. Esiga goo hageesi oso nimapoo peledabalaiso. Bei, Godeeye niba pidilame simi ee niyo medee ogoloso koo gooleedo.”

*Yesuye Yu odoowo tei moso mapoo pala  
(Mat 21:12-17; Maka 11:15-19; Yon 2:13-22)*

<sup>45</sup> Yesu Yelusalem mi mapoo gadileso Yu odoowo tei moso mapoo palaso. Yo moso ee ma kulodu gapeleso tobudulone egeino, odoo susuga oso bi odoo abo mapoo tenelo nei ka to domolome egeiso. Esemeyayo bi eyo ama dio susuga moso ee ma kuloduga peegoo hasiso bugulone egeesee takomo sileeso,

<sup>46</sup> “Niba goolee, Godeeyo to booka mapoo hogugu oso egeesee takooso, ‘Mo tei moso ee howo gisili moso oso,’ diso. Esino niyo Godeeyo moso hagee heli teli odoo oso mada debeli moso paso,” diso.

<sup>47</sup> Yesu Yelusalem mi mapoo dileso badolone biame susuga Yu odoowo tei moso ma gapeleso odoo susuga mapoo Godeeyo to eligimeleeso. Esemeyo tei moso wiligi odoo tebisa sabolo, osoloso tei eligili odoo sabolo, osoloso Yu odoowo wiligi odoo tebisa oso Yesu wooloomalame eli esiamo silesibiso.

<sup>48</sup> Esino diba Yesu wooloomalai eli egele. Bei, odoo susuga oso Yesuye eligi goo ee hodu dileso diya goomoga sabolo duliso.

## 20

*Yesuye kitulugu maga woosa  
(Mat 21:23-27; Maka 11:27-33)*

<sup>1</sup> Biame hee mapoo Yesu Yu odoowo tei moso mapoo peleso odoo susuga mapoo Godeeyo to eligimolome, tei moso wiligi odoo tebisa sabolo, osoloso tei eligili odoo sabolo, osoloso Yu odoowo wiligi odoo oso Yesu mapoo sibilesa egeesee takaso,

<sup>2</sup> “No ogoso kitulugu maga goo hagee ka moodoomo silala? Odoo agayo namapoo kitulugu hagee ka teneeyo?” diso.

<sup>3</sup> Esemé Yesuye dimapoo nei egeesee takaso, “Ayo woosali to hedebe nimapoo woosalaiso. Esiga niyo amapoo takee,

<sup>4</sup> Odoo howo olugumo silame Yonee mapoo kitulugu odoo agayo ka teneeyo? Godeeye teneeyo, o, edebeeyo teneeyo?” diso.

<sup>5</sup> Esemé diayo to hagee duloso, dieso nediliyo dima kulodu to moulone egeesee takaso, “Iyo kasee takalaiyo? Iyo Godee maga simi dee takooga, yayo imapoo egeesee takalaiso, ‘Bei kasi maga niyo Yoneeyo to mapoo tei telega ka poo-goowo?’ dee takalaiso.

<sup>6</sup> Osoloso iyo see yayo kitulugu ee edebeeyo teneedoo, dee takooga, see odoo susuga oso imapoo komonolone iba wooloomalame yoso enigileiso. Bei, odoo susuga oso Yonee yo tei Godee maga to

toloso kokodo takomo sili odoodoo, dee gweliso,” diso.

<sup>7</sup> Egeeseelone diayo nei Yesu mapoo egeesee takaso, “Yoneeye kitulugu too eyo bei, iba gooleedele,” diso.

<sup>8</sup> Esemé Yesuye dimapoo egeesee takaso, “Esiga ayo kitulugu tomo hagee sulo goo ee nimapoo takalaime,” diso.

*Tou tokenee gibadeli odoo eyo goo maga wudu taka*

*(Mat 21:33-46; Maka 12:1-12)*

<sup>9</sup> Osoloso Yesuye see wudu taka hamaga odoo mapoo egeesee takaso, “Biame heeso odoo hee o homolee ma kulodu geleipi howo segeiso. Yo geleipi howo sogoloso eyo nei odoo abo maga nei tamalame dimapoo bameleeye doloso, yo mi hee eli sage mapoo badalame diso.

<sup>10</sup> Yo omapoo dilesó badoboome, homokokoso bi moodolai biame oso simiso. Osoloso yayo o tou teli odoo hee mapoo o homolee mapoo dilesó homokoko abo diayo goolooga ee tala dilesó tosi-beye diso. Esino omapoo dilesó peledoboome, homolee gibadeli odoo oso yo woomele poogoloso bi mauwe see wedi di diso.

<sup>11</sup> Egeesee ogoloso amameeye tou teli odoo hee diye diso. Esino gibadeli odoo oso odoo hagee sabolo woolone yimapoo ebili goo teneloso bi mauwe see wedi diye diso.

<sup>12</sup> Esemé amameeye see tobu o tou teli odoo hee diye diso. Esino yinosee gibadeli odoo oso woomele poogoloso peegoo habuguso.

<sup>13</sup> Egeesee see ogoloso amameeye eyo egeesee gooleeso, ‘Ayo ogoο goo moodoolaiyo? A see mo holo ayo gooma diye dalaiso. Egeesee seega diayo o to mapoo mesilei malaiso,’ diso.

<sup>14</sup> Esino homolee gibadeli odoο oso homolee eyo amayo owoloye simi ogoloso dieso nediliyo egeesee takaga meleeso, ‘Holo hagoso ama toga, amamo bi gilibo susuga ee yayo talaiso. Esiga yo wooloomaloso homolee hagee iyo tomo,’ dee takaga meleeso.

<sup>15</sup> Egeeseelone diayo holo egee homolee peegoo ido dileso woolomaso.”

Yesuye to hagee taka koodobuloso badolone o to dulone debei odoο mapoo egeesee takaso, “Homolee eyo amameeye homolee gibadeli odoο mapoo ogoο goo moodoolaiyo?

<sup>16</sup> Yo sibilesο diba piliguloso see odoο dia toloso o homolee gidebeeye dalaiso,” diso.

Eseme odoο susuga Yesuwo to dulone debei oso egeesee takaso, “Goo hageesi oso peledabalai tekeponee,” dee takaga meleeso.

<sup>17</sup> Esino Yesuye dimapoo bolone egeesee takaso, “Esino bei kasalame Godeeyo to booka mapoo hogugu oso egeesee ka takoosomo?

‘Moso tegeli odooso omou gowoolone togobugu oso see moso omu domo pupodoo ka moloso.’

<sup>18</sup> Esiga odoο agayo omou omapoo takodee buguloso homodobuoga, yo dala toowa talaiso. Osoloso omou oso odoο hee bulugu magooga, odoο ee ebidi bigileiso,” diso.

<sup>19</sup> Esemе tei eligili odoо sabolo osoloso tei moso wiligi odoо tebisa sabolo oso Yesuye wudu taka hagee gooleedoloso takolone, “Ibada goo ee takoo,” doloso, yo omapoo talame eli esiaso. Esino diba odoо mooloogoodoo toowa ogoloso Yesu talai ebigaso.

*Sisa mapoo tekisi molee tenelai goo  
(Mat 22:15-22; Maka 12:13-17)*

<sup>20</sup> Egeesi ma kulodu tei eligili odoо sabolo, osoloso tei moso wiligi odoо tebisa sabolo oso Yesu wooloomalame eli esilone, diayo eli kweli odoо abo diye dolone egeesee takaso, “Niba dileso gamenee odoо tekepo masi silesibulone, yimapoo woosali to oso woosamo silesibe. Egeesi ma kulodu Yesuye nei to tokenee kasee takooga, iyo yo tolosо gamalee wiligi odoо mapoo tenelaiya,” diso.

<sup>21</sup> Esemе diayo Yesu mapoo dileso to hodolone egeesee takaso, “Eligili odoо, iba gooleedooso, nayo eligi ma kulodu no hedebe tekepo goo ono eligili. Osoloso no odoо su mapoo koo egeli. Esino no tei Godeeyo goo ono ka eligimo sili.

<sup>22</sup> Esiga Loum gamalee wiligi odoо Sisa mapoo tekisi molee tenelai tekepowo, o, tokeneeyo?” diso.

<sup>23</sup> Esino diayo Yesu yimapoo gamenee takalame si gooleedoloso dimapoo egeesee takaso,

<sup>24</sup> “Amapoo molee ko hee eligi,” diso. Osoloso yayo molee ko tolosо tobudulone egeesee takaso, “Molee hamapoo agamo mudu sabolo osoloso agamo hu sabolo mololo?” diso.

<sup>25</sup> Esemе diayo nei yimapoo egeesee takaso, “Sisayo mudu sabolo, osoloso o hu sabolo oso ka molo,” diso.

Esemе Yesuye tobudulone dimapoo egeesee takaso, “Niba Sisayo bi ee Sisa mapoo tenee, osoloso Godeeyo bi ee Godee mapoo tenee,” diso.

<sup>26</sup> Esemе diayo Yesuye to nei tekepo taka dulosо diya howoogadolone to abo takele poogooso. Egeesi ma kulodu Yesuye одoo howo woola to tokenee takelega poogoome, diayo yo talai eli egele poogooso.

*Ta maga see hogabili eyo goo maga Yesu mapoo woosa*

*(Mat 22:23-33; Maka 12:18-27)*

<sup>27</sup> Osoloso Sedisi одoo aboso Yesuye badebei mapoo sibadeeso. Odoo hagee biaso takolone одoo wedia see hogogabileime deliso. Esemе diayo sibilesо Yesu mapoo egeesee takaso,

<sup>28</sup> “Eligili одoo, Moseseeye imapoo kokodo takolone egeesee hoguguso, ‘Gisoso sobo huloso holo soomagelega toga, see omoloye emei ta eyo osobo bau huloso emeiyo hu maga holo soolooga magee,’ diso.

<sup>29</sup> Esiga одoo heeso giso holo 7 soomagooso. Osoloso daga emeiye sobo huso. Osoloso yo holo soomagelega taso.

<sup>30</sup> Osoloso omoloye emei ta eyo osobo bau huso. Esino holo soomagelega taso.

<sup>31</sup> Osoloso omolo hee domo oso bau see huloso, holo soomagelega taso. Egeesee semelee ososee omolo dio 7 susuga holo soolooga magelega we-diaso.

<sup>32</sup> Osoloso hamameedee sobo bau yinosee taso.

<sup>33</sup> Esiga odoo wedia maga see hogogadilei biame mapoo sobo egee tei odoo agamo osobo dalaisomo? Bei, giso 7 oso sobo hedebe hagee huso,” diso.

<sup>34</sup> Esino Yesuye to nei dimapoo egeesee takaso, “Epedee hagee do biame omapoo gisoso sobo huya, osoloso soboso giso obuo dolone ka doso.

<sup>35</sup> Esino Godeeye hesiga odoo oso wedia maga hogabuloso dogo, diba see giso sabolo sobo sabolo huleime.

<sup>36</sup> Bei, diba Godeeyo momaiye masi dobolone see wedileime. Osoloso diba Godeeyo owolo dio doloso dabalaiso. Bei, diba wedia maga hogogadi goo oso ka eligiso.

<sup>37</sup> Esiga Moseseeye daga hoogoo edebeeyo wedia maga hogogabilei goo ee o booka mapoo hoguguso. Bei, yayo homo du douso namolome, ogoloso goo ee hogugulone egeesee takaso, ‘Lodee yo Eibalaham, Aisek, osoloso Yekob dibada Godeeso,’ diso.

<sup>38</sup> Esiga Godee hagee wedia odoo dia Godeenee. Haye, odoo gie egee do dia Godee. Bei, Godeeyo howo woola odoo susuga gie doso.”

<sup>39</sup> Esemte tei eligili odoo abo oso Yesu mapoo nei egeesee takaso, “Eligili odoo, nayo egee takoo tekepo,” diso.

<sup>40</sup> Esemte ee ma kulodu odoo susuga oso see Yesu mapoo woosalai ebiaso.

*Keliso agamo owolowo?  
(Mat 22:41-46; Maka 12:35-37)*

<sup>41</sup> Osoloso Yesuye see odoosusuga mapoo woosali to hagee takaso, “Bei kasi maga odoos abosotakolone Keliso ee Deibidiyo amawe dee ka take-liyo?”

<sup>42</sup> Esino Deibidi eyo Sam booka ma kulodu egeesee takaso,

‘Godeeye mo Lodee mapoo egeesee takaso:

No abolo wiligi doloso badalame mo dee deedee dokolo bie.

<sup>43</sup> Esiga nayo badolone namapoo ha teli odoos ayo dagadileiso.’

<sup>44</sup> Esiga Deibidiye Keliso o Lodee diso. Esino kasi maga Keliso ee Deibidiyo amawe dee ka takalaiyo?” diso.

*Yesuye tei eligili odoos eyo goo taka  
(Mat 23:1-36; Maka 12:38-40)*

<sup>45</sup> Odoosusuga oso to dulone osee doboome, Yesuye o hamamee dili odoos mapoo egeesee takaso,

<sup>46</sup> “Niba obeeyamo! Niyo tei eligili odoos mapoo medee ege. Diba dugo medee tekepo megigaloso silesibiliso, osoloso bi neiso teli mi mapoo debeli odoos oso diba ogoloso gauwuloso emegei di to takooga ee dulei onosee diya goomegeliso. Osoloso diba howo gisili moso ma kulodu wiligi odoos taba eyo debi mapoo bulumulame, osoloso wo toowa nolone odoos hu toowa too oso bili mapoo bulumulame goomegeliso.

<sup>47</sup> Esino diayo sobo bauwe ebilame gameneetakoloso, dia moso sabolo bi sabolo diayo tolosomapoo dobolone, dia goo gagaloso Godee mapoo taka diya sageliso, odoos abosodiba tekepo odoos



dee goolame. Esiga goo egeesi maga diba nei dala toowa talaiso.”

## 21

*Sobo bauso emegei di bi tenee*

*(Maka 12:41-44)*

<sup>1</sup> Yesu tei moso mapoo osee badolone egeino, bi bei odoososo emegei di molee tooseli ki bi oso moodoo mapoo soomolome egeiso.

<sup>2</sup> Osoloso biame omapoo sobo bau bi mauwe oso molee ko ta bakadio tosibilesotoosoo egeiso.

<sup>3</sup> Esemes Yesuye goo hagee ogoloso egeesee takaso, “Ayo nimapoo taka, sobo bau bi mauwe hagoso tenee oso bi bei odoososo tenee ee dagadiso.

<sup>4</sup> Bei, bi bei odoososo dia molee toowa osee molome molee su pepooko teneeso. Esino sobo bau bi mauwe hagee yimapoo molee ko esiesibomeleeno teneeso. Esiga yo wo talai molee olo mauwe,” diso.

*Yesuye tei moso guobigilei goo sabolo osoloso mi hoo poogoo mapoo gooso peledabalai goo ee taka*

*(Mat 24:1-14; Maka 13:1-13)*

<sup>5</sup> Biame omapoo odoososo aboso tei moso yo tekeposo tegei sabolo osoloso odoososo susuga oso Godee mapoo tenee bi tei moso ma kulodu ma molome ogoloso tekepo dee takaga meleeso. Esino Yesuye diayo takaga melee to ee duloso dimapoo egeesee takaso,

<sup>6</sup> “Niyo epedee moso sabolo osoloso bi sabolo ogoloso tekepo dee takemeni, ee hamamee guobigileiso. Egeesi ma kulodu yo heeso hee ma tobudoo malaime. Esino moso guobuguga, yo susuga oso mi mapoo misigeduboloso molo agalaiso,” diso.

<sup>7</sup> Esemé odoo aboso yimapoo egeesee takaso, “Eligili odoo, goo hagee kopolone ka peledabalaiyo? Osoloso goo hagosó peledabalame mologa, oogo gooso imapoo ka eligileiyo?” diso.

<sup>8</sup> Esino Yesuye see dimapoo egeesee takaso, “Niba obeeyamo! Odoo heeso niba tei goo maga see peegoo gilimado diyaga. Bei, odoo aboso sibilesó gamenee takolone ayo diba diye di, dee takolone dieso nediliyo diba Kelisoso dalaiso. Egeeseelone diayo takolone Godeeyo biame olo simiso dee takooga, dia to duloso omapoo tei na te.

<sup>9</sup> Esiga ha too goo sabolo osoloso galali goo sabolo oso peledoboomo duga, duloso niba haga na ebi. Bei, goo hageesi oso malalo peledabalaiso. Esino ee ma kulodu biame hamameedee saga sibileime.”

<sup>10</sup> Osoloso Yesuye see tobu dimapoo egeesee takaso, “Mi toowa heeso mi toowa hee mapoo ha talaiso.

<sup>11</sup> Osoloso biame omapoo mi abo mapoo mibia toowa sibileiso, osoloso hodia goo sibileiso. Osoloso paiye opusomo opusomo di oso mi abo mapoo sibileiso. Egeesee semelee mapoo goo opusomo di oso kei ma dokodoo peledaba ogoloso odoo susuga oso diya ebigileiso.

12 Esino goo hagoso epedee pelededelega mologa, niyo mo goo maga dala toowa talaiso. Egeesi ma kulodu odoo susuga oso nibada goo midilame dibada howo gisili moso mapoo ido polo dolone dabalaiso. Osoloso diayo niba neliga moso mapoo huyaso dolone dabalaiso. Osoloso see diayo mo goo maga niba gamalee wiligi odoo toowa tebisa mapoo gilimado peleso nibada goo midileiso.

13 Esino domo egee niyo mo goo ee dimapoo yilige bigilei biame tekepo ogoso.

14 Esiga niba goo medee goolee. Bei, odoo susuga oso niba goo midilei mapoo ido duga, niyo to takalai goo mapoo haga na koude.

15 Bei, domo omapoo ayo nimapoo goo goolee tekepo sabolo osoloso to tekepo takalai goo sabolo tenelaiso, nimapoo goweli odoo oso nibada to ee duloso to nei takelega pagalame.

16 Osoloso biame omapoo nibada ama dio sabolo, osoloso noowee dio sabolo, osoloso nemei dio sabolo, osoloso nomolo dio sabolo, osoloso nee soosoo sabolo, osoloso nemegei odoo sabolo oso nimapoo dala teneli odoo mapoo tiasalaiso. Osoloso diayo nima kulodu odoo abo piligileiso.

17 Esiga odoo susuga oso mo goo maga nimapoo heiga toowa malaiso.

18 Esino goo hagoso niba Godee maga pileime.

19 Esiga medee kibiya debee. Niba kibiya doga, gie badeli talaiso.”

*Yesuye Yelusalem mi oso tokenee palai goo ee*

*taka*

*(Mat 24:15-21; Maka 13:14-19)*

<sup>20</sup> “Esiga niba Yelusalem mi ee ha teli odoo oso moso silodoboloso tebisamelee ogoga, Yelusalem mi ee olo tokenee palame ka seeso doloso ogoloso niba gooleedalaiso.

<sup>21</sup> Egeeseega biame omapoo Yudiya mi mapoo debeli niba mubi dokodoo kukulo pele. Osoloso edebeeyo biame omapoo Yelusalem mi ma kulodu osee dogo, diba onosee saga kukulo di. Osoloso odoo agayo biame omapoo Yelusalem mi peegoo dogo, diba mi ee ma kulodu na gadi.

<sup>22</sup> Bei, biame omapoo Godeeyo to booka mapoo hogugu goo sabolo tobulone, nei dala tenelame ka selai.

<sup>23</sup> Osoloso biame omapoo sobo koowasi sabolo osoloso holope too nedili sobo oso dala toowa agalaiso. Bei, biame omapoo Godeeyo kamana goo oso siboga, goohele toowa sabolo osoloso dala toowa sabolo mi hamapoo sibileiso.

<sup>24</sup> Ee ma kulodu odoo abo ee ha teli odoo oso kaiyaso piligileiso. Osoloso odoo abo ee tiso tegisaloso tou nei mauwe talame mi abo mapoo iyado du dolone dabalaiso. Osoloso biame omapoo Yelusalem ee Yu odoonee oso gagalabuguloso homososo abalaiso. Diba osee tebisa mologa, diayo goo egeesee semelee oso hoo pagalai Godeeeye biame ee tenelaiso.”

*Odoo Holo oso sibilei goo*

*(Mat 24:29-35; Maka 13:24-31)*

<sup>25</sup> “Esiga goo opusomo di oso osoko mapoo, osoloso a mapoo, osoloso giwo mapoo peledabalaiso. Osoloso mi toowa hamapoo abei maga howo ki toowa oso goowa duleiso. Egeeseega odoosusuga oso dimapoo ogoogoo oso peledaba beleso obulone goo tiadalaiso.

<sup>26</sup> Osoloso kei ma dokodoo kitulugu bi egee molo ee Godeeye halabigileiso. Egeeseega odoosusuga oso dimapoo ogoogoo oso peledaba beleso obugulone hoowama dalaiso.

<sup>27</sup> Esiga biame omapoo Odoos Holo ayo kitulugu sabolo osoloso ayo toowa doloso badeli goo omaga mo gadeebugu sabolo osoloso kolobo sabolo siboga agalaiso.

<sup>28</sup> Esiga niba goo susuga hagoso bei mooloogoo ogoga, ebilega toboloso bolone ka debee. Bei, Godeeye niba gilimado dilei biame ee koola toobooso.”

*Sogai maga wudu taka  
(Mat 24:32-35; Maka 13:28-31)*

<sup>29</sup> Yesuye see goo hamapoo wudu taka hamaga egeese takaso, “Niba sogai ogoloso homo abo mapoo egege.

<sup>30</sup> Sogai du pisigaga ogoloso, wau biame koola tooboo doloso gooleedeliso.

<sup>31</sup> Esiga hagonosee egeesi masi moloso. Niba goo ayo taka hagoso peledaba ogoga, Godeeye wiligi doloso badeli goo oso sibilei koola tooboo doloso gooledalaiso.

<sup>32</sup> Ayo nimapoo taka, odoo biame omapoo dabalai ee osee dogo, goo susuga hagoso peledabalaiso.

<sup>33</sup> Esiga kei sabolo osoloso mi toowa sabolo mauwe pagalaiso. Esino mo to ee mauwe pagalaime.”

*Niso nediliyo medee be*

<sup>34</sup> “Esiga niba niso nediliyo medee be. Osoloso niba wo sabolo howo sabolo nolone dobolone mi toowa eyo goo mapoo haga na goolee. Bei, ti gama mapoo beso gaduga, tiso be egee bagagooga egee dio du egeesi masi ayo sibilei biame oso nimapoo dio di egeesi masi tenelai malaiso.

<sup>35</sup> Bei, biame ogoso odoo susuga mi toowa hamapoo egee do mapoo sibileiso.

<sup>36</sup> Esiga niba niso nediliyo medee bolone Godee mapoo takolone ka debee, niba biame oso peledabalai ee ma kuloduga kitulugu sabolo peegoo ka gadilame. Osoloso Odoo Holo mo mudugiyopoo kitulugu sabolo dabalame.”

<sup>37</sup> Yesu biame susuga Yu odoowo tei moso mapoo peleso odoo susuga mapoo Godeeyo to eligimeleso koodobuloso, see tilame gesi Olipi mubi mapoo polo demeleeeso.

<sup>38</sup> Esemee odoo susuga oso Yesuye eligi goo ee dulame gesikolodee tei moso mapoo sibileso mooloogoo deliso.

## 22

*Yudaseeye Yesu wiligi odoo tebisa mapoo tiasalame to magoo*

*(Mat 26:14-16; Maka 14:10-11)*

<sup>1</sup> Isipi mi maga peegoo di ee gooleebugu wo nalai biame ee koola tabaso. Wo nali hagee Yu odooso takolone Godeeye gababia wo nali deliso.

<sup>2</sup> Biame omapoo tei moso wiligi odoos tebisa sabolo osoloso tei eligili odoos sabolo oso odoos mooloogoodoo toowa ogoloso obugulone, mada Yesu wooloomalame eli esiaso.

<sup>3</sup> Biame omapoo Saitenso Yudas-Iskaliyot eyo kulodu gapalaso. Yudas hagee Yesuwo hamamee dili odoos 12 ma kulodu odoos hee yoso.

<sup>4</sup> Esiga Yudaseeye tei moso wiligi odoos tebisa sabolo osoloso tei moso pee mapoo gidebeli dia wiligi odoos tebisa mapoo dileso, yayo Yesu tolosos dimapoo tenelame dibolos to mousos.

<sup>5</sup> Esemes diayos goos hagees dulosos tekepos dolosos goomogolone Yudas mapoo molees tenelames takasos.

<sup>6</sup> Esemes Yudaseeye yibolosees goos hamapoo tekepos dolone mada Yesu tolosos dimapoo tenelames eli esiasos.

*Godeeye gababia wo nalames mopoodos doos  
(Mat 26:17-25; Maka 14:12-21; Yon 13:21-30)*

<sup>7</sup> Isipi mi maga peegoo di gooleebugu wo ne bei mooloogoo biames mapoo, Yu odoosos Godeeyes gababia wo nalames, sipi be hu welisos.

<sup>8</sup> Esemes Yesuyes sees Pita dios Yonees dios mapoo egeesees takasos, “Niba dilesos iyos gababia wo nalai ee mopoodos dalames di,” disos.

<sup>9</sup> Esemes diayos nei yimapoo egeesees takasos, “Iyos kamapoo dilesos wo nalai ee ka mopoodos dalaiyos?” disos.

<sup>10-11</sup> Esemé Yesúye dimapoo nei egeesee takaso, “Niba Yelusalem mapoo gadi. Niba omapoo gadilesó ogoga, odoó hee howo keedoloso dumologa tugodalaiso. Niba yo tugodoloso yo deedeé di. Niba yayo díleso moso kulodu gaduga omapoo dobolone, mosowo ama mapoo egeesee takee, ‘Elígili odoó oso o hamamee díli odoó sabolo Godeeye gababia wo nalai debi ee kasomo?’ dee takee.

<sup>12</sup> Egeeseega yayo moso dokohodoo debi pooba toowa nimapoo eligileiso. Egeeseega niba iyo Godeeye gababia wo nalai omapoo ka mopoodoo de,” díso.

<sup>13</sup> Esemé Pita dío Yonee dío to hagee duloso díleso egeino, goo susuga ee Yesúye taka goo sabolo tobuloso molome egeiso. Esemé díba gababia wo nalame omapoo mopoodoo dooso.

*Lodee gooleebugu wo ne*

*(Mat 26:26-29; Maka 14:22-25; 1Kol 11:23-25)*

<sup>14</sup> Esemé díayo wo nalai biame ee sibume, Yesúye o hamamee díli odoó sabolo wo nalame bulumaso.

<sup>15</sup> Yesú badolone o hamamee díli odoó mapoo egeesee takaso, “A goomoga toowa sabolo badebeiso, ayo dala ma kulodu gadilega badolone, ayo nibolo Godeeye gababia wo nalai.

<sup>16</sup> Bei, ayo nimapoo taka, ayo Godeeye gababia wo nali hagee hamamee see saga nalaimé. Esino Godeeye wilígí doloso badeli mi oso sibulone wo nali hageeyo goo bei woola yilígé buguga, ayo wo nali hagee see nalaiso,” díso.

<sup>17</sup> Esemé Yesúye kapu wain i keesoo tolosó Godee mapoo goomoga takoloso koodobuloso



dimapoo tenelone egeesee takaso, “Niba kapu wain i keesoo toloso odoo heeso naloso koodobuoga see odoo hee mapoo ka tenee domo di.

<sup>18</sup> Bei, ayo nimapoo taka, a epedee wain i naloso hamamee see wain i saga nalaimo. Esino Godeeye wiligi doloso badeli mi oso siboga, ayo see wain i ee nalaiso,” diso.

<sup>19</sup> Yesu see wo toloso Godee mapoo goomoga takoloso wo popeiso. Osoloso o hamamee dili odoo mapoo pulone egeesee takaso, “Hagee mo suso, niba halo ka teneeso. Esiga niba a goolee sabolo dobolone wo hagee nolone ka debee,” diso.

<sup>20</sup> Diba wo naloso koodobuloso Yesu see kapu wain i keesoo toloso Godee mapoo goomoga takaso. Osoloso o hamamee dili odoo mapoo tenelone egeesee takaso, “Kapu wain i keesoo hagee Godeeye mo sawo maga to kitulugu magoo dia hagoso. Mo sawo hagoso niba halo ka sologo buguso.

<sup>21</sup> Esino niba ege. A ha teli odoo mapoo tiasalai odoo ee mooloogoodoo hageeyo kulodu abolo badolone wo namoloso.

<sup>22</sup> Esiga Godeeye to magoo ee dodolone Odo Holo a talaiso. Esino Odo Holo a ha teli odoo mapoo tiaseli odoo yo, ye-ee! Bei, odoo yo dala talaiso.”

<sup>23</sup> Esemo o hamamee dili oso to hagee dulosos dieso nediliyo dima kulodu egeesee takaga meleeso, “Agayo ima kulodu goo hageesi ka moodoolaiyo?” diso.

*Toowa doloso badalai goo maga wegiga*

<sup>24</sup> Esemee Yesu o hamamee dili odoosoo oso dieso nediliyo dima kulodu odoosoo agayo toowa ka badosomo doloso wegigasoo.

<sup>25</sup> Osoloso Yesuye goo hagee ogoloso dimapoo egeesee takaso, “Yu odoonee dia wiligi odoosoo tebisa oso dima hemi debeli odoosoo ee diayo diya kitulugu sabolo gidebeliso. Esino diba dieso nediliyo odoosoo susuga mapoo takolone diba odoosoo susuga eyo odoosoo deliso.

<sup>26</sup> Esino niba nima kulodu egeesee selai tekeponee. Esiga nima kulodu odoosoo agayo toowa ka badosomo? Yo daga malalo eyo nediliyo pepooko doloso badebee. Osoloso nima kulodu odoosoo agayo gibadeli odoosoo masi ka badosomo? Yo tou teli odoosoo masi mesie sabolo tou tolone ka badebee.

<sup>27</sup> Niba medee goolee, wo nalame badeli odoosoo sabolo wo pili odoosoo sabolo dima kulodu, odoosoo agayo toowa doloso ka badosomo? Odoosoo ee badolone wo nalame badeli oso toowa doloso ka badoso. Esino nima kulodu a wo pili odoosoo masi badoso.

<sup>28</sup> Niba ayo hegi goo ee ma kulodu sileeme, a koo poogoo dili.

<sup>29</sup> Esiga mo Mameeye o odoosoo gibadalame kitulugu amapoo tenee egeesi ayo nimapoo tenelaiso.

<sup>30</sup> Esiga ayo wiligi doloso badeli mi oso siboga, ee ma kulodu niba abolo hodobo dobolone wo nalaiso. Osoloso niyo wiligi odoosoo oso debeli debi mapoo dobolone Isalael odoosoo bala 12 ee gidobolone dia goo ee midileiso,” diso.

*Pitaye Yesu boobado bigilei goo ee Yesuye taka  
(Mat 26:31-35; Maka 14:27-31; Yon 13:36-38)*

<sup>31</sup> Yesu badolone Saimon-Pita mapoo egeesee takaso, “Saimon, Saimon, Saitenso niba tei kibiya beleso kukulo agalame Godee mapoo woosome, Godeeye yimapoo kitulugu olo teneeso, yayo egeesee moodoolame.

<sup>32</sup> Esino ayo no halo Godee mapoo dokodoo olo takaso, nayo tei too peegeeyaga. Osoloso nayo amapoo see wedi simi biame mapoo, mo hamamee dili odo hagee bia oso tei too ma kulodu kibiya dabalame nayo diba pidi,” diso.

<sup>33</sup> Esem Pitaye nei yimapoo egeesee takaso, “Lodee, a nobolo neliga moso ma kulodu osoloso teli mapoo dilei mopoodoo doloso ka siloso,” diso.

<sup>34</sup> Esem Yesuye Pita mapoo nei egeesee takaso, “Pita, ayo namapoo taka, epei gesi kolokolo takel-ega mologa, nayo a gooleedele doloso puodalai ee bakadio hedebe dalaiso,” diso.

<sup>35</sup> Yesuye see o hamamee dili odo mapoo egeesee takaso, “Ayo daga niyo to tekepo takomo silesibilame diye dolone molee sabolo, osoloso o sabolo, osoloso kali bi abo sabolo toloso na di diso. Esino niba ee ma kulodu silesibilone, hegi goo abo egeisomo?” diso.

Esem diayo nei egeesee takaso, “Haye, egele,” diso.

<sup>36</sup> Esem Yesuye see dimapoo egeesee takaso, “Epedee hamapoo nimapoo molee sabolo o sabolo mologa, ee toloso di. Osoloso nimapoo

kaiya mauwe daga, nibada kekeisu dugo odoo hee mapoo teneloso nei molee toloso kaiya te.

<sup>37</sup> Bei, Godeeyo to booka mapoo hogugu oso egeesee takooso, ‘Edebeeyo yo mesiya masi wooloomalaiso,’ diso. Esiga Godeeyo to booka mapoo hogugu oso taka goo oso amapoo peledabalaiso. O, tei takoo, Godeeyo to booka mapoo hogugu oso mo goo maga taka goo susuga oso peledabalame siboso,” diso.

<sup>38</sup> Esem e o hamamee dili odoo oso yimapoo egeesee takaso, “Lodee, no ege. Iba kaiya bakadio moloso,” diso.

Esem e Yesuye dimapoo egeesee takaso, “Bige oso,” diso.

*Yesuye Olipi mubi mapoo badolone Godee mapoo taka*

*(Mat 26:36-46; Maka 14:32-42)*

<sup>39</sup> Yesu goo eyo moodeli egeesee moodoolone Yelusalem maga peegoo dileso Olipi mubi mapoo palaso. Esem e o hamamee dili odoo yibolo diyadeeso.

<sup>40</sup> Osoloso diba dileso omapoo dobolone, Yesuye dimapoo egeesee takaso, “Niba Godee mapoo takolone ka deb ee, goo tokenee mapoo gido duga homodobiyaga.”

<sup>41</sup> Yesu egeesee takoloso dimaga pepooko hoo-goo dileso ebiso miyomoo tugusaloso Godee mapoo takemeleeso.

<sup>42</sup> Yesuye Godee mapoo takolone egeesee takaso, “Ma, no goomogoga, amapoo dala hagee

sibo peegoo magee. Esino no goomoga goo ee te, ayo goomoga goo ee na te,” diso.

<sup>43</sup> Esemé Godeeyo momaiye oso Kei mi ma dokodooga sibilesó yo pidilone kitulugu teneeso.

<sup>44</sup> Egeesi ma kulodu Yesu dala talame hegi goo oso sibume, yo sooloo habasaga toowa sabolo Godee mapoo diya takaso. Esemé o debiaso sawo masi mi mapoo salagadibaso.

<sup>45</sup> Osoloso yo Godee mapoo taka koodobuloso dileso egeino, o hamamee dili odoó goo halagameleso tiesamolome egeiso.

<sup>46</sup> Esemé Yesuye dimapoo egeeseé takaso, “Niba kaseega ka tiesamalala? Niba hogogabuloso Godee mapoo takolone ka debee, goo tokenee mapoo gido duga homodobiyaga,” diso.

*Odoó susuga oso Yesu wooloomalame ido di  
(Mat 26:47-56; Maka 14:43-50; Yon 18:3-11)*

<sup>47</sup> Yesu o hamamee dili odoó sabolo to osee komolome, o hamamee dili odoó hee Yudaseeye odoó mooloogoodoo gilimadoloso sibilesó omapoo peledabaso. Esemé Yudaseeye Yesu adalame simiso.

<sup>48</sup> Esino Yesuye yimapoo egeeseé takaso, “Yudas, nayo Odoó Holo a ada sabolo ha teli odoó mapoo tiasalame ka sala?” diso.

<sup>49</sup> Esemé Yesu o hamamee dili odoó diayo odoó susuga oso Yesu talame simi ogoloso egeeseé takaso, “Lodee, iyo kaiyaso ka biligileiyo?” diso.

<sup>50</sup> Egeeseeme Yesu o hamamee dili odoó heeso tei moso wiligi odoó taba eyo tou teli odoó hee kaiyaso o dulu deedeé dokolo ee kobuguso.

<sup>51</sup> Esino Yesuye o hamamee dili odo mapoo egeesee takaso, “Omapoo koodobie! Goo egeesee na moodee!” diso. Osoloso Yesuye odo o dulu mapoo sigime see tekepo paso.

<sup>52</sup> Yesu yo omapoo tobudulone yo talame sibadee, tei moso wiligi odo tebisa sabolo, tei moso pee maga gidebeli dia wiligi odo tebisa sabolo, Yu odoowo wiligi odo tebisa sabolo mapoo egeesee takaso, “Niyo ogoga a mesiya daga a talame, kaiya sabolo wei sabolo toloso ka sibadeeyo?”

<sup>53</sup> Esino niba ayo biame susuga tei moso ma kulodu eligimo sili egeliso. Esino niyo kaseme a omapoo badoboome telega ka poogoowo? Esino epedee hamapoo nibada biame oso olo siboso. Bei, epedee hagee neliga wiligi odo taba Saite-neeyo biameso,” diso.

*Pitaye Yesuwo goo puodoo*

*(Mat 26:69-75; Maka 14:66-72; Yon 18:15-18, 25-27)*

<sup>54</sup> Osoloso odo susuga oso Yesu toloso tei moso wiligi odo taba eyo mosopoo ido diso. Esem Pitaye hamameedee toholoso deedee diso.

<sup>55</sup> Yo deedee dileso, odo susuga oso moso pee beele ma kulodu dou tooloso dou halagamolome, yo dibolo hodobo omapoo badolone dou hameleeso.

<sup>56</sup> Pita omapoo dou holone badoboome, sobo obuo omapoo tou teli oso sibilesa Pita mapoo medee bolone egeesee takaso, “Odo hagee Yesubolo sili hee yoso,” diso.

<sup>57</sup> Esino Pitaye nei egeesee takaso, “Sobo, odoo egee a gooleedele,” diso.

<sup>58</sup> Osoloso see hamamee odoo heeso sibilesa yo ogoloso yimapoo egeesee takaso, “No Yesubolo sili odoo hee noso,” diso.

Eseme Pitaye nei egeesee takaso, “Giso, asonee,” diso.

<sup>59</sup> Osoloso osoko howo hedebe poogoloso hamamee odoo heeso sibilesa to kitulugu sabolo egeesee takaso, “Tei takoo, odoo hagee Yesubolo sili hee yoso. Bei, yinosee Gelili odooso,” diso.

<sup>60</sup> Eseme Pitaye nei egeesee takaso, “Giso, nayo egee takoo goo ee tei a gooleedele,” diso. Pita to osee komolome, kolokolo takaso.

<sup>61</sup> Eseme Lodeeye hamameegoo bidi toboloso Pita mapoo bameleeso. Eseme biame omapoo Yesuye taka to hagee Pitaye gooleebuguso, “No epei gesi kolokolo takelega mologa nayo a gooleedele doloso puodalai ee bakadio hedebe dalaiso,” diso.

<sup>62</sup> Egeeseelone yo to hagee gooleebuguloso diya goohelime peegoo gadilesa pisaso.

*Yesu wiligi odoo tebisa oso to mou mapoo ido pala*

*(Mat 26:59-68; Maka 14:55-65; Yon 18:19-24)*

<sup>63</sup> Eseme Yesu yo gidebeli odoo oso yo manolone toloso weiso.

<sup>64</sup> Osoloso diayo o howo dugoso gagaloso wooloso egeesee takaso, “Imapoo takee, no odoo agayo wala?” dee takaso.

<sup>65</sup> Egeeseelone to tokenee abo sabolo yimapoo takaso.

<sup>66</sup> Osoloso mi hadobume gesikolodee Yu odoowo wiligi odoow tebisa sabolo, osoloso tei moso wiligi odoow tebisa sabolo, osoloso tei eligili odoow sabolo hodobo mooloogoodooso. Osoloso diayo to moulone debei mapoo Yesu ido palaso.

<sup>67</sup> Esem diayo dobolone Yesu mapoo egeese takaso, “Nayo imapoo takee, no tei Godeeye hudi magoo Keliso nosomo?” diso.

Esem Yesuye dimapoo nei egeese takaso, “Ayo nimapoo takooga, niyo ayo taka goo mapoo tei talaime.

<sup>68</sup> Ayo nimapoo woosaga, niyo amapoo to eyo nei takalaime.

<sup>69</sup> Esino epedee biame hamaga Odoow Holo a Godee kitulugu eyo dee deedee dokolo mapoo yibolo wiligi doloso badalame bileiso,” diso.

<sup>70</sup> Esem odoow susuga oso yimapoo egeese takaso, “Esiga no tei Godeeyo owolowo?” diso.

Esem Yesuye nei dimapoo egeese takaso, “Niyo a Godeeyo owolo dee egee takoo ee tei goo takoo,” diso.

<sup>71</sup> Esem diayo egeese takaso, “Esiga iba o goo midilei maga to abo dulei koo goomogo. Bei, yo eyo o goo ee olo yebugulone yo Godeeyo owolo diso. Esiga yo wooloomalai tekepo,” diso.

## 23

*Yesu yo Paillet sabolo osoloso Helodee mapoo*



*ido di*

*(Mat 27:1-2, 11-26; Maka 15:1-15; Yon 18:28—19:16)*

<sup>1</sup> Osoloso wiligi odoo tebisa mooloogoodoo oso tebisaloso Yesu Paillet mapoo ido diso.

<sup>2</sup> Diayo dilesos Paillet mapoo Yesuwo goo maga takolone egeesee takaso, “Odoos hagoso ibada odoo eli tokenee mapoo gilimado di ogoloso ka too. Bei, yayo ibada odoo oso Sisa mapoo tekisi molee misigeli hamaga takoloso see eyo nediliyo yo wiligi odoo Keliso dee takemeleeso,” diso.

<sup>3</sup> Esemes Pailteeye Yesu mapoo egeesee takaso, “No tei Yu odoo dia wiligi odoowo?” diso.

Esemes Yesuye nei egeesee takaso, “O, nayo olo egee takooso,” diso.

<sup>4</sup> Osoloso Pailteeye Yu odoowo tei moso wiligi odoo tebisa sabolo osoloso odoo abo omapoo mooloogoodoloso debei mapoo egeesee takaso, “Ayo yo talaino yimapoo goo tokenee hee koo ogo,” diso.

<sup>5</sup> Esino diba goo egee pagalai gowoolone to kitulugu sabolo egeesee takaso, “Edebeeyo Loum gamalee mapoo kamanalame, yayo Yudiya mi toowa mapoo silone odoo goo tiadili goo ee eligimo siliso. Osoloso yayo goo hagee Gelili mi maga bei mooloogooloso see hamapoo sibilesos ka eligimo siloso,” diso.

<sup>6</sup> Osoloso Pailteeye goo hagee duloso, Yesu tei Gelili odoo belesos odoo mapoo woosaso.

<sup>7</sup> Egeesi ma kulodu yayo Yesu tei Gelili odoo dee taka goo ee duloso, Yesu Helodee mapoo ido di diso. Bei, Helodeeye Gelili mi mapoo wiligi odoo

toboloso ka badebei. Biame omapoo Helodee Yelusalem mapoo sibilesa badebeiso.

<sup>8</sup> Ee ma kulodu Helodeeye Yesu ogoloso diya goomogaso. Bei, yo Yesuwo goo epedee eiyo dumelega, yo agalai goomegeliso. Osoloso Yesuye goo opusomo di o mudugiyo moodoolame diya goomogaso.

<sup>9</sup> Esem Helodeeye Yesu mapoo woosali to bei woosagaso. Esino ee ma kulodu Yesuye yimapoo to nei hee takele.

<sup>10</sup> Osoloso biame omapoo tei moso wiligi odoo tebisa sabolo osoloso tei eligili odoo tebisa sabolo oso to kitulugu sabolo takolone Yesu mapoo gigidiso.

<sup>11</sup> Esem Helodeeye o odoo sabolo Yesu manolone wiligi odooso kali dugo kadiso. Osoloso yo Paillet mapoo see ido di diso.

<sup>12</sup> Biame domo omapoo Paillet dio Helodee dio emegei diso. Esino daga debei ee ma kulodu dieso nediliyo nei heigo nei heigo dolone debeiso.

<sup>13</sup> Esem Yesu Paillet mapoo see ido di ogoloso, Pailteeye tei moso wiligi odoo tebisa sabolo osoloso Yu odoowo wiligi odoo tebisa sabolo osoloso odoo susuga gilimadoloso egeese takaso,

<sup>14</sup> “Niyo odoo hagoso Yu odoo oso Loum gamalee mapoo kamanalame, odoo goo tiadili goo ee eligimo silo doloso, amapoo ka ido simi. Esino ayo nibada mudugiyo o goo midino, yimapoo goo tokenee hee molo egele.

<sup>15</sup> Osoloso Helodee nosee Yesu mapoo goo tokenee hee molo egele. Egeeseeme yayo yo see imapoo ido sibe dee takaso. Esiga niso ogoso,

odoo hagee wooloomalai yimapoo goo tokenee hee mauwe.

<sup>16</sup> Esiga ayo yo wulo woomele poogoloso diye dalaiso.”

[  
<sup>17</sup> Esino Pailteeye Yu odoo oso goomogalame diayo Godeeye gababia wo nali biame mapoo odoo hee neliga moso ma kuloduga peegoo diye deliso.]

<sup>18</sup> Osoloso odoo susuga oso to neligidi egeesee takaso, “Yesu wooloomolone, nei Balabas neliga moso ma kuloduga peegoo diye dee!” dee takaga meleeso.

<sup>19</sup> Balabas hagoso daga Loum gamalee mapoo ha temeleso odoo hee wooloomaso. Egeeseega yo neliga moso ma kulodu husooso.

<sup>20</sup> Pailteeye Yesu peegoo tamagalame diya goomogolone, see tobu odoo mooloogoodoo mapoo woosaso.

<sup>21</sup> Esino odoo susuga oso to neligidi yimapoo nei egeesee takaso, “Yo homo bulubo magoo ma dokodoo yoguso enige! Yo homo bulubo magoo ma dokodoo yoguso enige!” dee takaga meleeso.

<sup>22</sup> Esemе Pailteeye see tobu odoo mooloogoodoo mapoo egeesee takaso, “Bei, niyo kasalame yo wooloomalame ka sala? Yayo goo tokenee kasee toowo? Ayo o goo midi mapoo ayo yo wooloomalame ido dino, yimapoo goo tokenee hee molo egele. Esiga ayo yo wulo woomele poogoloso diye dalaiso,” diso.

<sup>23</sup> Esino odoo susuga oso toso neligidi diya takaso, “Yesu homo bulubo magoo ma dokodoo

yoguso enige!” dee takaga meleeso. Di-ayo egeesee takemelee Paillet to ee dulei diya gowoolone, bige dimapoo deedebeegee diso.

<sup>24</sup> Egeeseeme yayo dia to duloso odoo susuga oso goomoga goo ee tooso.

<sup>25</sup> Esiga Pailteeye Loum gamalee mapoo ha tolone odoo wooloomali Balabas ono neliga moso ma kuloduga peegoo diye diso. Esino Yesu homo bulubo magoo ma dokodoo talame yayo yo odoo susuga mapoo teneeso.

*Yesu homo bulubo magoo ma dokodoo yoguso eniga*

*(Mat 27:32-44; Maka 15:21-32; Yon 19:17-27)*

<sup>26</sup> Osoloso ha teli odoo oso Yesu toloso mi ee ma kuloduga peegoo ido dumolome, Kulene odoo Saimon Yelusalem mi mapoo dumolome eli domopoo tugodooso. Osoloso diayo homo bulubo magoo toloso see o ei mapoo imeduloso Yesu ma hamamee diye diso. <sup>27</sup> Osoloso biame omapoo, Yesu toloso diyadaga molome odoo susuga hamamee diyadeeso. Osoloso ee ma kulodu sobo abo sabolo dulone Yesu halo gooholone hamamee dulone pupusigamo diyadeeso.

<sup>28</sup> Esememe Yesuye bidi toboloso dimapoo bolone egeesee takaso, “Yelusalem sobo, niba a halo haga na pupusige. Esino niso nediliyo osoloso nibada holo halo ka pupusige.

<sup>29</sup> Bei, dala biame oso siboga, edebeeyo egeesee takagalaiso, ‘Sobo deme taba nibolo osoloso sobo holo soomagoloso too koo nedili niba diya goomege.’

<sup>30</sup> Bei, biame egeesi oso peledaba omapoo ede-beeyo egeese takagalaiso, ‘Mubi sabolo osoloso esia niyo goodobuloso iba toogoode!’ dee takalaiso.

<sup>31</sup> Esiga goo hageesi oso homo su gie mapoo peledobooga, see ogoo goo oso homo su sia mapoo ka peledabalaisomo?” diso.\*

<sup>32</sup> Osoloso biame omapoo ha teli odoo oso Yesu ido dulone, mesiya bakadio homo bulubo magoo ma dokodoo wooloomalame ido diso.

<sup>33</sup> Diba sibilesi mubi hee, eyo hu Wiligi ki mi deli mapoo, Yesu homo bulubo magoo ma dokodoo yoguso enigaloso tuluguso. Osoloso mesiya bakadio onosee homo bulubo magoo mapoo yoguso enigaloso, odoo hee Yesuwo deede dokolo tulugu, osoloso hee dobusu dokolo tulugu diso.

<sup>34</sup> Osoloso Yesuye homo bulubo magoo ma dokodoo telega molone egeese takaso, “Ma, odoo hagee bia oso goo tokenee amapoo egee moodoo ee nayo hapoloso boobado bigi. Bei, diayo goo egee moodoo eyo bei diba gooleedele,” diso. Osoloso ha teli odoo oso Yesuwo dugo talame diayo yo pepuso odoo hu ma ee kobuso.

<sup>35</sup> Odoo susuga oso peegooga tebisamolone balaga molome, Yu odoowo wiligi odoo tebisa oso manolone egeese takaga meleeso, “Yayo odoo abo pidimo siliso. Esiga yo tei Godeeye hudi

---

**23:30:** Hos 10:8; Yili 6:16      \* **23:31:** Esiga to hogugu hageeyo bei egeese moloso, “Niyo kasee gooleedo? Goo hagoso tokenee mauwe odoo mapoo peledabalai teiba daga, hee tokenee teli odoo dimapoo ogoo gooso peledabalaiyo?”      **23:34:** Psa 22:18      **23:35:** Psa 22:7-8

magoo Keliso oso daga, o su eyo nediliyo pidilei tekepo,” dee takaga meleeso.

<sup>36</sup> Osoloso ha teli odoo sabolo oso Yesu manolone, wain i mei nali keesoloso Yesuye nalame tenelone yimapoo egeesee takaso,

<sup>37</sup> “No medee tei Yu odoo dia wiligi odoo taba daga, no telega pagalame, no nediliyo pidi,” diso.

<sup>38</sup> Yesu o wiligi oo poogoo dokodooga to hageesee hoguguloso kalamaso,

“Odoos hagee Yu odoo dia wiligi odoo taba.”

<sup>39</sup> Mesiya hee Yesuwo ho hodiokooga eniga oso Yesu mapoo tokenee sisilone yimapoo egeesee takaso, “No medee tei Keliso daga, nee su no nediliyo pidilone, iba noseepidi,” diso.

<sup>40</sup> Esino mesiya hee oso o odoowo to su maga to kitulugu sabolo egeesee takaso, “No Godeebolo koo obudo? Bei, yayo dala egee to, no noseep dala hedebe egeesi toso.

<sup>41</sup> Esiga iba asalo ibada tokenee eyo nei maga ka wodioso. Esino Yesu mapoo tokenee hee mauwe,” diso.

<sup>42</sup> Osoloso yayo see Yesu mapoo egeesee takaso, “Yesu, nayo wiligi doloso badebei mapoo, nayo a gooleebigi,” diso.

<sup>43</sup> Esemee Yesu nei yimapoo egeesee takaso, “Ayo namapoo tei goo taka, esiga epei no abolo hodobo goomoga mi Paladais mapoo badalaiso,” diso.

*Yesuye ta eyo goo*

*(Mat 27:45-56; Maka 15:33-41; Yon 19:28-30)*

<sup>44</sup> Osoloso osoko olo oo domo tooboome, mi susuga neligaso, mi neligamelee ososee osoko howo bakadio hedebe di poogooso.

<sup>45</sup> Bei, goo ogoso peledoboome, osoko pelega poogooso. Osoloso tei moso tegei ma kulodu dugo kodia oso kisimelee ee eyo mosoowe domo tologodooso. <sup>46</sup> Esemé Yesuye to neligidi egeesee takaso, “Ma, a mo dio nee dee mapoo maga,” diso. Yesu to hamameedee hageesee takoloso taso.

<sup>47</sup> Osoloso ha teli odoó gibadeli odoó oso Yesuwo homo bulubo magoo ma hemidu badolone Yesuye ta goo ee ogoloso, Godeeyo hu dokodoo poudoolone egeesee takaso, “Tei takoo, odoó hagee Godeeyo howo woola tekepo odoodoo,” diso.

<sup>48</sup> Osoloso odoó susuga oso gooso peledaba ee agalame omapoo dileso balagamelee odoó oso goo hagee ogoloso dulone diya gooholone dia budo mapoo kobugumo see wedi diyadeeso.

<sup>49</sup> Osoloso Yesu o odoó sabolo osoloso sobo abo Yesubolo Gelili abaga sibadee oso wulo eli sage abaga tebisamolone goo hagoso peledaba mapoo balaga meleeso.

### *Yesu mi doosoo*

*(Mat 27:57-61; Maka 15:42-47; Yon 19:38-42)*

<sup>50-51</sup> Dima kulodu odoó hee badebeiso, o hu Yosep. Yudiya mi toowa ee ma kulodu mi pe-pooko Alimatiya ee o midee. Yo Godeeyo howo woola tekepo badolone Godeeye wiligi doloso badeli goo oso siba beleso bameleeso. Osoloso

yo Yu odoowo wiligi odo tebisa oso mooloo-goodoo ee ma kulodu yo dibolo hodobo bade-beiso. Esino Yu odoowo wiligi odo tebisa oso Yesu Loum gamalee odo oso wooloomalame dimapoo tiaseme, yo goo omapoo gowoolone yayo hamaga takaso.

<sup>52</sup> Osoloso yayo Yesu ta eyo su ee talame, Paillet mapoo dileso woosaso.

<sup>53</sup> Osoloso yayo Yesuwo kou homo bulubo magoo ma dokodooga miyomoo to meilesa, dugoso tiadoloso yo ou madu magooso. Midoo hagee dia. Esiga daga odo hee teme omapoo magele.

<sup>54</sup> Esino biame domo egee Yu odo diayo hasali biame bei mooloogolai osoko howo koola too-boome ka see.

<sup>55</sup> Osoloso sobo abo Yesubolo Gelili abaga sibadee oso Yosepeeye Yesuwo kou mi doo ma kulodu magalame todime, diba yima hamamee diyadeeso. Diba omapoo dileso Yosepeeye Yesuwo kou magoo medee egeiso.

<sup>56</sup> Osoloso diba see wedi dileso sisigageli bi medee tekepo Yesuwo su mapoo hedilame mopoodoo dooso. Esino diba Yu odo diayo hasali biame olo bei mooloogoome, Moseseye tei magoo ee dodolone epedee koodobuloso hasaso.

## 24

*Yesu midoo ma kuloduga hogabia  
(Mat 28:1-10; Maka 16:1-8; Yon 20:1-10)*

<sup>1</sup> Esiga Sadee toowa biame gesikolodee sobo hagee bia oso sisigageli bi medee tekepo



mopoodoo doo ee toloso Yesuwo bi mapoo diyadeeso.

<sup>2</sup> Diba omapoo dilesio egeino, yo toowa wulu ou miyopoo kisi ee peegoo bidigamo dilesio molome egeiso.

<sup>3</sup> Esemé diayo kulodu galagadilesio egeino, Lodee Yesuwo su omapoo mauwe molo egeiso.

<sup>4</sup> Osoloso diayo kulodu galagadilesio goo tiademe balaga meleeno, odoo bakadio dugo diya gadeebugu kalaga oso saga peledoboloso soboso debei mapoo hodiokooga tebisaso.

<sup>5</sup> Osoloso sobo diba diya dio dulone, ebia sabolo miyomoo gawuaso. Esemé odoo bakadio oso dimapoo nei egeese takaso, “Niyo kasalame odoo see gie badeli too ee midoo ma kulodu ka esiamo silesibala?”

<sup>6</sup> Yo kulo hadu mauwe. Esino yo see hogado dina. Esiga niba Yesubolo Gelili mapoo silone, yayo nimapoo taka goo ee gooleebigi.

<sup>7</sup> Bei, yayo egeese takaso, ‘Odo Holo, a toke-nee teli odoo dimapoo tiasalaiso, osoloso a homo bulubo magoo ma dokodoo yoguso enigileiso. Osoloso a biame bakadio midoo ma kulodu tamoloso, biame bakadio hedebe di mapoo midoo ma kuloduga see hogado dileiso,’ diso.”

<sup>8</sup> Esemé sobo diba to hagee duloso Yesuye takomo sili to ee gooleebuguso.

<sup>9</sup> Osoloso diba midoo maga see wedi dilesio, diye di odoo 11 sabolo osoloso odoo susuga mapoo diayo egei goo susuga ee dimapoo oposususo.

<sup>10</sup> Esiga sobo hagee bia oso goo peledaba hagee ka egei, Meli-Magadalin osoloso Yowana osoloso

Yemeseeyo owee Meli osoloso sobo abo.

<sup>11</sup> Esino sobo hagee bia oso sibilesi diye di odo mapoo takeme diba duno, halabolone taka masi takeme to omapoo tei tele poogooso.

<sup>12</sup> Esino Pita toboloso midoo ee agalame hoguo diso. Yo dilesi gasuwoloso wulu ma kulodu egeino, dugo Yesuwo su tiadoloso magoo ee see mosoowe wulu ma kulodu molome egeiso. Esememe Pita goo hagee ogoloso howoodoomo wedi diso.

*Odo bakadio oso Emaus mi mapoo dulone Yesu egei*

<sup>13</sup> Biame hedebe omapoo Yesuwo hamamee dili odo bakadio oso Yelusalem mi poogoloso, see Emaus mi mapoo diyadaga meleeso. Emaus mi egee Yelusalem omaga haga hoogoonee, wulo 11 kilomita egeesi masi.

<sup>14</sup> O bakadio dumo dulone goo susuga Yesu mapoo peledaba goo ee oposusumo diyadeeso.

<sup>15</sup> Osoloso o bakadio osee oposusumo diyadaga molome, Yesu dima hamamee sibilesi diba tugodoloso dibolo hodobo diso.

<sup>16</sup> Esino odo bakadio hagosu Yesu medee kibiya hoodo egele. Bei, diayo Yesu kibiya hoodo egeyaga, Godeeye diba gooloogooso.

<sup>17</sup> Esememe Yesuye dimapoo egeese takaso, “Niba ogoo goo oposusumo diyadaga malana?” diso.

Esememe diba eli domo omapoo kookoo toboloso goohele sabolo mudu olugodoloso tebisameleeso.

<sup>18</sup> Osoloso dima kulodu odo hee, o hu Keleopas, yayo Yesu mapoo egeese takaso, “Yelusalem mi mapoo odo soo sibadee ee ma

kulodu mi omapoo goo peledaba ee, no dulega badosoba?” diso.

<sup>19</sup> Esemе Yesuуе nei dimapoo egeesee takaso, “Nayo egee takoo ogoo goo takala?” diso.

Esemе diayo nei yimapoo egeesee takaso, “Iba Yesu Nasalet odoо eyo goo ee taka. Bei, yo Godee maga to tolosо kokodo takomo sili odoо doloso badolone Godeeyo howo woola osoloso odoо susuga eyo mudugiyo Godeeyo to kitulugu sabolo takomo siliso. Osoloso yayo goo toowa opusomo di moodoomo siliso.

<sup>20</sup> Esino tei moso wiligi odoо tebisa sabolo osoloso ibada wiligi odoо tebisa oso Yesu Loum gamalee oso wooloomalame dimapoo teneeso. Esemе yo homo bulubo magoo ma dokodoo yo-guso enigaloso taso.

<sup>21</sup> Esino iyo goolee, yayo Isalael odoо iba Loum gamalee gidebeli omaga peegoo gilimado dileiso doloso dobolone balaga meleeso. Esiga goo hagoso peledaba ee biame bakadio olo poogooso.

<sup>22-23</sup> Osoloso ibada mooloogoodoo ee ma kulodu sobo abo oso epei gesikolodee dileso midoo mapoo egeino, Yesuwo su mauwe molo egeiso. Esemе diayo sibilesо imapoo takolone, ‘Ibada howo opusomo doloso Godeeyo momaiye egeiso,’ diso. Esemе momaiye oso Yesu ta maga hogado di goo ee dimapoo takaso. Esemе goo susuga hagee takeme, iba diya dio diso.

<sup>24</sup> Osoloso ibada mooloogoodoo ma kulodu debeli odoо abo diba noseе dileso midoo egeino,

soboso taka to sabolo tobulone, Yesuwo su midoo ma kulodu mauwe molo egeiso.”

<sup>25</sup> Esemé Yesuye nei dimapoo egeesee takaso, “Niba medee diya boobada odoodoo. Niba kaseega Godee maga to toloso kokodo takomo sili odo dia to mapoo tei telega ka dosomo?”

<sup>26</sup> Bei, diayo egeesee takaso, ‘Godeeye hesia Kelisoye dala goo hageesi toloso see Godeeye egee bado mapoo peleso hu toowa toloso kitulugu sabolo badalaiso,’ diso.”

<sup>27</sup> Osoloso Yesuye dimapoo Moses sabolo osoloso Godee maga to toloso kokodo takomo sili odo susuga oso Kelisowo goo hogugu goo eyo bei dimapoo medee eligiso.

<sup>28</sup> Osoloso diba Emaus mi olo koola tooboome omapoo dulone Yesuye dimapoo egeesee takaso, “A hamapoo hasalaime. Esino a olo wulo duso,” diso.

<sup>29</sup> Esemé odo bakadio oso to kitulugu sabolo yimapoo egeesee takaso, “Emegei, no epedee na di, no ibolo hodobo tiamo. Bei, olo nolugo,” diso. Esemé Yesu yo dibolo hodobo tilame diso.

<sup>30</sup> Osoloso diba moso kulodu peleso nei nalame dobolone, Yesuye wo toloso goomoga to takoloso koodobuloso wo populoso dimapoo piso.

<sup>31</sup> Egeesee semelee biame omapoo diayo Yesu medee kibiya hoodo egeiso. Omapoo diayo Yesu medee kibiya hoodo egeme, yo saga omapoo osugoboodooso.

<sup>32</sup> Esemé obakadio dobolone dibusomo egeesee takaga meleeso, “O. Tei takoo, iba eli domo

abaga sibadaga molome, yayo Godeeyo to eyo bei imapoo takeme, ibada sooloo ma kulodu diya goomogaso,” diso.

<sup>33</sup> Osoloso diba saga tebisaloso see Yelusalem mapoo wedi diyadeeso. Diba omapoo dileso egeino, diye di odoos 11 sabolo osoloso Yesuye di hamamee dedeli odoos susuga oso diesono hodobo mooloogoodoloso doboome egeiso.

<sup>34</sup> Esemee odoos omapoo mooloogoodoloso debei oso dimapoo egeese takaso, “O. Tei takoo, Lodee yo ta maga see hogado didoo. Osoloso yo see Saimon-Pitaye badebei mapoo peledabadoo,” dee takaga meleeso.

<sup>35</sup> Osoloso odoos bakadio hagee bia oso Yesu eli domopoo diba tugodoloso di eyo goo sabolo osoloso Yesuye dibolo hodobo nei nalame dobolone, wo toloso popume, diayo yo medee kibiya hoodo egei goo ee dimapoo oposususo.

*Yesuye o hamamee dili odoos dimapoo dileso peledaba*

*(Mat 28:16-20; Maka 16:14-18; Yon 20:19-23; Diye 1:6-8)*

<sup>36</sup> Diba goo hamapoo to osee kesamolome, haga booloogelega diayo debei domo omaga Yesu peledoboloso tobudulone dimapoo egeese takaso, “Emegei, mesie goo oso nibolo hodobo mele,” diso.

<sup>37</sup> Esino diayo goolee yo odoos dio bele dolone, dio dulone diya ebigaso.

<sup>38</sup> Esemé Yesúye nei dimapoo egeesee takaso, “Niba kaseega ebia sabolo goo tiadoo sabolo nibada goo goolee ma kulodu ka malana?”

<sup>39</sup> Esiga niba mo dee sabolo osoloso mo homo sabolo ogoloso tei aso doloso gooleede. Osoloso mo su sige, niyo a tei su moloso doloso gooleedalame. Bei, odoó dío díba su mauwe,” díso.

<sup>40</sup> Yo to hagee takoloso o dee boowo sabolo osoloso o homo boowo sabolo dimapoo eligiso.

<sup>41</sup> Esino díayo medee tei telega goomoga sabolo osoloso dío dulone debei ogoloso Yesúye dimapoo egeesee takaso, “Nimapoo nei nali hee molosomo?” díso.

<sup>42</sup> Esemé díayo yimapoo dí sí pepooko teneeso.

<sup>43</sup> Osoloso yayo día howo woola dí egee neso.

<sup>44</sup> Osoloso yayo dimapoo egeesee takaso, “Ayo nibolo hodobo silone nimapoo takeliso, ‘Mo goo maga Moseseeye hogugu sabolo, osoloso Godee maga to tolosó kokodo takomo síli odoó oso hogugu sabolo, osoloso Sam booka mapoo hogugu goo oso amapoo peledabalaiso,’ deliso. Esiga epei goo hagoso amapoo olo ka peledobooso,” díso.

<sup>45</sup> Osoloso Godeeyo to booka mapoo hogugu goo ee medee kibiya gooleedalame, Yesúye díbada goo goolee medee hoodo magooso.

<sup>46</sup> Yesú egeesee solone tobudulone dimapoo egeesee takaso, “Esiga Godeeyo to booka mapoo hogugu ee egeesee moloso: Godeeye hesia Keliso, a dala tolosó biame bakadio midoo ma kulodu

ta moloso see biame bakadio hedebe di mapoo hogabuloso toboloso dileiso.”

<sup>47</sup> Osoloso Yesuye see tobu dimapoo egeesee takaso, “Niba Yelusalem abaga bei mooloo-gooloso mipoo toowa mapoo mo hu maga odo mapoo hageesee eligimo silesibe, ‘Niba goo goolee su wuduloso nibada goo tokenee maga miligi pie. Eseega nibada goo tokenee hapoloso boobado bigileiso,’ dee takomo silesibe.

<sup>48</sup> Esiga niyo mo goo hagee ogoloso takomo silesibileiso.

<sup>49</sup> Osoloso niba Yelusalem poogoloso epedee na di. Esino niba epedee hamapoo osee dogo, Kei mi ma dokodooga kitulugu siboga talaiso. Bei, ayo mo Maye taka to ee dodolone nimapoo Dio Tei tenelaiso,” diso.

*Yesu Kei mi ma dokodoo ido pala  
(Maka 16:19-20; Diye 1:9-11)*

<sup>50</sup> Osoloso Yesuye o hamamee dili odo gili-madoloso Betani mi koola mapoo diyadaga meleeso. Diba omapoo dileso peledoboloso Yesuye dee dokodoo poudoloso diba halo Godee mapoo takolone diba pidilame goomoga to takaso.

<sup>51</sup> Yo egeesee takomolome, Yesu Kei mi ma dokodoo ido palaso.

<sup>52</sup> Esem diayo Yesuwo hu dokodoo poudoloso, goomoga sabolo Yelusalem mi mapoo see wedi diyadeeso.

<sup>53</sup> Osoloso biame susuga ee ma kulodu, diba Yu  
odoowo tei moso mapoo dobolone, Godee mapoo  
goomoga poudoolone debeiso.



**Godeeyo To Tekepo**  
**Portions of the New Testament in the Odoodee**  
**language of Papua New Guinea**  
**Sampela hap Nupela Testamen long tokples Odoodee**  
copyright © 2006, 2015, 2017 Wycliffe Bible Translators, Inc.

Language: Odoodee

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-30

---

PDF generated using Haiola and XeLaTeX on 18 Apr 2025 from source files dated 31 Aug 2023

ffb0eddd-0f6e-5201-89ab-6fcbfcaebeba